

يوسف ادريس

اللعنة على طريجة



طبرستان بکیتہ لائبر

الخطۃ اخرجہ

تالیف

یوسف اورینی

الناشر

مکتبہ مصیّر
۲ شارع کائنات مدنی - الجمالہ

سمیعہ جودۃ السحر و شیرکادہ

ملو مصطلحات

۳۱ شارع سکندر مدنی

كلمة

مفروض أن المسرحية تكتب أصلا لتمثل على خشبة المسرح . والنص المسرحي - مهما بلغت قوته - ليس فى الواقع إلا جزءا واحدا من الأجزاء العديدة التى تشترك فى تجسيد العمل المسرحي .

أجل ... المسرحية ليست هى النص المسرحي وحده . ونحن حين نتحدث عن المسرحية أو « المسرح » فنحن نقصد تلك اللحظات التى تلتقى فيها مجموعتان غريبتان من الناس ؛ مجموعة كبيرة تحوى أناسا من مختلف الأمزجة والألوان والطبقات ، جاعوا من عالم خارجى مزدحم عريض ليلتقوا بمجموعة صغيرة أخرى من الناس تحيا فى عالم محدود خاص . تلك اللحظات هى المسرح ، هى التجارب الحادثة بين الجماعتين .. اللحظات التى تطفأ فيها الأنوار فى الصالة لتعجب عن الجماعة الصغيرة العالم الخارجى العريض ، وتضاء فيها أنوار المسرح لتسلط على ذلك العالم الصغير المحدود .. اللحظات التى تنسى فيها كل جماعة نفسها وتنسى فيها ما جاءت لأجله ، التى ينسى فيها المتفرج أنه مجرد متفرج ، وينسى فيها الممثل أنه مجرد ممثل ، وتعداد صياغة الزمن فيحيون الليل على أنه نهار ، وربما منتصف النهار على أنه منتصف الليل .. اللحظات التى تقوم فيها فى أثناء هذا الاجتماع الكبير روابط إنسانية وثيقة بين الواقف على خشبة المسرح والجالس فى الصالة ، وبين الجار والجار ، والممثل وزميله ، وأعصاب الجمهور والحبال التى تشد الستائر . تلك اللحظات التى يبد لصنعها أناس يدخلون إلى ذلك المحراب المقدس من بابه الخلفى ومن بابه الأمامى ، تاركين الحياة التى يحيونها فى الخارج

ليشتركوا باختيارهم خلق حياة من صنعهم هم ، حياة يصنعونها ،
ويحيونها وتعتمد على اشتراك كل منهم بنصيبه فيها .
ذلك هو المسرح .

والنص المسرحي هنا مجرد أسهم وعلامات قد تحدد الطريق الذى
تسلكه الحياة التى يقوم بصنعها الإنسان . مجرد إشارات تنظم مرور هذه
الحياة فى أثناء سريانها وتدفعها ، مجرد مادة خام غير قابلة للتفاعل إلا
حين تختلط بغيرها من المواد ، وتحدث الشرارة ، ويتم التجاوب داخل
الحراب المقنص .

وأنا أميل كثيرا إلى استعمال تلك الكلمة التى أصبحت مودة العصر
والتي يصفون بها إنتاج الرسام أو الكاتب أو الموسيقار ، أعنى كلمة
« الخلق » ، أقول هنا مع أنى استعملتها ، ولكننا نستعمل كلمات
أحيانا لمجرد أنها كلمات شائعة ، حسن إذن ! إذا سمينا الكتابة للمسرح
عملية خلق فقد رأينا أنها إحدى عمليات الخلق الداخلة فى تكوينه ،
وإذا كان الكاتب يخلق الكلمة ، والمخرج يخلق الحركة ، والممثل يخلق
العاطفة التى يصوغ بها الكلمة والحركة ، والجمهور يخلق الجو العام
الذى يستحيل فيه التمثيل إلى حقيقة وتستحيل فيه الحقائق أحيانا إلى
تمثيل ، كل هذه العمليات عمليات خلق ، وكلها تدخل فى تكوين
المسرح .

ولكن المسرح ليس مجرد حاصل جمع هذه العمليات .
المسرح ، أو اللحظات المسرحية ، شئ ينتج عن هذه المكونات
جميعها ، شئ رائع جديد .. شئ يبلغ من قوته حد أن يملك على
جمهور غفير من الناس ألبابهم لبضع ساعات ، وقد يؤثر فيهم لأيام كثيرة ،
وقد يبقى أثره ساريا فى حياتهم وحياة أولادهم لسنين طويلة وستين .

الإقدام على نشر النص المسرحي إذن مغامرة ، فالواقع أنى كتبت هذه الرواية لكى تمثل ولم أكتبها لكى تقرأ وقد ترددت كثيرا قبل نشرها ، فالكلمة حين تراها العين غيرها حين تسمعها الأذن ، والكلمة حين ينطقها كائن حى منفعل غيرها حين تبدو هادئة راكدة على الورق، والجو حين تجسده السطور غيره حين تبدو فى ذلك المزيج السحري من النور والظلام والعيون اللامعة والأنفاس اللاهثة المترددة ، والحوار حين يقرؤه الشخص وحيدا غيره حين يسمعه فى حضرة جمهور ، فمشات الأشخاص حين يجتمعون فى مكان واحد يفقد كل منهم ذوقه الفردى ويتكون لهم إحساس عام مختلف تماما ... إحساس الجماعة البشرية التى قد لا تتفعل بما لا يتفعل له الفرد ، والتى قد تفهقه ضاحكة لما لا يبعث فى الفرد إلا مجرد الابتسام .

وصحيح أن هذه ليست أول مرة ينشر فيها نص مسرحى قبل تمثيله، أو تنشر فيها روايات فى كتب ، ولكنى أعتقد أن معظم تلك الأعمال كتبت أصلا لكى يقرأها القارئ ... وعلى هذا كان نشرها فى كتاب أصلح وسيلة لنشرها . أما النصوص المسرحية التى كتبت لتمثل فنشرها يعد مغامرة .. مغامرة لأنه يتطلب من القارئ جهدا أكثر مما تتطلبه قراءة رواية أو قصة أو مقالة . ففى أى مكان يقرؤها ، فى القطار أو فى القهوة أو قبل النوم ، عليه أن يتزع نفسه من كل ما حوله ، ويتصور نفسه داخل مسرح ما ، بل فى مقعد بعينه من صالة المسرح وفى حضرة جمهور ، وقد جاء خصيصا ليشهد هذه الرواية بالذات ، وعانى من وسائل المواصلات ، ودفع ثمن تذكرة الدخول ، وجلس ينتظر رفع الستار على مفضل ، ثم عليه إذا ما دار الحوار أن يتصور الكائنات الحية التى تنطقه .. ويستقبله باحساسه الجماعى . عليه بالاختصار أن يقوم وحده بكل عمليات الخلق الأخرى التى لا بد من اضافتها للنص المسرحي لكى

يصبح رواية مسرحية . والمغامرة أن قارئنا كهذا من الصعب الحصول عليه في خضم مشغوليات حياتنا الكثيرة .

ولكنى مع هذا متفائل ومطمئن ، ومتأكد تماما أن الناس جميعا يحبون لكي يظفروا بالمتعة أن يبدلوا الجهد . بل إنى أعتقد أن أى عمل فنى أو أدبى هو ملك للناس قبل أن يكون ملكا لمنتجه أو كاتبه . وإذا صح هذا فى كل الفنون حيث يتبنى الناس العمل ويحنون عليه ويبدلون من أنفسهم له ، فهو فى المسرح أوضح وأبعد مدى .. إذ أن المسرح ليس ملكا للناس فقط ، ولكنه أولا وأخيرا رأى الناس فى المسرح . المسرح هو طاقة تعبى الجماعة الإنسانية عن نفسها لنفسها ، وما الكاتب والمخرج إلا وسائل تعبى .

خذ هذه الرواية إذن - أيها الصديق - على أنها أسهم وعلامات ، وستظل مجرد أسهم وعلامات إلى أن تخلق منها أنت العالم الذى تريده ، إلى أن تجعل أنت الحياة تدب فى كلماتها ، إلى أن تضيف إليها أنت من خيالك وحماسك ومشاركك وتخلقها الخلق الأكبر ، فأنت وحدك القادر على خلقها ذلك الخلق الأكبر .

الفصل الأول

المنظر : حجرة « القعاد » فى بيت مصرى متوسط . وهذه الحجرة لها فى الغالب مكان محدد فى البيت ... فأحيانا تكون فى الصالة ، وأحيانا حجرة مستقلة ، وفى أحيان قليلة تستعمل حجرة نوم الأبوين . وحجرة « القعاد » هى أكثر الحجرات استعمالا ، فالصالون لا يفتح إلا للضيوف ، وأودة السفرة تستعمل للزينة أكثر مما تستعمل لتناول الطعام ، هذه الحجرة هى بؤرة البيت ، فيها يمرح الأولاد وهم أطفال ، وينامون على ركب أمهاتهم وآبائهم ، وفيها أيضا يجلسون إذا كبروا واضعين سباقا فوق ساق يطلبون المصروف بالحاح ، وينظرون باشمزاز إلى الأساس العتيق الذى طالما عشقوه وهم صغار . هى الحجرة التى يستقبل فيها الأصدقاء والمقربون ، ويدبر فيها المستقبل ، ويزاح الستار عن أسرار الأسرة المنيع التى لا يعرفها أحد . والحجرة فى أناتها مريحة كجلباب النوم . الأناقة تحتفظ بها الأسرة للمدخل وحجرة الصالون وكل ما تقع عليه عين الغريب ، أما فى هذه الحجرة فيها كل ما هو غير أنيق ومريح ، الكنبه الأسطنبولى المعتادة ، والصور التى رسمها الأولاد

وهم تلاميذ صغار مثبتة بمسامير إلى الحائط وكأنها
أو سمة مجد ، ولا مانع من حمار مرسوم بالفحم على
الحائط أو عروسة . القلل فى الشباك
(حتى مع احتمال وجود نلاجة فى البيت) فماء
القلة حلاوته لا تقارن عند الأم بأى ماء مثلج ،
هناك أيضا دولاب قديم ضلفه مفتوحة باستمرار ،
ومحتوياته تبدو للعيان، فوتيل مستعمل يجلس عليه
الوالد فى العادة ولكن فى أغلب الأحيان تحتله الأم ،
شماعة ملابس عليها ما لا يقل عن ٥٠ قطعة .
ترايزة كثيرا ما تتناول الأسرة عليها الطعام . ماكينة
غياطة قريبة من الباب . نتيجة معلقة على الحائط لم
تنتزع عنها الأوراق منذ أيام أو لعلها نتيجة العام
الماضى . « كونسول » له مرآة وسطحه من الرخام
الأصلى . دراجة صغيرة بثلاث عجلات إحلتها
مكسورة . ولا يسلم الأمر من حبل غسيل ممتد فى ركن
الحجرة وعليه مناديل وشرابات مغمولة .

الحجرة لها ثلاثة أبواب : باب إلى اليمين
(يمين المسرح) يودى إلى داخل البيت والمطبخ .
وباب فى الوسط يودى إلى الصالة ومن ثم إلى
حجرات النوم . وباب إلى اليسار يودى إلى مدخل
الباب . وهناك نافذة بين باب الوسط وباب اليسار
لها حافة موضوع فوقها أصص زرع ، وبعض الزرع
يطل إلى الداخل . ومن خلال النافذة نلمح مباني الشارع
والمدينة وبالذات نافذة المنزل المقابل .

الوقت في الصباح الباكر ، والساعة حوالى السابعة ، وهنية واقفة في منتصف الحجرة في حالة عصبية ظاهرة منخرطة في نقاش مع « سعد » بينما كوتر واقفة تروى أصص الزرع من قلة في يدها .

هنية أم في الخمسين ولكنها من ذلك النوع الذى يبدو أقل من سنه ، قصيرة القامة ، وتميل إلى الامتلاء ، قمحية اللون ، نادرة الابتسام ترتدى « روب » منزلى مزين بورود قديمة باهتة .

سعد شاب تعدى العشرين بقليل ، ملاحه حادة ووجهه مستطيل نحيف وفيه وسامة . تحس أن فى داخله طاقة متوهجة تشع من عينيه وملاحه، كلماته سريعة متلاحقة ، وكثيرا ما يتوقف عن الكلام فجأة وبلا سبب ، ثم يعود يستأنف حديثه . من الصنف الحامى الذى يريد أن يتحقق ما فى رأسه ، وأن يتحقق فى التو واللحظة . سريع الانفعال ، سريع الملل ، إذا ضحك يضحك من حنجرته فقط ، وإذا تكلم يتكلم من قلبه . تحس من خلال حديثه أنه ساخط على شيء مجهول وناقم على العالم من أجل ذلك الشيء . يرتدى بنطلونا كاكيا وقميصا أبيض .

كوتر فى حوالى الثانية والعشرين ، نحيفة ولونها أغرق من لون أمها وفى ملاعها وسامة وإن لم تكن جميلة ، وأنوثتها مختلطة بقلق وتوهان وعصبية ، وحين تتكلم يخرج صوتها سرحان ناثا ذا نبرة موسيقية ، فيه كثير من اللامبالاة

- ١٢ -

والاستخفاف . كثيرا ما تدندن واللبانة لا تترك
فمها ، وردھا حاضر .

هنية : وإن مت ؟

سعد : إبقى انشا الله فى داهيه .

هنية : وأعمل أنا إيه ؟

سعد : تعملى اللي تعمليه .

هنية : ما أنتم أصلكم جنس جبار وقلوبكم مش منكم .

لو كنت تعبت زبى وحبلت وولدت ورضعت
وسهرت الليالى تداوى وتبكي كنت عرفت إيه قلب
الأم ، إنما أنتم أصلكم جبار قلبه مش منه .. ياخى
بلا نيله .

سعد : اسمعى يا وليه .. كثر الكلام مش ح يفيد .. أنا ليه

دماغ يفكر بيها واللى على كيفى ح أعمله . سامعه
وإلا ما انتش سامعه ؟

هنية : سامعه يا أخويا .. ما تضربلك قلمين وتسكت .

وعلى آخر الزمن بتقول لى يا وليه (ثم بصوت
عال فجأة) بس قول لى بس ، بتعملوا إيه فى
التلارب دى ؟ وبعدها إيه ؟

سعد : وبعدها تحارب .

هنية : وتجننى شايلىك البعيد على نقالة .

سعد : أهر بفضل لك مسعد ومحمد .

هنية : (بلهجة شديدة التأثير) والله ما يمكن ، دا أنت

الى فيهم والله لا مسعد ولا محمد ولا عشرة زى
مسعد ومحمد (تنهمر من عينها الدموع وتواصل

- ١٣ -

الكلام) بقى ريناك وعلمناك وبدل ما نخليك
تشتغل بعد الثانوية زى ابن أم عمود واللا زى
سلامه أفندى ما عمل فى أولاده ، بدال كده صرفنا
عليك دم قلبنا ودخلناك المنزله علشان تيجى فى
الآخر وتبهلنا كده - ! طب إن ماكنش علشانك
أنت أعمل خاطرا لنا احنا . (بتأثر شديد) والنبي
كنت أموت نفسى .. يادهوتى كانت .

سعد : (منفجرا) يا عالم علمتونا الجين .. يا عالم خليتم
الدنيا تركبنا وتهز رجلينا . الأم فى بلاد بره بتشيل
وأنتم هنا شاطرين تكسروا مقاديفنا . طول عمركم
عاشين فى ذل وعاوزين تذولنا معاكم . اسمعى يا
وليه .. ثلاثة بالله العظيم أنا بادر بوح ادرب وح
احارب ، وانشا لله يتهد البيت ده فوق رعوسكم .
(ثم يكمل انفجاره بسكوت مفاجئ وينظر شزرا) .
هنية : (مغيرة طريقتهما) يا ابنى أنا أمك .

سعد : أمى ماتيهطنيش .
هنية : أنا خايفه عليك يا ابنى ، هوده حرام كمان ! قلب
الأم يا ابنى .

سعد : هو مافيش حد له أم إلا أنا ؟ ما الدنيا كلها أمهات .
هنية : لو كنت أم ماكتش تقول كده .
سعد : ولو كل الأمهات قالوا لأولادهم كده ، مين يدافع
عن بلدنا ؟

هنية : غلى اللسى يدافع يدافع يا ابنى ، وخلينا احنا فى
حالنا .

- سعد : وأنا ما اكتشى من اللي يدافعوا ليه ؟
- هنية : أنت ؟
- سعد : أيوه أنا .
- هنية : عشان انت ابنى .
- سعد : وعشان ابنك استخبي فى حضنك ؟ حضنك ما عدشى يسعنى ... أنا كبرت عليه .
- هنية : انت كبرت على حضنى يا ابنى ، إنما حد بيكبر على الموت ؟
- سعد : واشمعنى التانيين يموتوا ؟ هما مش ليهم أمهات برضه ؟
- هنية : بس يمكن أمهاتهم ما بتحجمش زى أنا ما بحبك .
- سعد : أهو ده الحب اللى يكره الواحد فى الحب . حب إيه ده ؟ ذا الكره أحسن منه .. هو ذنبى إنك بتحبنى ؟
- حبنى زى ما انت عايزه بس سيبينى أعمل اللى أنا عاوزة .
- هنية : اعمل كل اللى أنت عاوزة إلا ده .
- سعد : وإذا كان كل اللى أنا عاوزة هو ده ؟
- هنية : ابقى موتنى الأول .
- سعد : (متفجرا) ما فيش فايده ! انتى فى وادى وأنا فى وادى . لا ح أفهمك ولا ح تفهمينى أبدا . يلعن أبو دى عيشه .. تلاته بالله العظيم .
- (صوت من الداخل) ... تلاتة بالله العظيم إن ما سكت وبطلت الدوشة دى على صباح ربنا لا طالع غلى وشك زى قفالك . ساكت والا ماتتش

ساكت ؟

سعد : (فى صوت مغيظ مكثوم) يا شيخنة حتكم المم .

(يستدير فجأة ويخرج) .

هنية : (تندفع وراءه وتنادى عليه ، وحين يختفى خارجا

تزيح كوثر الواقفة عند الشباك بعنف وتستمر فى

نداءاتها) سعد ! خذ يا سعد ! أما أقول لك

كلمة . كلمة واحدة بس وروح زى ما انت عاوز

تروح .

(الصوت الداخلى) : فين كباية الميه السخنة يا

وليه ؟ كل يوم أقول لك حضريها .

هنية : والنبي يا سى سيد تناديله . اعمل معروف نادى

لسعد .. يا سعد !

(الصوت الداخلى) : يا هنية .

هنية : (مزاجعة من النافذة) والنبي ما تسمعنى خير

وحش يارب .. ما أسألكشى رد القضا أسالك

اللطف فيه .

(الصوت الداخلى) : فين كباية الميه السخنة يا

وليه انتى ؟

هنية : (لكوثر) اسمعى يابى .. انتى عارفه أبوكى ما

يعرفشى حاجه عن التداريب دى .. والنبي إن

بزيتى بكلمه له لأكون قاطعه لسانك من سقف

حلقك . إن سأل عليه قولى خرج . فين ؟ ما

اعرفش . ووصى اخوانك . .

كوثر : إن كان علىّ أنا .. أنا مالى هو حر يعمل اللي هو

عاروزه . بس الواحدة لو بصت من الشباك تعلقوا لها
المشقة . الظلم ده كان ليه يارب ؟
(الصوت الداخلى) : يا هنيه ! يا ست هنيه ! يا
مركزه هنيه ! .

هنية : (لكوتر) سامعه ؟ ولا كلمه . روحى انتى صحى
أخواتك .

(لنصار) أيوه .. عايز إيه يا حج ؟
(لنفسها) استر يارب ..
(لنصار مرة أخرى) ما كتابة الميه السخنة عندك
ع الكومودينو ، ده دى !

(الصوت الداخلى) : ولا ع الكومودينو ولا فوق
الدولاب ولا فى جيب البالطو ، ولا عاد لى قيمة
فى البيت ده .. ولا انتى عتتى نافعه ولا شافعه
ولا فضيالى على الطلاق بالتلاته ..

(يدخل نصار المسرح من باب الوسط مرتديا
فانلة بأكمام طويلة ، وسروالا مربوطا تحت الركبة ،
ونظارة بشنير أمريكى مميك ، وهو ضخم الجثة
فى حوالى الستين ، مريع الحركة كثير الالتفات
والتشويح) .

هنية : (مقاطعة) وان كانت ع الكومودينو ؟
نصار : أبقى أقطع دراعى . مش من هنا (مشير إلى
ما فوق الرمخ) من هنا (مشير إلى ما تحت
الكف) . (هنية تدخل الحجرة) .

دى عشت إيه دى ! أصل بغل الحكومة لما بيكبر

بيضر بوه بالنار ... هه .

(يرفع يديه إلى أعلى كمن يهم بلعب تمرينات رياضية لثنى الظهر ومده . ينثنى إلى أسفل ، ولكنه يعتدل فوراً وهو يحسك ظهره بيده) آى ! العوض على الله (يجلس على الكنية) زرجنت مفاصلك يا نصار وكان اللي كان . إلحقينى يا ولىة .. ضهرى وقف .

هنية : (داخلة) الميه السخنة أهه .. أعوذ بالله .

نصار : (يتناولها) يا وليه أنا ح أدرس لك من جديد ؟ مش عارفه لازم تكون دافيه ولازم تكون على ريق النوم .

هنية : وأعمل لك إيه يا حج بس ؟ سخنتها ٣ مرات وانت ما تصحاش .

نصار : أمرنا لله ... أمرنا يا ست هنيه . لازم هيه سخنة وأنا مش حاسس . (يشرب الكوب) يهمك إيه انتى من صحتى . زى ما يقولوا ليس على الجاهل حرج ، وانتى أصلك ما تعرفيش قيمة شوية الميه دول على ريق النوم . والإذاعة الللى انتصبت على الصبح كانت على إيه ؟

هنية : ما كنتشى ولا حاجه .

نصار : سعد ماله ؟

هنية : ما ملوش .

نصار : تكونيش فاكركه تلتين مخى كاهوريا ؟ ماله سعد ؟

هنية : (بتملل) مافيش .. باينه كان عايز فلوس .

- نصار : وعوزته دى لزومها إيه تطير عصافير دماغى على
الصبح ؟ دلعى دلعى .. أنا أكفر كل يوم علشان
أحبب القرش من هنا وانتى تدلعى من هنا . وما
صحتيش ليه لما جيتى الميه ؟
- هنية : قلت أسيبك تنام لك شويه .
- نصار : وسيتينى والا فتحتى المكرفون على الآخر .. انتوا
حواليكم نوم ولا هباب على ؟
- هنية : (تأخذ الكوب القاضى وتخرج وهى تتمتم لنفسها)
يا فتاح يا عليم على الصبح .
- نصار : (يغير لهجته فجأة ويكمل ناظرا إلى الباب الأيمن)
أنا راخر باقول إيه الريحه الحلوه الللى فاحت دى ؟
يا جماله ودلاله وخفة دمه الحبوب المحبوب ملك
قلبى وتاج راسى .. مين صبح على بابا ؟
- (تظهر سومن على الباب وهى تقدم رجلا
وتؤخر أخرى ، تدعك عينيها اللتين لا يزال
يلتزمهما النوم . نصار يهبط واضعا ركبتيه على
الأرض ويفتح ذراعيه . تقبل سومن وجفونها
مطبقة وعلى وجهها غضب لا يعرف مسببه
وتنذف بنفسها فى حضن أبيها بطريقة ميكانيكية
بحة . أبوها يحضنها ثم يقلبها . ويمسح إفرازات
أنفها) .
- نصار : مين حب بابا ؟ .. مين روح بابا ؟ .. مين بوس
بابا ؟ (يصغر خده للتعبيل ، فتطبع سومن على
خده قبلة باردة نائمة ، ثم تنفر منه فجأة ، وتبدأ

- ١٩ -

(فى البكاء)

- سوسن : أنا مالى هه .
- نصار : مالك روحى ؟ بتعطى ليه ؟ مالك سوسو ؟
- سوسن : (تندفع فى بكاء عال)
- نصار : (بقلق شديد) مالك حبوب ؟ مالك ؟
- سوسن : (وهى تسكت فجأة عن البكاء) عايزه حصان .
- نصار : (مقهقهها) بس كده ؟ حصان ؟ حصان وبس حصان وعروسة وعريس ينفع للجميل دهه . حاضر !
- (يفتح درجا فى الدولاب ويخرج منه حصانا من الصفيح على هيئة لعبة) اتفضلى .. حصان حياى من سيق الخيل على طول .
- سوسن : (تعرض عنه) لا .. عايزه حصان كبير .
- نصار : ما هو كبير أهه .
- سوسن : كبير أركبه يا أخى . إيه ده ؟
- نصار : (يقهقه) بس كده ؟ حاضر . النهارده وأنا راجع أجيلك واحد .
- سوسن : (تهكى من جديد) أنا مالى هه .. أنا عايزاه دلوقتى .
- نصار : أمرى إلى الله .
- (يدخل حجرة النوم ويعود مرتديا جلبابا أفرنجيا ومعه مسند) اتفضلى اركبى .
- سوسن : (تهكى) لا ... دا مش حصان .
- نصار : أمال دا إيه ؟
- سوسن : دا مسند يا شيخ .. الله !

- نصار : يا فتاح يا عليم ! ودى يا خويا قايمه م النوم ، إيه
اللى فكرها بالحصنه دلوقتى !
- سوسن : (تكي وتضربه) أنا مالى هه . عايزه حصان ..
هاتلى حصان حالا .
- نصار : ودى مشكلة إيه دى يا ولاد ؟ (تبرىق ملامحه)
عايزه حصان ؟
- سوسن : آه (وتواصل البكاء) .
- نصار : دلوقتى حالا !
- سوسن : آه (وتواصل البكاء)
- نصار : مش تركبيه يعنى ؟ بس كده ؟ حاضر (يسجد
أمامها) انتى ح تلقى أحسن من كده احصنه .
اركبى يا ستى .. اركبى .
- سوسن : لأ .. هه .. أنا مالى .. هو أنت حصان ؟ أنا مالى .
أنا عايزه حصان .
- نصار : يا بنتى والنبي أنا أجدع من ستين حصان .. شايفه؟
أهه . (يمشى على يديه وقدميه كالخيسان
ويستعرض نفسه أمامها . وينهق ويصهل ويضرب
الأرض بقدمه) . آدى الحصنه واللا بلاش . يالله
قبل ما يلعب . ح تركبى والا أنادى أمك تركبى
أكثر ما هى ركبانى ؟ يالله (يصهل) .
- (تدخل فردوس من الباب الأيمن ، جميلة التقاطيع ،
مكتنزة الأعضاء ، عايقة ، شديدة البياض ، ولابد
قد قضت وقتا طويلا فى وضع التواليت تمسك
بمقشة) .

- منها سقفا نايلون .
- فردوس : (تهديد الحائط) إذا كان لسانك شر أنا لسانى
دراع .. وإذا كان ليكى أهل يترد عليهم .
- كوثر : (مخاطب الحائط الآخر) أنا ؟ أنا لى أهل .. إنما
النور يا حسرة على اللى كانوا ييشحتوا لها القرايب
يوم كتب الكتاب .
- فردوس : (للحائط) شاهدين ؟
- كوثر : (للحائط) خيه بالويه . أنا خلصت النص بتاعى
بس لسانى يضرب بالقله .
- فردوس : شوفوا الكذب العلنى يا خواتى .. بقى اللى اكتس
دا النص ؟
- كوثر : الكدابين اترو والنصايين اترو ، وإذا كان على اكتس
ده أكثر م النص بيلاطه كمان .
- فردوس : والنبي أنا مانا كانه إلا لغابة عاشر بلاطه . واللى
مش عاجبه يخطب دماغه فى الحيط .
- كوثر : (مواجهة فردوس أخيرا) بقى شوفى يابت .. أنا
ماليش فى البيت شغل ، واللى بعمله بعمله
بخطرى .. وبقية الأرض تكنسها ورجلك على
رقتك .. دا مش بيتى عشان اشتغل فيه .. أنا إذا
كنت هنا النهارده بكره يمينى عدلى وأروح بيتى .
- فردوس : بكره يمينها علها ! ياخى اسم الله عليكى وعلى
عدلك . إيه الألاطه دى كلها ؟ اللى يسمع كده
يقول الخطاب حفيت .. بكره يمينى عدلى قال !
وبقى لنا عشر سنين على دى الحال ولم يجى

- العدل ولا العريس ظل .
- كوتر : شافين ؟ شافين بنت المركوب بتقول إيه .
- فردوس : أنا أبويا مركوب ؟ أنا أبويا مركوب ؟ والنبي انتى
اللى أبوكى ستين برطوشه قديمه .
- نصار : (داخلا) لا والله وانتى الصادقه سبعين . هم ستين
ينفعوا ؟
- كوتر : شاف يا بابا ؟
- فردوس : وأنا آجى البيت ده عشان أتشتم ويقتى أبويا
مركوب ؟ كان أبويا يا حج مركوب ؟
- نصار : والله أبوكى ما هو مركوب .. أنا اللى ستين
مركوب . حاكم الخلقه النجسه تجيب لأهلها
الزفاره (لكوتر) تسوى إيه إننى أتها أنا دلوقت ؟
انطقى يا صاحبة العصمة انتى . انطقى ! بابت لما
أكملك ابقى راعينى .
- كوتر : (تبدأ فى البكاء) كل مرة تيجى على ؟
- نصار : انتى اللى بتيجى على روحك . حاكم مفيش
أعدى للبنى آدم من لسانه . اللسان عدو الإنسان .
أبوه كده والله العظيم (ينغمها) اللسان عدو
الإنسان . حلوه دى (يقرب من فردوس ويضع
يده على كتفها) وانت يا ست فردوس معلشى .
(يطبطب عليها) الحلاوه دى كلها تنهان فى بيتى ؟
معلشى حقك على . امسحيتها فى دفتى دى .
وآدى راسك ايه . (يهيم بتقبيل رأسها ثم يعدل
ويقبل جبهتها) .

- فردوس : (تنحنى وتقول فى شبه بكاء) والنبي عlishan
عاطرك انت بس يا عم الحج .
- (كوتر تلقى نظرة متوترة إلى أبيها وفردوس ثم
تخرج من الباب الأيسر) .
- نصار : جوزك راح الورشة والا لا ؟
فردوس : من بدرى .
- (يدخل محمد وهو فى العاشرة يرتدى بيجامة
وشعره مشعث ولا تزال به آثار النوم) .
- محمد : صباح الخير يا بابا . أنا جعان عايزين ناكل .
- نصار : وده وش تقول به صباح الخير ؟ فز قوم اغسل
وشك . (محمد يخرج بسرعة ويعود بسرعة وقد
رش على وجهه بعض الماء ويجلس) .
- محمد : أنا جعان .
- نصار : جوع فى عينك .. أنت لازم فى بطنك دود يا ولد
، مش لما يصحى أخوك سعد .
- محمد : أخويا سعد مش ح يصحى .
- نصار : ليه ؟
- محمد : عشان دا صحى من زمان وخرج .
- نصار : وخرج فين ؟
- محمد : الله !! الواحد جعان .. مهو كل يوم بيروح للمسكر .
- نصار : معسكر إيه يا ولد ؟
- محمد : معسكر التدريب .. ما تيا لله بقى .
- نصار : (ممسكا محمد من كتفه) تدريب إيه ؟
- محمد : الله وأنا مالى ، ده دى ! أنا عارف تدريب إيه ..

- ٢٥ -

عشان يحاربوا واللا إيه !

نصار : (يهز رأسه) بقى كده ؟ كل يوم بيروح ..

وعشان النهارده الراحه وأول يوم أفطر فيه معاكم

من زمان عرفت . كل ده يحصل وما أعلمش .. من

زمان بيروح يا ولد ؟

محمد : أظن كده .

نصار : وما قتلش ليه ؟

محمد : انت سألتنى ؟

نصار : سألك البلا . بقى كده ؟ والله عال ! فر قوم انده

أملك .

محمد : يوه ! هو الواحد إذا شفتوه ماتر يحوشى أبدا ؟

لازم روح وهات وجيب وودى .. أعوذ بالله !

والله الواحد يتحجر أحسن .

نصار : فر قوم امشى انده أملك .

هنية : (واقفة فى بابا الوسط) عايز حاجه يا نصار .

نصار : عايز أسالك سؤال .. تعالى هنا . أنا باشتغل فى

البيت ده إيه ؟

هنية : بتشتغل إيه .. إيه . والله ما أنا عارفه بتشتغل إيه .

نصار : إذا ما كتتش اتنى عارفه أنا عارف . عارفه بتشتغل

إيه يا هنية ؟

هنية : إيه ؟

نصار : طرطور .

هنية : يا فتاح يا عليم !

نصار : (بالفجار) ماعو لازم أعرف بالضبط أنا هنا

بشتغل إيه .. لازم حد يفهمنى مركزى فى البيت ده . انتم عاملينى سيم . عاملينى ستاره وبشتغلوا من ورا ضهرى . عايزينى أبقى آخر من يعلم . ازاي يا وليه سعد يخرج كل يوم يتلرب وأنا ما اعرفش ؟ وأسألك ماله ؟ تقوليلى عايز فلوس . دول يومين قاعدتهم على بال ما أدبر له القرشين عشان يسافر مصر ، يقوم يقعد يتلرب فيهم وأنا ما اعرفش ، وتبقى عارفه ولا تقوليليش . أنا لازم أعرف إن كنت أنا هنا الحاج نصار ولا الحاجه عيشه .

هنية : وتزق لى ليه أنا ؟ لما يجى أبقى أعرف شغلك معاه .

نصار : هو المهم أنه يجى يا أفو كاتو المودة والإخاء انت . المهم إزاي يتلرب من غير ما أعرف ؟ . إزاي ؟ . البسى هدومك حالا وروحى دورى عليه وهاتيه يا أختى بابتاعة المهنس بلش .

هنية : أحييه منين ؟ وأنا عارفاه فين .

نصار : على الطلاق بالتلاته .

هنية : ما تحلفش لحسن ودينى ما أنا رايحه .

نصار : ودينك يتفع .. أرمى على بمين الطلاق أرمى .

(يتلفت فيلتقى نظره بمحمد) .

محمد : والله ما أنا عارج من هنا إلا أما أكل الأول .

أكلونى الأول وبعدين انشالله أروح فى داعيه .

نصار : فز يا ولد .

- محمد : والله العظيم ما أنا رايح إلا لما أكل .
 نصار : ما ترمى أنت رايح يمين الطلاق .
 محمد : لا . عيب ! هو انا قليل الأدب علشان أحلف بالطلاق ؟

(يسمع خبط على الباب)

- هنية : (بفرح) هو .. أنا أفتح له .
 نصار : هو . (يجلس على الكنبه ويضع ساقا فوق ساق ويعدل المنظار ويستعد . تسمع فرقعة فبقاب فى المدخل ، ثم يظهر مسعد . يرتدى قميصا أبيض غير نظيف وبنطلونا أصفر وبقابا ، له شارب خفيف) .

- مسعد : (وهو داخل) أبا . أبا .
 نصار : هو اته ؟ ياخى أملا بقلك ذوق وقول صباح الخير .
 شفتش زفت أحوك ؟

مسعد : زفت أخويا ؟ . زفت أخويا مين ؟

نصار : زفت أخويا سعد .

مسعد : زفت أخويا سعد ؟ شفته .

نصار : (بلهفة) فين ؟

مسعد : فين ؟ هنا .

نصار : امتى ؟

مسعد : امتى ؟ امبارح .

نصار : يا جدع شفته النهارده ؟

مسعد : النهارده النهارده ؟

نصار : أيوه .

- ٢٨ -

- مسعد : لا . النهارده .. النهارده ما شفتوش .
- نصار : طب روح دور عليه وهاتھولى دلوقت حالا من تحت طقاطيق الأرض .
- مسعد : من تحت طقاطيق الأرض منين ؟
- نصار : ما أعرفشى .
- مسعد : ما تعرفشى ؟ وأجيبه منين ؟
- نصار : هاتھولى والسلام .
- مسعد : أجيبه والسلام ؟ منين ؟
- نصار : بقولك من تحت طقاطيق الأرض .
- نصار : ياسى مسعد قشظة أخوك ما تعرفشى فين ، اتحرك شوفه راح فين .
- مسعد : راح فين ؟ يمكن لسه نايم مافتشتوش فى أوضة النوم ليه ؟
- نصار : ياخى جك داء البعيد .. فتشنا ومالأفنهش .
- مسعد : يبقى لازم بقى خرج بلدى .
- نصار : أنت جيت الذكاء دا كله منين ؟ طب دانا ما عنديش ربه . واللّه عشت يا نصار وخلفت .
- مسعد : أهو احنا كلمه ياولاد العرب .. نغيب نغيب ونتريق على بعض . يا اخوانا مش كلمه الواحد برضك عنده . إحساسات .
- نصار : ولما عندك إحساسات سايب الورشة وجاى ليه دلوقتي ؟ أنت مش عارف إن اللى هناك صنايعيه ما

- ٢٩ -

يهمهمشى إذا اتنهب اللي فيها ؟ عارف والا
ماتتاش عارف ؟

مسعد : عارف والا مانيش عارف ؟ عارف .

نصار : طب سايبها وجاى ليه ؟ أقطع دراعى مش من

هنا ، من هنا ، إن ما كان زمان نص الغرى اللي

هناك . طار . طار والا ما طارشى ؟

مسعد : طار والا ما طارشى ؟ ما طارشى .

نصار : وجاى ليه أمال ؟

مسعد : جاى ليه ؟ أبوه صحيح جاى ليه ؟ مانت خدتنى

فى دوكة . واحد جه يسأل عليك .

نصار : واحد مين ؟

مسعد : مين ؟ اللي بيجيلك كل مرة .

نصار : مين يعنى ؟

مسعد : مين يعنى ؟ مش عارفه ؟ الراحل اللي بيحصل

الكيميالات . بتاع الشركة اللي شارين منها الموتور .

نصار : نهارك مهيب ! هو احنا لاقين فلوس ندى لحوك ؟

وقلت له إيه ؟ أنا مش قايل لك تقول له إننى

سافرت والامت والا رحت فى داهيه .

مسعد : ما قلت له .

نصار : قلت له إيه ؟

مسعد : قلت له أبويا مش هنا .

نصار : قال لك أمال فين ؟

مسعد : ايش عرفك ؟ دا قال كده بالضبط . قلت له أبويا

مش هنا . ف البيت .

- ٣٠ -

- نصار : جددع ! براوه عليك ! يميمك ! قال لك إيه ؟
مسعد : قال وأدى قاعده لما ييجى .
نصار : وجيت تنلهنى ؟
مسعد : صبح كده ، وجيت .
نصار : شرفت .
مسعد : شرفت ؟ أدى احنا كده ياولاد العرب .. نغيب
نغيب ونتريق على بعض .
نصار : حالا دلوقتى روح قول له أنك جيت لقتنى سافرت
على مصر . اتحرك ! يالله أنا داخل ألبس هلموسى
وأروح أشوف الواد راح فين . انت لسه هنا ؟
(نصار يخرج من الباب الأيمن ، مسعد يتوجه إلى
الباب الأيسر) .
مسعد : وافرض قال أنى مستيه هنا لما ييجى من مصر ؟
أعمل إيه أنا ؟
(تظهر فردوس عند الباب الأيسر) .
فردوس ؟ واقفه كده ليه ؟ ما تخشى .
فردوس : اسمع .. انت ما تكلمينش .
مسعد : ما كلمكيش ؟ يا خويا إيه اللي جرى للناس النهارده ؟
كله ع والحامى ع الحامى . الله ! ما تطولوا بالك
شويه يا جدعان . دى مش أصول دى .. كل شىء
يتحل على رواقه .. ملكو مستعجلين على إيه ؟
الدنيا ما طارتشى . أهى قاعدة على قفا من يشيل
بقى لها ياما ، وياما لسه حاتقعد .. على مهلكو
شويه . مالك ؟

- ٣١ -

- فردوس : أنا ما عديش قعاد فى البيت ده .
مسعد : ليه مش لاقيه كراسى ولا إيه ؟
فردوس : اسمع ! طولة لسان عجش .. يانشوف حته لوحدها يا
أعرف شغلى . أنا مش استنى هنا عشان كل ساعة
أنشتم ويتلعن أبويا ع الجزمة ، وياريتنى على كده
عاجيه . دا أنا هنا خدلمه .. يرضيك كده ؟ دانا هنا
باشتغل خدلمه (تنخرط فى البكاء) .
مسعد : أهو انتى تشوفى لك طريقه إلا البكاء ده . أنا ساعة
ما بشوف حد بيعيط قدامى مزاجى بيتعكر ، ولما
مزاجى بيتعكر ما اعرفشى أعمل حاجة .
فردوس : ومن غير مزاجك ما بيتعكر هو انت بتعمل حاجة ؟
دا أنا كأتى بموزه أبو الهول . (تبكى) .
مسعد : أهو أنا مزاجى أتعكر دلوقتى .
فردوس : ما يتعكر والا يتهيب . دا انت شراية خرج .
مسعد : أنا يابت ؟ دا أنا جوزك .
فردوس : انت جوزى ؟
مسعد : آمال انتى جوزى .
فردوس : والله ما أنا عارفه أنا بموزه مين فى البيت ده ؟
مسعد : مش عارفه بموزه مين ؟ يخرّب بيتك . أنت متحوزه
حد تانى .
فردوس : الجوز هو اللى يحافظ على الواحده وبجميها . وانت
هنا ولا كأنك هنا .
مسعد : ولا كانى هنا ؟ لا ، متزبه صحيح .
فردوس : آمال إيه فايدتك هنا ؟

- ۳۲ -

مسعد : فایدتی هنا ؟ طب دا أنا اللی شایل البیت دا کله وقایم به . أبویا خلاص شغلته دلوقتی أنه یلبس ویجج ویقعد فی أوضة المكتب یقابل الزبائن الهای . انا اللی یعرق وبشتغل . عرقی دا هو اللی یینزل الخشب یمسحه وعلى أجعص بلوک یشقه وعلى رأس المسمار بلقه واحد یدفنها فی اللوح . استنی استنی ! بصی لإیدی دی (یشمر ساعده الأیمن) شایفة دی تخن آیہ ودی رفع إیه . تعرفی دی آتخن لیہ ؟ عشان شایله بیتنا ده کله زی قرن الثور ما هو شایل الدنيا . دی لو اکسرت یدشلس البیت ، ولو عیت بموت البیت . شایفه دی من دی ؟ شایفه ؟

فردوس : (تزیح یدہ) أنا مالی أنا ومال إیدک وتخننها والشغل والورشہ ؟ أنا هنا فی البیت . البیت اللی مالکشی کلمة ولا قيمة فیہ .. أنا حتی ما أقعدشی مع واحد مالوش قیمہ .

مسعد : قيمة ؟ قيمة إیه بقی ؟

فردوس : کلمہ مسموعه ، مرکز ، طلب یمشی ، آی حاجه . دانا اتفقعت مرارتی .

مسعد : اتفقعت مرارتک ؟ أما مالہش حق . یا فردوس دا

بیتنا ح أعمل لی فیہ قيمة والا مرکز علی مین ؟ علی أبویا ؟ علی أخویا ؟ علی أختی کوثر ؟ هنا کلنا سوا سوا . نعيش سوا نموت سوا . وع الخیر والشر سوا ، واتی بقیتی واحده منا ولایم تبقی معانا .

فردوس : مش باقولك شراية خرج ؟ حد منهم يقول زى انت ما بتقول . كل واحد يقول يالله نفس وانت اللي عامل لى جدع وكلنا سوا . والحكاية أنك بتشتغل هنا مرمطون ، وأنا جوزى ما ييقاش مرمطون .

مسعد : المرمطون ، ده يا بعيده هو اللي يشتغل لأغراب . أنا باشتغل لمين ؟ لأخويا عشان يخلص علام ولأختي عشان تجوز . فيها إيه دى ؟

فردوس : فيها أنك صايع وح تفضل صايع كده . وبكره أخوك يبقى مهنس ويخلف ولاد ييقوا أولاد الباشمهنس ، ويجوز واحده تبقى الست وانت ولادك ييقوا ولاد المرمطون ، ومراتك تبقى هى الخدامه .

مسعد : أهو كلامك ده كلام خدامين .. دانت فوقسى الواحد بكلمتينك دول . يا بت هو ضرورى الواحد يبقى قبطان عشان يبقى كويس ؟ ما كويس كده . أنا مبسوط على كده . أخويا مبسوط أنه ح يبقى مهنس .. أنا مبسوط إن أنا اللي بساعده عشان يبقى مهنس .

فردوس : وح ينوبك إيه وح ينوينى إيه م المساعدة دى ؟

مسعد : ينوبنا إيه ؟ هو ضرورى الواحد ينوبه حاجه عشان ينسبط ؟ كفايه أنى بادى من غير ما باحد . فكرك انت ؟ لو مره تعمليها بعقلك وتدى من غير ما تتخذى مش ح تسليها ابدا .

- فردوس : مش ح اسلاها أبدا ؟ الأكاده لسانك معايا زى
 البروه ومعاهم ولا تقدر تقول تلت التلاته كام . يا
 أبو الهول أنت ، احنا لازم نشوف لنا سكن
 لوحدنا. فتح بقى وفوق ! دا انا وقعتى منيلة قوى .
 (يدخل نصار وقد ارتدى بذلة كاملة) .
- نصار : (يلمح الدموع فى عين فردوس) الله ! مالها
 فردوس ؟ مالك يا حبيبتي ؟
- مسعد : أصلها عاوزة يا سيدى .
- فردوس : (مقاطعة) عاوزة إيه يا أبو لسان مزحلق أنت ؟
 اسكت يا خويا لا أنا عايزه ولا مايزه .
 (تخرج) .
- نصار : انت لسه هنا ؟
- مسعد : (وهو يتجه إلى الباب الأيسر) أدبنى ماشى أهه ..
 أدبنى ماشى. كله ماشى . (يخرج لسانه ويتحسس)
 بقى حد يقول على اللسان الحلوه مزحلق يا جدعان
 . (يجلس نصار على الكرسي الموضوع بجوار الحائط
 فى وضع لا يراه الداخل ، وفى نفس الوقت يندفع
 محمد داخلا وساجها مسعد من يده وقد وضعها فوق
 كتفه وتقبل هنية على صراخه) .
- محمد : أهه أهه جبتلكم أهه .. مش جدعته دى ؟
- هنية : وحاي كمان بالقميص مقطوع ؟ أنا عميت من
 كتر لضم الإبر . والله والله ما أنا مده إيدى عليه .
 (ثم لمحمد) انت لقيتيه فين يا ولد ؟
- مسعد : هو أنا إيه ؟ أرنبه ضايعه ؟ ما تسأليني أنا .

- هنية : دا أبوك كان ناقص يهد البيت دا .
- سعد : (مقاطعا) بلا أبويا بلا عمي (أمه تحاول عشا أن تغمز له وتفهمه أن أباه موجود) أبويا ده كان زمان ، دلوقتي أنا أبو نفسي . انا مش عيل صغير ، أنا راجل ، لازم تفهموا كده . ح درب وح أحارب زى ما أنا عايز أنا حرق نفسي . ودينى لاغارب واللى مش عاجبه يشرب من أوسع بحر .
- نصار : ح تحارب مين انشاء الله ؟
- سعد : (ملتفتا إليه ومدركا وجوده ومرتبكا ، يقول وهو يسرع بمغادرة الحجرة من الباب الأيمن) لا مواخذه يا بابا ما كنتش أعرف انك .. لا مواخذه .
- نصار : تسمح كلمه يا بيه ؟
- (سعد يتوقف دون أن يلتفت) .
- كنت فين ؟
- سعد : (وهو لا يزال موليا ظهره وينظر بوجهه فقط) كنت كده (يشيح بيده) .
- نصار : (مقلدا إشارة سعد) كده فين ؟
- (هنية تأخذ كوتر وسوسن إلى الداخل) .
- سعد : فى المعسكر .
- نصار : معسكر إيه ؟
- سعد : (ملتفتا بكليته ورأسه إلى الأرض) بتدرب .
- نصار : بتدربو إيه ؟
- سعد : بتدرب ؟ حرب العصابات والتكيك العنيف .

نصار : عصابات وتكتيك عنيف ؟ فكرك يخيّل على أنا الكلام ده ؟ أقطع دراعى مش من هنا .. من هنا .. أن ماكت بتضحك علينا ونروح حتة بطاله أنت وصاحبك المصوراتى الصايغ اللى ساكن على السطوح ، والا الواد صاحبك ده اللى اسمه سامح ، والا هباب والا بتشربوا خمره والا بتلعبوا قمار .

يا بابا . : سعد

نصار : بلا بابا بلا ماما . أنا اصلى ما يعجبنيش كلمة بابا دى . كنا زمان بنقول لأبهاتنا وكنا بنحترّمهم دلوقتى بتقولولهم يا بابا ويتضحكوا عليهم . انت شايف الجرح اللى فى رجلى ده اللى طوله ثلاثين سنتى ، ده عشان وأنا راجل قدك كده اتأخرت مرة بعد العشا بربع ساعة ، فمسكنى أبويا وعمى الله يرحمهم ويدشّش الطوب اللى تحت رأسهم ، وفضلوا يضربوا فيه لغاية أدان الفجر ، ازاي تعمل عمل زى ده من غير ما تقول لى ؟ ازاي ما تعمليش اعتبار ؟ ومين يضمن لى أنك بتروح المعسكر ؟

سعد : يا بابا إن ما كنتش مصدقى اسأل ماجد وعبد الفتاح وسامح .

نصار : أسألم ؟ أسألم دا انتم حتى بقيتم زى البنات . الواحد يسأل البنت أنتى كنت فين ؟ تقول كنت فين ؟ تقول كنت مع فلانة صاحبتى . ويروحوا يسألوا صاحبتها تقول كنت مع فلانة صاحبتى . والاثنين كانوا راندغو . أسألم ؟ أنت فاكرنى داقق عصفير ؟ بص لى كويس . شايف هنا عصفير ؟

- سعد : يا بابا أقسم لك بشرفي .
- نصار : زى ما أقسمت لى بشرفك إن كتاب الماتيماتيكيا والا اسمه إيه ثمنه عشرة جنيه ، وإنه لازم قوى أن ما جبتوش تسقط ، وأروح أسأل ع الكتاب ألاقيه مصلحه فى وزارة الأشغال .
- سعد : يا بابا ..
- نصار : تعال هنا . بقول لك تعال هنا (يتقدم سعد ويقف نصار) شمنى بقلك . ورنى صوابك . طلع المنديل .
- سعد : اسمح لى دى إهانه يا بابا .
- نصار : هو انت لسه شفت إهانات ؟
- سعد : يوهوه .. دى مش عيشه دى . (يسرع فى اتجاه الباب الأيمن) .
- نصار : تعال هنا . أنا خلصت كلامى ؟ تعال هنا (سعد يقف عند الباب) إيه حكاية التدريب دى اللي طلعت لنا فيها على آخر الزمان ؟
- سعد : أنا ما طلعتش فيها ولا حاجه .
- نصار : بقدر بوا ليه ؟
- سعد : بنستعد .
- نصار : لأيه .
- سعد : زى ما انت شارى المسلس الجديد اللي جوه ده ، شاربه لأيه ؟
- نصار : لما أسألك بتحاوبنى بس ، والمسلس ده ينفع يخوف .
- إنما اتتم إيه حكايتكم ؟

- سعد : الله ! انت مش عارف يا بابا ؟ إيه يا خويا ده ؟
بنستعد للمعركة .
- نصار : معركة إيه ؟
- سعد : الله ! ما انت عارف كل حاجه يا بابا . مش
عاوزين يهجموا على مصر عشان أئمننا القتال ؟
- نصار : وعشان أئمننا القتال يهجموا علينا ؟
- سعد : انت يتسألنى أنا ؟ ما تسألهم هم .
- نصار : هم ؟ هم البعدا لو كانوا عاوزين زى انت ما بتقول
يهجموا ما هجموش ليه من زمان ؟ ما عملوهاش
ليه من ساعتها ؟ مستنيين إيه ؟
- سعد : يستعدوا .. فاحنا رخرين لازم نستعد . الله انت
مش عارف يا أخى الحديث اللى بيقول : وجهزوا
اليهم ما استطعتم من الخيل .
- نصار : أولا أنا مش أخوك أنا أبوك . ثانيا لما نجيب سيرة
الحديث لازم نقول الحديث الشريف . ثالثا ده مش
حديث دى آية قرآنية معروفة كالشمس . رابعا يا
خويا انت تعلمت الديانة فين ؟ فى بار
اللوا ؟ دا أنا لو طلبت من الخواجه ماستوكلى أنه
يقول الآية دى كان قلها مظبوطه . ولا أخلاق ولا
دين ولا حاجه أبدا . صحتها باباشمهنس : وأعدوا
لهم ما استطعتم من قوة ومن رباط الخيل ترهبون به
عدو الله وعدوكم) صدق الله العظيم . والكلام
ده يبقى صحيح لما يكون فيه قدامك عدو انت
شايغه وهو شايغك - انما هم فين الأعداء دول ؟

- سعد : فى قبرص وإسرائيل وبريطانيا .
- نصار : ماهم طول عمرهم فى قبرص وإسرائيل وبريطانيا .
- ماهجموش علينا ليه ؟
- سعد : أصل شوف يا بابا .. احنا استقلينا دلو قسى وبدينا نقوى ، الاستعمار مش عايز كده ، عايزين يرجعوا تانى يحتلونا .
- نصار : ولما هم يا حضرة عايزين يرجعوا كانوا طلّعوا من هنا ليه ؟
- سعد : احنا طردناهم .
- نصار : أنتم مين ؟
- سعد : احنا الشبان والرجال اللى زى كده .
- نصار : الشبان اللى زيك اللى كل اللى يقعدوا عليه أنهم يسببوا شعورهم ويصصبوا للبناات ؟
- سعد : أيوه ، هم دول بالضبط . بس هم دول اللى طلّعوا الإنجليز . احنا الجيل اللى هزم الإنجليز ، واحنا اللى ح نردهم برضك ونهزمهم إذا فكروا إنهم يرجعوا تانى .. ماتسينا نهزمهم .
- نصار : انت تهزمهم ؟
- سعد : كلنا نهزمهم .
- نصار : حد ييجى يابنى قدام القطر ويصدر له ؟
- سعد : احنا القطر .
- نصار : يا شيخ اتلهى . الجيل بتاعنا قال ! عايزين تصلحوا الدنيا وانتم نفسكم عايزين تصلح . الأعداء اللى

بتقول عليهم دول مش فى قبرص ولا دياولو . يا شيخ أعداءك وحياتك هنا (مشيرا إلى صدر سعد) جواك . ابقى الأول أدرب على حرب العصابات اللي هنا انت فطرت ؟ يا هنية هاتى لسعد يفطر .
(يكمل الجملة وهو خارج) .

سعد : ما فيش فايدة . عقول جمدت على كده خلاص وربطت . الأعداء هنا قال ؟

هنية : (تدخل حاملة طبقين فى صمت وتضعهما على القريزة)

سعد : شيلي اللي أنت اللي حاياها ده مش فاطر . (يخرج سيجارة ويشعلها) .

هنية : وسجاير آيه دى رخره كمان ؟

سعد : وحشيش وخمره وأى حاجه ح اعوز أشربها ح أشربها . عايزه إيه بقى ؟

هنية : هى عين وصابتك ؟

سعد : بطلوا تخريف بقى . (يمسك كوبا من فوق الكونسول ويقذفه إلى الركن بعنف فينكسر) .

بطلوا تخريف بقى ، احنا عايشين فى عصر الذرة ، وانتم تقولوا الأعداء هنا ، الأعداء هناك فى قبرص وإسرائيل وحلف بغداد واحنا لسه هنا .

هنية : أعداء مين يابنى إن شاء الله العلوين اللي يكرهوك .

سعد : أنا عارف أعداء مين (مخاطب أمه) فيه صحيح أعداء هنا (مشيرا إلى صدره) بس دول ظل للأعداء اللي بره ، الواحد بيبقى مكار ليه ؟

عششان. الأعداء هم اللي علموه بمكر عششان ينتصر عليهم بيبقى أنانى له ؟ عششان عدوه أنانى . أعداءنا اللي جوانا هم الاستعمار برضك . هم الإنجليز . وإذا غلب الأعداء اللي بره . حنغلب ظلمهم اللي جوه . ومفيش طريقه لقهر اللي جوه إلا بالقضاء على العدو اللي بره . النفس أماره بالسوء له ؟ لأن العدو أمار بالسوء .. إبليس والشيطان هم العدو ، فاهمين ؟

هنية : أعوذ بالله من الشيطان الرجيم يابنى . انت جرى لك إيه ؟ افكر مين بص لك وانت خارج عششان أرقيك بمخته من هلومه .

سعد : ولا انتي فاهمه ولا حاجه ! ويرضه الأعداء عندك هم المصريين اللي زيك اللي بيعسدوا قال . ارقيني من الأمريكان والإنجليز . ياباى ! والله أنتو عايزين وباء .. طول ما فى مصر ناس زيكم حانفضل وراء العالم بمليون سنه .. شيلي الأكل ده بقول لك .

فردوس : (تظهر على الباب) ح نطبخ إيه ياتينه النهارده ؟

هنية : (بزعيق هائل) سم هارى .

فردوس : دا أتبن بختى مايل قوى (تحضى) .

سعد : أوعى سيني ! علو عاقل أحسن منكم والله ، والا حتى

بجنون . دا اتسم أيه ؟ اتسم عيب . أخلاق عيب وفلسفة

عيب . حتى ربنا بتعبده عن خوف . كل عيشتكم

ليها محور واحد بس هو الجبن ماتبصليش كده أنا مش

بجنون والا برج من عقلى طار . امتى بقى حتمسيو

الخوف الأزل ده ؟ امتى حتمحركوا وتبقوا بنى

آدمين ؟ عشتهم مزلولين وعانيزين تزلونا معاكم . قول ؟

جيبالى فول ؟ كل عيشتكم فول . زى ما الحب بتاعه
مهري فى الطبق وراكد ومستسلم ، اتم كنه .

هنية : أسمع يا وله . أنا ساكتالك م الصبح ، إنما ودينى
وما أعد .. (تنظر إليه بوعيد شديد) .

سعد : (بتحد) ودينك إيه ؟

(هنية لا تنطق وتظل تحديق فيه برهة ثم تستدير
فجأة وتسرع خارجة) مفيش فايله دى عقول
متحجرة . (سعد ينتظر إلى أن تخرج ثم يقف فى
مكانه مرددا برهة ثم يتوجه إلى النافذة ويحدق
من خلالها ويتلفت حوله ليتأكد من أن أحدا لا
يراه ثم يصفر صفارة خاصة ويشير بيده وكأنه
يخاطب شخصا ما عبر الشارع) هاللو . (ثم
لنفسه) يا سلام ! البت احلوت قوى .. وعامله
شعرها كده ليه ؟ (بصوت عال) عامله شعرك
كده ليه ؟ زعلانه ؟ طيب معلشى . أصل امبارح
كان عندنا تدريب . أبوه ، كفا سلاح ، جنبنا
سلاح ، وبتا هناك . أشوفك طيب النهارده . (ثم
لنفسه) الله يخرب بيت مخك . (يسأى يديه
إشارات عصبية على أنه يريد أن يراها اليوم) ..
النهارده عايز أشوفك النهارده .. أنا (يشير
بأصبعه) .. وانت (يشير بأصبع اليد الأخرى)
تقابل (يضم الاصبعين معا) .. ماتيش فاعمه ؟
(لنفسه) إيه غباوة بنات الأيام دى أعوذ بالله !
(يتلفت ثم يرفع صوته ويقول بالإنجليزية أريد أن
أراك اليوم) .. أبوه الساعه ستة . هناك برضه .

أيوه سته ، واحد اثنين تلاته أربعة خمسة سته ،
بوسه بقى .. بوسه عشان خاطر بابا .

(يدخل نصار من الباب الأيمن ، ويقف على الباب
دون أن يلاحظ سعد) عشان خاطر باباك . طب
عشان خاطر باباى أنا . هه ! (يقبلها فى الهواء)
(ثم لنفسه) واللّه الأبهاى لهم فايده أهه ! استنى ..
استنى يا مجنون . (يضرب الهواء بيده فى فروع
بال ، ثم يلتفت فيفاجأ بأبيه واقفا) اللّٰه !

نصار : هو ده التكيك العنيف والا إيه ؟

سعد : اللّٰه انت هنا من زمان يا بابا ؟

نصار : م الساعة سته .

سعد : دى أصلها .

نصار : ولا أصل ولا فصل ولا لزوم للشرح ، ح تقول إيه ؟

بس يعنى كنت دور على بنت من حة ثانية . ما
حليتشى فى عينك إلا بنت عمى أفندى ؟ الراحل
صاحبنا طول النهار قاعدين ع القهوة مع بعض . ثم
بنته يعنى .. يا شيخ .. جتك البلى دى مناخيرها تسد
حاره .

سعد : طب ، طب ، طب ، خلاص . (يقول هذا وهو

يفادر المسرح من الباب الأيمن) .

(ينتظر نصار إلى أن يختفى سعد وينظر من الشباك
ويخرج لها لسانه ، فى تلك اللحظة تدخل هنية)

هنية : بتعمل إيه يا نصار ؟

نصار : بعمل إيه إيه ؟ بلم مصايكم ، إيه اللي كسر
الكبايه دى ؟ على الطلاق بالتلاته ما أنا شارى
بدلها .. انتم لكم كل يوم دسته . دا بالطريقه دى
يتخرب البيت خراب مستعجل .

(تقرب هنيه من الركن وتهمك فى لم أجزاء
الكوب) .

نصار : إيه اللي كسرها ؟

هنية : وقعت منى .

نصار : وقعت منك ازاي ؟

هنية : غصب عنى .

(هنا ترفع قامتها فتلمح الفتاة فى النافذة المقابلة
فتنظر إلى نصار ثم إلى الفتاة مرة أخرى وتقول) .

هنية : نصار !

نصار : مالك يا وليه !

هنية : نصار !

نصار : جراك إيه ؟

هنية : (لنفسها) يكونشى الراجل باناس ؟ أصل جنس
الرجاله ده لما بيكبر بيخرف (ثم لنصار) البت
دى واقفه متسمره فى الشباك ليه ؟

نصار : وايش عرفنى أنا ؟ بتسألينى ليه ؟ بنات ملاديع ..
تلقاها واقفه مستنيه حد يعاكسها .

هنية : (بعد فترة صمت) حج !

نصار : أخ .. يا فتاح يا عليم .. يا ستار يارب .. تعرفى
أنك لما بتنادينى كده ركبى بتسيب .. يا وليه على

أية عقدة البوز دى كلها ؟ ثلاثين سنه مجوزك
ماضبطكيش مره متلبسه بضحكه . أنت حد حاكم
عليكى بالحزن المؤيد ؟

(هنية تهيم بالبكاء) طيب أنا غلطان ، حاكم أنا
عارف البكا عندك كيف ، مزاج ، أفيونه . لازم
تغيرى ريقك على طورة . دانتى بتعمللى كل
المقدمات دى عشان تعيطى بس ..

هنية : مانا اللى أستاهل .. أنا بيعط عشان مين ؟ مش
عشان بلاويكم . انتم كل واحد عايش على كيفه ،
وإذا ضحك ضحكة يضحكها بره . وإذا زعل والا
اشفاقى ما يلقاش حته يزعل فيها إلا هنا . المهم كله
أنا شايلاه ، كنت أذنبت يعنى ؟ عشان إيه دا كله
يارب ؟ وما يتوبنى إلا طولة اللسان بتاعتك .

نصار : الدرس الدينسى ده أنا حافضه كله وسمعتة مليون
مره ، ومستعد أسمعه بالكلمة الواحده .. فيه إيه ؟

هنية : سعد .

نصار : ماله ؟

هنية : آمال كآن بيكلم مين ؟ كان بيكلمنى ؟ أنت عايزه
ييجينى البعيد منشال على نقاله ؟ أعمل حسابك قبل
ما يحصل ده لازم تموتنى الأول .

نصار : به . به . به . يا فتاح يا عليم ! بقى كله خلاص
موتيه وحطتية على النقالة وعايظه تموتنى نفسك
رخره ؟ ياخويا الستات دول عندهم التشاؤم بالسليقه .
بقى الولد يلدرب ، فانت خلاص أعلتتى الحرب
وحبتي العساكر وانضرب سعد ومات . أعوذ بالله !

- ٤٦ -

- هنية : آمال يلدرب ليه مش عشان يحارب ؟
- نصار : يحارب إيه يا وليه ؟ هى فىن الحرب (سوسن تدخل من الجانب الأيمن) تقدرى تقولى لأملك فىن الحرب يا سوسن .
- هنية : آمال يلدرب ليه ؟
- نصار : عشان فاضى . عشان مش مضطر يأكل عيله . عشان لاقى صحابه بيعملوا كده . عشان فرحان بالتنقيه فيها إيه دى ؟
- هنية : فيها أن لما تقوم الحرب ح يجييوه يحارب .
- نصار : لما تقوم الحرب .
- هنية : ماهى ح تقوم .
- نصار : وايش عرفك با فيلد مارشال هنية ؟
- هنية : يا خوية بلا نيله .. الجرائين مليانه والناس يتكلم .
- نصار : على الجرائين تملطى والناس تتكلم . حد يصدق كلام الجرائين ؟ دا من قبل ما تخلص الحرب العالمية السلى فانت وكل أما الواحد يفتح جرنان يلاقى فيه أن الحرب العالمية الثالثة على الأبواب .
- دا من سنة ٤٥ الكلام ده ، وفاتت سنين وستين ولا جت الحرب على الأبواب ولا طلبت . دا اللى يصدق كلام الجرائد ده يبقى مخه ورق .
- هنية : أنا قلبى من جوو حاسس . أفرض يعنى قامت .
- نصار : قلبك من جوو ده تنبؤاته زى تنبؤات مصلحة الأرصاد تمام . وإذا كان يقول كده فيبقى مش ح تقوم أبدا . حرب إيه يا ناس اللى ح تقوم ؟ العيال

- بتهيص بره أهه ، والدنيا صافيه زى الفل ، والناس كل واحد مشغول بلمقمته ، ويقولوا الحرب ح تقوم !
 (وهى خارجة) أنا قتللك أهه ، وبكره تقول قالتها .
 هنية :
 نصار : روحى يا شيخه جك داء الحرب .
 سوسن : بابا . يعنى إيه الحرب يا بابا ؟
 نصار : يعنى إيه إيه ؟ ربنا ما يوربها لك بابتنى .
 سوسن : ليه يا بابا ؟ بس قول لى يعنى إيه ؟
 نصار : انت عارفه يا سوسن يوم القيامة ؟ أمك ما قاتلكيش عليه ؟ لما بتنبك الأرض وتبرق السما وتبقى الجبال كالعهن المنفوش ؟ أهى الحرب لما تقوم تبقى القيامة قامت .
 سوسن : خليهها تقوم يا بابا .
 نصار : تفى من بقلك . ليه بابتنى ليه ؟
 سوسن : عشان أفرج على يوم القيامة .
 نصار : ربنا ما يجعلنا نوعاها يا بنتى ، ولا أنت نوعيها ، ولا ولاد ولاد ولادك يوعوها .. ربنا ما يورك يا بنتى .
 سوسن : لالا . خليه يوربنى يا بابا .
 نصار : إلاه يا سوسن .. روحى بالله ! روحى العبى ..
 يالله روحى ! .
 سوسن : أخص عليك يا شيخ - انت كل واحد تزعق له ؟
 إيه ده يا شيخ ؟ دا انت خسرت خالص .. هه ، أنا خاصصاك .

(تخاصصه بأصبعها الصغيرة ثم تخرج)

(يسمع فيقاب مسعد ثم يدخل)

- مسعد : أبا . أبا .
- نصار : مالك ؟
- مسعد : مالي ؟ جرحس أفندي مندوب الشرکه .
- نصار : ماله ؟ مش قلت له أنني سافرت مصر .
- مسعد : قلت له . قال لي حتى لو كان راح الصين مانيش منقول م الورشه إلا لما ييجي .
- نصار : وعملت إيه ؟
- مسعد : عملت إيه ؟ جيت أقول لك .
- نصار : بقي بزمك مش مكسوف من نفسك ؟ انت بنى آدم أنت ؟ ما طردتوش بره إيه ؟ مامسكتش القيدوم وخبطته خبطتين على نافوخه إيه ؟ والنبي واللى نبى النبي أقطع دراعى من هنا هه ، أنك جحش .
- مسعد : جحش ؟ أنا مش المره اللى فاتت مسكت له القيدوم وطلعت بره قلت لي تمسك له القيدوم إيه يا جحش ؟ بقي إذا مسكت له القيدوم أبقي جحش ، وإذا ما مسكتش القيدوم برضه أبقي جحش ؟ والنبي جحش صحيح اللى يسمع كلامك . جحش ابن جحش ..
- نصار : اخرس ! غور من وشى ، جتك البله .
- مسعد : تعرف يا أبا ؟ أنا مش جحش . أنا حمار . أنا أقل حتى م الحمار .. حتى الحمير بترفض . أنا اصلى حمار ابن ناس ما برفضشى . (يستدير ومعضى إلى باب الوسط) .
- نصار : انت زعلت يا مسعد ؟

مسعد : (وهو مختوق بالبكاء) الله يساعذك .
 نصار : (يمضى إليه ويأخذه تحت إبطه الأيمن) اخصى عليك يا مسعد . حقك على .. معلشى . فين سعد ؟ الظاهر انى خسرت خالص زى ما بتقول سوسن . مزعلك ومزعلها ومزعل سعد وكوثر ، وحتى محمد رايخر مزعله ، وأزعلكم على إيه ياولاد ؟ حد ضامن الموت من الحيا ؟ ماتزعلوش . تعال يا مسعد . (يأخذه تحت إبطه الأيسر) فين سعد ؟ يا سعد . تعال يا سعد ، يا سوسن . تعالى يا كوثر .
 (يقبلون على دفعات مزددين فيضمهم تحت إبطه الأيسر ويتقدم بهم ومسعد إلى منتصف الحجرة) تعالوا يا ولاد ، انتو زعلانين منى ؟ أما أنتو مالكوش حق صحيح . أنا أبوكو برضه ياولاد .. وانتو أولادى . دا احنا عيله ياولاد ودى أمكم . (مشيرا إلى هنية التى تقف عند الباب) عارفين يعنى إيه عيله ؟ دى عيلتنا ياولاد ، انتم لمتنا وكترتنا وبركتنا . (يقبلهم جميعا) اخصى عليكم ، أنا ليه مين إلا انتم ؟ وانتم ليكم مين غيرى ؟ أهو أنتم ولادى وأنا أبوكم . وحش أبوكم ، كويس أبوكم . وانتم تزعلوا منى ولادى ، تطيعونى ولادى ، تعصونى برضك من صلبى . ربنا يخليكم ! ربنا ياخذ من عمرى ويضيف لأعماركم ! ربنا يشقىنى ويسعدكم ، ويعربىنى ويكسيكم ، ويحرمنى . ويكفيكم ، ويقعدنى

- ٥٠ -

- ويوفقكم . يا أعز أحباب فى الدنيا ، يا ولادى .
الأولاد : (فى وقت واحد) الله . الله ! ماتقولشى كده يا بابا . احنا ولادك وانت أبونا . أحسن أب فى الدنيا أبونا .
- محمد : (يقبل من الخارج فى اندفاع عظيم) بابا .. بابا بابا يقولوا اليهود هجمت يا بابا . والحرب قامت والله العظيم .
- (يحل عليهم الوجوم ثم لا تلبث جماعتهم أن تتفرق وينظر نصار إلى محمد ثم إلى بقية أولاده بلهول) .
- نصار : بتقول إيه يا غراب البين أنت ؟ حرب إيه ؟ احنا فى إيه والا فى إيه ؟
- سعد : شفت يا بابا ميش قتللك أهى الحرب قامت .
- سوسن : صحيح ؟ صحيح يا أبيه ؟ سامع يا بابا . هيه . هيه . يا حلاوة يا عيال .. يا حلاوة يا عيال ..
- القيامة قامت .

(مستار)

الفصل الثانى

المنظر :

قطاع طولى فى بيت العائلة ، يشمل حجرة نوم والوالدين إلى يمين المسرح ، وتحتل الصالة المنطقة الوسطى الكبرى من المسرح ، بينما يحتل المدخل الجانب الأيسر .

حين يرفع الستار تبدو الصالة فقط بينما الجزآن الآخران (المدخل وحجرة النوم) تحجبهما ستائر داخلية تفتح حين تنتقل إليهما الأحداث فى جزء متقدم من الفصل .

الصالة مستعملة حجرة طعام ، فى المواجهة يفتح عليها باب يودى إلى حجرة مسعد وزوجته ، إلى يمينه باب على شكل « أرش » يودى إلى المطبخ وبقية أجزاء البيت .

فى الصالة كل معدات حجرة الطعام التى تستعمل للزينة أكثر ما تستعمل لتناول الطعام . وإن كان قد أصابها القدم وشاخت .

بين باب حجرة مسعد والباب المؤدى إلى المطبخ توجد ساعة حائط غريبة الشكل تبدو وكأنها أول ساعة حائط صنعت ، وإن كانت لا تزال تؤدى عملها ولا تزال دائرة ، أسفل الساعة توجد حقيبة يعتر بها الحاج نصار كثيرا ولهذا يعلقها فى هذا المكان المرتفع . الحقيبة قديمة جدا ومصنوعة من الخشب ويطل منها منشار علاه الصدا .

حين يرتفع الستار فجد سعد وسامح يقفان فى المدخل أمام الباب الخارجى يرتديان القمصان والبنطلونات . سامح شاب طويل نحيل أطول من سعد كثيرا وله « قتب » ويرتدى نظارة طبية سميكه ، وتحس من ملابسه وطريقه حديثه أنه كما يقولون « ابن عيلة » أى أنه ابن عائلة أغنى قليلا من العائلات المتوسطة .

- الوقت حوالى التاسعة والنصف مساء -

- سامح : تفكر نوصل هناك امتى ؟
 سعد : ح نقوم من هنا الساعة اتنين ، أظن نوصل هناك ع الصبح .
 سامح : ياخى قول ح نوصل ع الضرب على طول .
 سعد : حد عارف يا سامح ؟
 سامح : بس الواحد مش فاهم حاجه .. أزاي المحجوم اليهودى دا يحصل ، وإيه حكاية الانذار دى ؟
 سعد : شوف . دلوقتى انت مش مدنى ، انت راجل عسكرى ما عليك إلا التنفيذ .. مش شغلنا نناقش دلوقتى . أمر ناسفر العريش لازم ناسفر .. اضربوا نضرب .

- سامح : وإذا قالوا موتوا برضك نموت ؟
 سعد : مش دى اللحظة اللي بنستعد لها من زمان ؟ أهى جاتلك لحد عندك .. سامح ياك تكون خايف ؟
 سامح : أنا ؟ هو ده معقول ؟ أخاف من إيه ؟ دكها ح يكون معاه بتدقيه وأنا معايا بتدقيه ح أخاف منه

ليه ؟ (يضحك وكأنه قد تذكر شيئا) مش أنت
اللى كنت دائما تقول أن الإنسان يجب أن يكون
أشجع ، الحيوانات ؟ والحيوانات ما بتخفشى من
بعضها .. عمر أسد ما يخاف من أسد ، ولا القطعة
بتخاف م القطعة ، فاشمعى الرجل يخاف من راجل
زيه ؟

- سعد : (هتسما) تخاف ليضربك .
سامح : (بحماس) اضربه قبل ما يضربنى .
سعد : يمكن هو اللى يضرب الأول .
سامح : أنا اللى أكيد ح أضرب الأول .
سعد : تضمن متين ؟
سامح : لأن هو اللى ح يخاف الأول ، واللى يخاف الأول
رصاصته تطلع الآخر .
سعد : وايش ضمانك أن رصاصته تطلع الآخر ؟
سامح : درر صديقى سعد الغالية .
سعد : درر إيه ؟
سامح : مش فاكرو الضهر واحنا بناكل سنلوتشات من
الكاتين ، وانت متحمس وبلك ملىان طعميه
وبتقول : أنا مش ممكن أخاف أنا الأقوى ؟ هو
جاي يسرق بلدى وأنا بدافع عنها ؟ هو غريب وأنا
فى أرضى ؟ هو يجارب بماهيمه وأنا يجارب بليمان ؟
هو اللى ح يخاف الأول ؟
سعد : لا ، براقو ! جدع يا سامح ! قد نصبتك فارسا
على العريش فاركع وتقبل بركاتى .

(يركع سامح) أذهب فأنت فارس . إنما قول لي ،

بزمك مش خايف بجد ؟

سامح : (بعد أن ينظر إليه مليا من فوق نظارته) شويه وانت ؟

سعد : أبدا .. أيدى أهه .

سامح : وتفتكر أنا جبان عشان خايف شويه ؟

سعد : (بعصبية) جبان ؟ إيه الكلام الفارغ ده ؟ داهم

شوية الخوف الصغيرين دول هم الشجاعة . أنا مره

واحد قال لي إن شوية الخوف دول هم اللي بيعملوا

أشجع الشجعان ، هم المصل اللي ضد الجبن ، زى

الواحد ما يياخد جرعة مرض صغيره فتديلو مناعه

ضد المرض الكبير . اذهب يا بنى فأنت فارس

العريش بلا نزاع .. بس إياك ، باباك ما يزعلش .

سامح : بابا ؟ انت مش عارفه ؟ دا لما غبت عن التدريب

يوم كان حايطر دنى من البيت . دا راجل واحد

الحكاية جد قوى .. الظاهر من كتر قراءته لروايات

الجيب .. طول النهار قاعد يقرأ فيها وسايب زباين

الأجزاء .. دا أنا أن ما كتش أسافر يمكن

يضربنى بالنار .. والله يعملها بعقله . دا ملك

منظمه سيده ، اسمع ! ما عندناش وقت ، أنا

مسروح وحافوت عليك واحده ونص غم ..

أصفر لك تطلعلى على طول . أوكى . سعيده بقى .

سعد : سعيده يا سامح .

(سامح يأخذ طريقه هابطا السلم ثم يتوقف)

- ٥٥ -

ويلتفت إلى سعد) .

سامح : (بصوت مرتفع) تحيا مصر ياسعد .
سعد : وطى حسك . (ثم بصوت منخفض) تحيا مصر
يا سامح .

(يخفى سامح ويدق سعد جرس الباب الخارجى
فيخرج مسعد بجلباب النوم من حجرته ويوقد نور
الصالة ويفتح الباب) .

مسعد : سا الخير يا ياشمهنس .
سعد : (يرد بهز رأسه) بابا نايم ؟
مسعد : نايم قوى .
سعد : (متوقفا فى الطريق إلى الباب الأرض) مسعد
مسعد : خيم .

سعد : احنا مسافرين الليلة الميدان . وأنا وأنا ..
مسعد : الميدان الميدان ؟ ح تحارب يعنى والا إيه ؟ دى
الظاهر بقت جد . دا مراتى عندها حق . مسافر
صحيح ؟

سعد : آمال بنلعب .
مسعد : طب بقى ماتسبينش خدنى معاك .
سعد : يا أخى أعقل . انت فاكرها إيه ؟ دى حرب ،
حرب ، الحرب يا اخوانا . الحرب اللي عمالين
نستناها ونلرب لها .

مسعد : وأقعد أنا هنا أعمل إيه ؟
سعد : بس أنا عايز آخذ رأيك فى حاجه يا مسعد .
مسعد : مسافر الليلة الليلة ؟

- ٥٦ -

- سعد : بقول لك عايز آخذ رأيك في حاجه .. أقول لأبويا
والا ماقولوش .
- مسعد : الحاج نصار ؟
- سعد : أيوه .
- مسعد : وانت يعنى إذا قلت له يسبيك ؟
- سعد : مافيش قوة تقدر تمنعنى .
- مسعد : إلا أبوك دا عنده قوه ذريه ، والله ما يعرف لو
قطعت رقبته مايخليك تخطي العتبه .
- سعد : يعنى أسافر من غير ما أقول له ؟
- مسعد : خللى دى على أنا .. دى سهله .
- سعد : بس يا مسعد .. يمكن .. يمكن أموت .
- مسعد : لا لا لا موت إيه ؟ أن شاء الله ح نجيب أجلهم
وتيجى زى المبوب .
- سعد : دى حرب يا مسعد .
- مسعد : جرى إيه يا ابو السعود ؟ ماتشد أعصابك أمال .
- سعد : أعصابى زى الحديد . انت فاكرنى يعنى ممكن
أخاف ؟ إيه الكلام اللي بتقوله ده ؟
- مسعد : طب طب وطى حسك لحسن أبوك يسمع لا تلحق
تروح ولا تيجى ، واسمع انت إن شاء الله ماشى
إمتى ؟

- سعد : سامح ح يفوت على واحده ونص .
- مسعد : طب وانت خارج نحاسب قوى ، أوعى تعمل صوت لحسن الراجل يصحى ويحوشك .. وأنا ح تلقانى مستنيك ع المحطه . حافظ على نفسك بابا شمهنتس وارجع لنا سليم وربنا معاك .
- سعد : طب غش انت يا مسعد ، غش انت .
- مسعد : ح تلقانى ع المحطه
- (يدخل إلى حجرته ويوصل الباب) .
- سعد : (يهم بالنداء عليه) يا مسعد : (ولكنه يعدل عن النداء ويتمشى قليلا فى الصالة حتى يصل إلى مرآة الشماعة فيحديق فى صورته ويحدث نفسه).
- تعرف المشكلة إيه يا سعد ؟ أنت مش خايف . كل الحكاية أنك خايف لحسن ساعة الجدد تخاف . صحيح أنت خايف لتخاف . فعلا أنا حاسس بكنه . حاسس كأن الدنيا مغيمه خوف ، وكأنها ح غمطر ، ولو ! لازم أقاوم كل ده . منين جالى إحساسى ده ؟ منين ؟ بس معلش .. الفار ما يخافش م الفار ، والأسد ما يخافش م الأسد . وأنا مش حاخاف ، دا ضعف سخيف لازم اتخلص منه . تحيا مصر يا وله .
- (يخرج من الباب الأرض وما يكاد يختفى حتى يتفجر باب مسعد مفتوحا وتخرج منه فردوس وهى فى ملابس الخروج ومعها حقيبه وفى أعقابها مسعد فى حالة تخفز ظاهر) .

- مسعد : غشي يابت جوا اختشى .
- فردوس : مش داخله .
- مسعد : علي الطلاق .
- فردوس : (مقاطعة) مانا داخله ، وديني إن ما وديتني لرايمه لواحدى .
- مسعد : يابت انذار إيه ده اللي أنت خايفه منه ؟ أفرضى حتى ضربوا البلد ما هو بيت أبوكى برضك ف البلد ، وإذا كان فيه موت فالوت هنا مش زى الموت هناك ؟
- فردوس : هناك أهلى أموت ف وسطهم .
- مسعد : وهنا أهلك برضك .
- فردوس : هنا أهلك أنت .
- مسعد : يابت ما دام اجوزنا ماعدشى فيه لا أهلى ولا أهلك دلوقتى أنا أهلك واتى أهلى ، جاك داء الحرب ف أهلك . إذا عشنا نعيش مع بعض إذا متنا نموت مع بعض ، فى حضن بعض كمان .. كده والا لا ؟
- فردوس : لا .
- مسعد : ليه يا فردوس ؟
- فردوس : أنا عندى أموت ف حضن عزرائين أحسن .
- (كتجه إلى اليساب) جى معاى والا أروح لوحدى ؟
- مسعد : لجى معاك ولا مروحه لوحلك وأن رسيت على قتيل .
- فردوس : أبقى أصحى عم الحج يروحنى .

- مسعد : عمك الحج ؟ لو كان أجوزك ونسيكى عمك الحج ده ؟ والا يعنى كان أجوزك ونسيكى ؟ .. جك داء فى عمك الحج .
- نصار : (من الداخلى) الداء يجيلك ماتراش منه يا مسعد . يابن هنية . حج مين اللى جه داء ؟
- مسعد : هو انت سمعت ؟ (بصوت مرتفع) ذا الحج أبوها . خشى يابت ما دام صحى بقى نروح نشوف رأيه إيه ف العبارة دى .
- فردوس : والله ما أنا مستنيه إلا دقيقه واحده ، وإن ماجتشى ما الا قايله لعم الحج يروحنى .
- مسعد : أيوه ، ما أنت كأنك مراته .. والله باينك مراته . طيب تكونى مراتى ازاي وأنا لا خطبتك ولا اتجوزتك ؟ هو اللى شافك وخدنى أشوفك قلت له بقها واسع ، يقوم الراجل يومها يقول لى أيش فهمك انت فى النسوان يا جردل ؟ هو لولا أمك كان بقها واسع كنت اتجوزيها ؟ . تبقى مراتى ازاي ؟ نشوف رأى عمك الحج إيه يا ست مراتى .
- فردوس : بقى بقى أنا اللى واسع يابو شلاضيم (وهى داخلة) دقيقة واحده ، سامع ! أنا ما أستناش أموت هنا .
- (مسعد يغلط وراءها الباب ويتمشى فى الصالة محذثا نفسه) .
- مسعد : تموتى هنا ؟ أما حكاية ! تعمل إيه يا وله يامسعد يا وله ؟ الحكاياه زنقت قوى ورسيت لما بقت

عيلتك كده ومراتك كده . عيلتك بتحبها ومش
هاينه عليك . ومراتك يا وله يا مسعد يا وله حلوه
وبرضه مش هاينه عليك ، أبوك كوم ومراتك كوم.
تاخد أنهي كوم فيهم ؟ تسبب أبوك وتأخد مراتك،
والا تسبب مراتك وتأخد أبوك ؟ والا تسبب أبوك
ياخد مراتك وتأخد انت مرات أبوك ؟ هو انت بقى
مسطول وابتديت تنزف يا وله يا مسعد يا وله .
(يشاور فكره هنيهة) طيب تكلم أبوك فى الموضوع
ده ، والا دا موضوع ما يصحش الكلام فيه ؟ كلمه
والا أقول لك بلاش ما تكلموش . والا كلمه أحسن .
(يتجه ناحية باب حجرته ثم يعدل عن رأيه
ويتجه ناحية حجرة إيه ، ثم يعدل ويتجه إلى بابه
ثم إلى باب أبيه ويدق عليه) .

أبا . أبا نصار .

- | | |
|--------|---|
| نصار : | عايز إيه ؟ |
| مسعد : | عايزك ف كلمه . |
| نصار : | وفرها للصبح . |
| مسعد : | مستعجله قوى . |
| نصار : | وانت حواليك مستعجل ؟ عليها للصبح . |
| مسعد : | ماتستناش . |
| نصار : | والله إن ما كانت مستعجله لمخليها ليله سوده فوق
رأسك . خش . |
- (يفتح مسعد الباب ويدخل ويرفع الستار)

المسدل على حجرة النوم فى نفس الوقت فيبدو
ما بداخلها ويدير مفتاح النور فيظهر بطول
الحائط المواجه سرير نحاس يرقد عليه نصار وهنيه
وعلى اليمين دولاب ملابس بمראה كبيرة جدا ،
وبجوار الحائط الأيسر كثبة اسطمبولي .

مسعد : يا ابا ، فردوس عايزه تروح عند أهلها .
نصار : (يستدير ليواجهه وهو لا يزال راقدا على
القراش) ليه ؟

مسعد : عشان الإنذار الإنجليزي .
نصار : إنذار إيه يابنى ؟

مسعد : مش انتروا بضرب البلد ! ودى قال دى عايزة
تروح عشان إذا ماتت تموت مع أهلها .

نصار : بقى دى الكلمه اللي قلقت منامى علشانها ؟ ياخى
جك البعيد داء .. روح أجرى ومدد رجليك .
انذار إيه وكلام فارغ إيه ؟

مسعد : يعنى ما خليش فردوس تروح ؟
نصار : والله إذا كنت راجل وتعرف تحكمها ما تخليهاش .

مسعد : إذا كنت راجل ؟ والله كلك نظر يابا .
نصار : روح يا شيخ . روح نام ، وله يا مسعد (ينظر إليه

نظرة مأكرة ويغمز بعينه) يمكن كلامها ده انذار
ليك يا واد عشان تتحرك .. اتحرك بالطرانة اتحرك .

مسعد : لا يا أبا . أنا فى الحاجات دى بغداد لى قوى .
(يتجه إلى الباب خارجا ولكنه يعدل عن خروجه)

ويقول : أبال الإنذار ده حكايتہ إيه ! دا كل الناس
عماله تقول .

نصار : أمشى روح نام واصطليح على خير . وخليهم يقولوا .
مسعد : يعنى فكرك ما فيش ضرب ؟

نصار : يابنى روح نام . دا كله تهويش (يعتدل فى
القراش) أنا مش عارف الناس جرى لهم إيه ؟
اتلحسم ؟ يا عالم اليهود زى عوايدهم عملوا
مناوشه وبقي لهم عشر سنين نازلين مناوشات ،
الإنجليز زى عوايدهم حبوا يستفيدوا من الحكاية
دى ويتمحكوا فيها زى طول عمرهم ما يتمحكوا ،
فنقوم نقول خلاص قامت الحرب .

مسعد : (بصوت جاد) لألظاهر يا أبا الحكاية المره دى جد .

نصار : جد فى عينك ! أيش عرفك انت بالإنجليز ؟ أسألنى
أنا اشتغلت معاهم خمس سنين وأعرفهم كويس
قوى ، دول أكبر مهوشتيه فى العالم . أيام الحرب
كنت باشتغل فى ورشه فى التل الكبير اسمها الـ
« فايف بى أو دى » ، تعرف كانوا طول النهار
يشغلونا فى إيه ؟ نعمل دبابات خشب وورق
ونلھنھا بويه عشان يھوشوا بيھا روميل . الإنذار
بتاعهم دا ورق .

مسعد : ما يقولوا فيه أسطول كمان فى البحر يا أبا ، دا
راخر ورق ؟

نصار : آمال ؟ لازم يسبكوا التهويش ، مهر حاكم تهويش
عن تهويش يفرق .. فيه واحد يهوشك تفتكره
جد، وفيه واحد يكلمك جد تفتكره تهويش .. أهو
الإنجليز دول حر كاتهم طول عمرها تهويش
ومصبيتنا أننا بنفتكرها جد .

مسعد : دا فيه ناس حتى شافت الأسطول بعينها .
نصار : ولا شافت ولا ديالو ولو . أهو اللي بقول شاف
الأسطول يبقى لازم مسطول . انت مصدق حكاية
الأسطول دى ؟

مسعد : هو أنا مسطول ؟
نصار : يحاربونا ليه ؟ احنا عملنا فيهم حاجة ؟ دول كانوا
هنا قاعدين قلنا لهم يالله راحوا ماشين ، ولو كان
فى نيتهم حاجة كانوا تلحموا وقالوا مش ماشين .
وازيه ما أزيناهمش . خلها يابنى قاعدة كده على
ميزان الميه ما دام ما تآزيش حد ما حدش يأزيك
أبدا . فاهم روح نام بقى دوشتنى الله يلو شك .

مسعد : يعنى أنا ؟
نصار : نام بقولك .

(يخرج مسعد ونصار يكمل موجهها حديثه لهنية)
يا وليه كل ليله تستكر دينى وتيمينى ع الحرف
وانت عارفه أنى باحب أنام جوه ، والله يكرنشى
ده أننار ليك أنت راعى يا نصار ؟
(يمسده يده ويطفى السور ، وفى نفس الوقت
يلتقى مسعد وهو يخرق الصالة بفردوس وهى
خارجة من حجرتهما) .

- فردوس : هه ؟ جاى معايا ؟
- مسعد : (يا صوار) مانتيش مروحه .
- فردوس : والله العظيم مانا ..
- مسعد : (يقاطعها بصوت رهيب) قلنا مانتيش مروحه .
- فردوس : (تتراجع بظهرها إلى باب حجرتها) وحد قال أنه عايز يروح .
- (تدخل بظهرها ويطفى مسعد نور الصالة ويدخل وراءها ولا يقفل الباب) .
- مسعد : ألقى هدومك ونامى .
- فردوس : مش نايحه أنت شريكى .
- مسعد : (بنفس الصوت الرهيب) قلنا نامى .
- فردوس : الله مانا رايحه ف النوم أهه .
- (يغلق باب حجرة مسعد ويطفى نورها ويسبح المسرح فى ظلام دامس ، بعد فترة يبدأ شخير نصار يتصاعد . ثم تختلط به دقات الساعة الموضوعه فى الصالة معلنة الواحدة بعد منتصف الليل ، ثم يزيق السرير فى حجرة نصار)
- هنية : حج . حج نصار . سامع ؟
- نصار : (بصوت النائم) فيه إيه ؟
- هنية : فيه حس فى الصالة .
- نصار : لازم القطة .
- هنية : هو أنا عبيطه دا رجل بنى آدم بتتحرك .
- نصار : (يمد يده على السرير ويوقد نور الحجرة) مين اللي بره ؟
- (تسمع خبطة الباب) .

- ٦٥ -

- (بصوت أعلى) يتقول مين اللي بره ؟
 (بصوت هامس) فين المسلس يا هنية . أنا كنت
 حاطه تحت حرف المرتبة ، هو فين ؟
 هنية : شلته في الدولاب .
 نصار : (وهو يفتح الدولاب ويتناول المسلس) بقى دا
 كلام ؟
 هنية : وهو يعنى انت بتعرف تضربه .
 نصار : أنا ما بعرفش ، إنما إيش عرف الناس انى ما بعرفش
 أضرب نار .
 هنية : حاسب على روحك يا خويا ، وإن كان حرامى
 سييه ياخذ اللي هو عايزه . كله فلدا شعره من
 شعرك .
 نصار : يا وليه سقطى قلبي .
 (يقف خلف باب الحجرة ثم يفتحه ببطء وهو
 يقول بصوت عال) . مين اللي بره ؟ يتقول مين
 اللي بره ؟
 سعد : (من داخل الباب الأرض) دا أنا .
 نصار : انت مين ؟
 سعد : أنا سعد يا بابا .
 نصار : (يخرج إلى الصالة ويوقد نورها) سعد ؟ ليه
 كده يسابنى ، ليه كده يا حبيبي ؟ أعوذ بالله من
 الشيطان الرجيم . دا انا شويه كنت حا اضرب
 نار . انت خارج والا داخل والا انت فين ؟
 سعد : أنا هنا يا بابا . (يخرج من الباب الأرض وهو

يرتدى ملابس الميدان) .

- نصار : انت كنت نائم من يدري ، إيه اللي صحاك ؟ دا انا
بإيدى لافف عليك الغطا ، صحيت ليه ؟ (يفرك
عينيه) الله إيه إىلى انت عامله ده ؟ لابس كده ليه ؟
هنية : (تظهر على باب حجرة النوم مرتدية الروب)
الله ! إيه ده يا سعد ؟
سعد : مافيش . استدعونا قالوا لازم نساافر الليلة ونقدم
نفسنا ، اللي تم تدريب واللى ما تمش .
نصار : تسافروا فين ؟
سعد : غزه .
نصار : ليه ؟
سعد : ما انت عارف يا بابا .. اليهود هاجمين . انت مش
عارف ان فيه حرب ، وكمان فيه إنذار مشترك ،
الله ! ما انت عارف .
نصار : ويعنى كنت عايزنا نصحي ما نلقا كشى والا إيه ؟
سعد : والله اللي حصل كده ، مارضيتشى أزعجكم .
وأدى انت عرفت ايه .
نصار : خرج سرقه كده ؟ انت رايح تحارب والا رايح
تشارك فى سطو ؟
سعد : حانعمل إيه ؟ الواحد بيعجى يعمل الحاجه قدامكم .
ماترضوش ، بتضطرونا نعملها من وراكم .
هنية : شفت بقى يا نصار ؟ أدى اللي أنا عامله حسابه
من يدري . أقول لك سعد بيدرب تقول لى ولا
يهمك دا لعب عيال . أقولك حاتحارب تقول لى

هو فيه حرب ؟ يقولوا اليهود هجمت تقول تهويش .
طب دلوقتي أنا أعمل إيه ؟ أشق هدومي ؟ أرفع
بالصوت ؟ ألم على البلد ؟ صرفنى حالا أعمل إيه ؟
أهو رايح يموت نفسه أهه .. أعمل إيه ؟

نصار : اعملى لنا فنجان قهوة .

هنية : (مختنقة بالبكاء) أعمل إيه أنا فى مصيبتى السوده

دى ؟

نصار : بقول لك اعملى لنا فنجان قهوة . تشربها إيه يا

سعد ؟ سكر زيادة ؟ واحد ساده وواحد زياده يالله

اشركى . انتى لكى فى الطيبخ فى الغسيل ، إنما

مسائل الحروب دى سببها لنا .

هنية : أسيبها لكم ؟ أسيبها ازاي ؟ لهو ابن مين ده ؟ انت

عارفه ابن مين ده ؟ دا انت إذا كان هو مسمى على

اسمك بس .. إنما دا حته منى أنا .. أسيكو ازاي ؟

سعد : اسمعى وحياتك ، كتر الكلام مش جيفيد . خلاص

اتتهى وقت الكلام . دلوقتي عايزينى اسلم عليكو

أسلم . كلمه واحده غير كده ما ح اسمعهاش .

مفهوم ؟

هنية : يعنى تجينى شاييلتك على نقاله ومش عايز كلام ؟

تجيني الدم مدحولك والا البعيد متقطع حت ومش

عايز كلام ؟ انطق يانصار . صرفنى أعمل إيه دلوقتي ؟

نصار : اعملى القهوة بقولك .

سعد : ياستى أنا لى دماغ بفكر بيه . وإذا كنت عايزانى

أرجعلك تانى ما تقوليش كده . أنا اللي فى دماغى

هو اللى ح انفعده ، إن شا الله تنطبق السماع الأرض .

هنية : هى اللى بتكلمك غريبه يابنى ؟ دانا أمك .

سعد : أمى ما تندبشى على كده .

هنية : آمال عايزنى أزغرتلك .

سعد : أيوه . حد يودع ابنه بالطريقة دى ؟ هو انا رايح .

نصار : (وهو يدخل حجرة النوم) أيوه صحيح هو رايح

احارب والا رايح اندفن ؟

هنية : ما هو يحارب زى يندفن . هم بيعملوا إيه غير انهم

بيدفنوا بعض .

سعد : يوهوه ياتينا . مفيش فايده من كلامى معاكى ،

مفيش فايده ، أنا فى وادى وانت فى وادى . حرب

والا دفن انتى عايزانى أقعد جنبك ؟

نصار : (عاتدا وهو لا يزال يرتدى البالطو فوق الجلباب)

صحيح عايزاه يقعد جنبك يا وليه ؟

هنية : أنا ح أرد على مين والا على مين ؟ انت عايز

تقتلنى يا نصار انت وابنك ؟ أنا كنت عملت إيه

فى دنيانى يا ربى عشان يجزى دا كله ؟ عايز يسافر

تبقى تموتوتى الأول .

نصار : يا هنية ، قلت لك روحى اعملنى القهوة .

هنية : ابعد عنى يا أخى ، سيبنى اتكلم ، أنا إن ما اكلمتش

دلوقتى ح اتكلم أمتى ؟

نصار : (بغضب حقيقى) على الطلاق بالتلاته إن ما

رحتى تعملنى القهوة لتبقى طالق . سامعه ، والا ما

انتيش سامعه ؟

هنية : أبقى طالق أبقى طالق . وبعد سعد ح يهمنى إيه ؟
أنا ضامنه إني ح اخلف تانى ولد ويكبر ويتعلم
ويبقى . مهنس زيه كده ؟ احلف زى ما انت عايز .
(بنغمة خاصة) يا هنية .

نصار : يا نصار ارحم . ارحم يا نصار . دانا قلبى مهرى
هنية : من جوه . قلبى استوى يا ناس ارحموا .
(تخرج وهى فى حالة تأزم عنيف وبكاء) .

نصار : أعوذ بالله . إيه ده ؟ نسوان عقولها فارغه . تعال
يا سعد . ما شاء الله ما شاء الله . حد طابل يكون
له ولد بقى راجل زيك كده ورايح يحارب ويدافع
عن بلده ؟ حد يزعل مندى يا ولاد ؟ تعال يا سعد .
تعال هنا ف النور أما أبصلك كويس . بالزمه مش
حاجه تفرح القلب ؟ ولا يا سعد . يخيبك ! بسم
الله ما شاء الله . تعال كده .

(يقف بجواره واضعاً كتفه بجوار كتف سعد)
دا انت بقيت طولى حتى أطول منى . وشوف
المغفله أمك عايزه تقعدك جنبها .

سعد : مرسية يا بابا .. يا سلام عليك ، انت هايل . طب
بقى قبل ما نينا تيجى وتعمل لنا حكاية ، سلام
عليكو بقى . أصل سامح حيفوت على دلوقتى
عشان نروح سوا . سلام عليكمو . أشكرك قوى يا
بابا . مش ح انسى لك دى أبدا . إنت أروع
إنسان فى الدنيا . إنت ودينى بطل . يعيش الحاج
نصار بطل مصر والقومية العربية .

- نصار : آمال إيه ؟ انت فاكّر يعنى ان ابوك واد هلفوت من اياهم ؟
- سعد : أشوف وشك بخير يا بابا . عن أذنك بقى .
- نصار : على فين ؟
- سعد : (باستغراب) ماشى .
- نصار : كدهم الباب للطاق ؟ استنى يا أخى شويه نشرب فنجان القهوة وأقولك كلمتين من كلام الأبهات الفارغ ده اللي بيقلوه فى المناسبات دى .
- سعد : ضرورى يا بابا ؟ مفيش وقت .
- نصار : إلا ضرورى ؟
- سعد : طب والنبي بسرعه يا بابا .
- (يفتح مسعد باب حجراته ويطل منها وقد ارتدى جلباب نوم) .
- مسعد : الساعة كام يا ابا ؟
- نصار : الساعة اللي تسد بقك فيها وتنام .
- مسعد : أنام ازاي واتنو عاملين الهيجان ده ف الصاله ؟
- شويه كده يا حبهان اعملوا معروف .
- (يختفى ويغلق الباب) .
- سعد : (يهمس) عايز تقول إيه يا بابا ؟ وحياتك بسرعه .
- سامح أصله ..
- نصار : (مقاطعا) لاه .. بسرعه إيه ؟ دانا على مهلى قوى دا أنت لازم تقعد هنا هه . وتقعد كويس . أيوه كده وتولع سيجاره .
- سعد : ماباشربش .

- نصار : بتشرب .
- سعد : أقسم لك يا بابا .
- نصار : لا تقسملى ولا اقسملك . آمال إيه اللى نافع جيبك اللى فوق ده ؟ طلعها (يمد نصار يده ويخرجها) ولع وادبنى واحده وولع لى . وافتح لى مخك قوى واسمعنى . أنا باشتغل إيه ؟
- سعد : يا بابا أنا مستعجل بشتغل إيه إيه ؟ صاحب ورشة نجاره .
- نصار : وعارف أنا كنت الأول إيه ؟
- سعد : الله ! مالوش لزوم ده .
- نصار : ح تعرف لزومه حالا . شايف الشنطة دى ؟ دى كنت باسرح بيها على باب الله ، أصلح كتب وكراسى . وفكرك أنا ابتديت كده . عارف أنا ابتديت أشتغل من إمتى ؟
- سعد : يا بابا .
- نصار : ابتديت وأنا عندى تنع سنين . وبكثير ؟ بتلاته تعريفه ف اليوم . أى وحياة الحسين والطاهرة بتلاته تعريفه ف اليوم . كنت عايش بهم أنا وامسى . وتعرف علشان أوصل لصاحب ورشة كان لازم أعمل إيه ؟ . كان لازم أتعشى شهور بعيش حاف ، وأبات أنا وامك ليلالى فى الضلمه ، وما اشترش الجزمه الا مستعمله وكل خمس سنين ، وأفضل أمشى حافى واشيلها تحت باطى عشان نعلها ما يدوبش . علشان أبقي صاحب ورشه كان لازم

ادوس علی کرامتی کثیر ، واصهین کثیر ، واتلزلق
 علی قفایا ما تعدش ، واسمع شتیمتی بودانی
 واسکت ، ویتلعن أبویا قول ألف مره ف الیوم ،
 علشان أبقی صاحب ورشه اتغربت وسافرت
 واشتغلت مع خواجهات ویهود وغمارده ، وشلت
 غارات اسکندریه کلها علی دماغی ، وأسرنی
 الطلائنه فی طرابلس مره ، وتهت ف الصحراء
 أربعین یوم وأكثر من کده حاجات لو تعرفها یقف
 لها شعر راسک . وعملت دا کله لیه ؟ عشان أبقی
 صاحب ورشه . وأبقی صاحب ورشه لیه ؟ علشان
 ما تشوفوش انتم اللی أنا شفته . علشان ما
 تعیشوش فقرا . الفقرا انت یابنی ما تعرفوش . ما
 تعرفوش یعنی إیه الواحد لما یبقی فقیر ؟ ما وقعتشی
 الدبانه ف الطبق اللی قدامک مره واضطربت تشیلها
 وتغمس مطرحها ؟ ما کلتش العیش المخشب ولا
 الخاف ولا المعفن ، ولا کانتشی غدوتک کلها أبدا
 عباره عن حصوة ملح ؟ ما قملتش ؟ ما حستشی
 مره أبدا أن یمتک طالعه وانک قرفان من نفسک ؟
 ما احتاحتش الشیء وما لقتوش ؟ ماعشتش أمی لا
 تعرف تقرا ولا تکتب وکل ما تشوف کلام
 مکتوب تحس انک تور ، وإن اللی یقروا بس هم
 اللی بنی آدمین ؟ عارف ؟ مقدر لما الواحد یحس انه
 تور یجد وان کل الباقیین بنی آدمین ؟ مقدر دی ؟
 ماتعرفشی انت الفقرا یابنی وکان لازم ماتعرفوش ،

وعلشان كده أنا تعبت واتعذبت واتغربت وشقيت
علشان أضمن انكم مش ح تشوفوا اللي شفته .

سعد : يا بابا فاهم. بس دى حاجه واللى احنا فيه حاجه ثانيه.

نصار : مستعجل على إيه ؟ جايلك ايه فى اللي احنا فيه

وجاوبنى . تقدر تقول لى أدينى كافحت العمر

الطويل دا كله ، وثروتى النهارده إيه ؟

سعد : الورشه طبعاً .

نصار : لاه . ورشه إيه ؟ ثروتى إاتم . إنت .. إنت بالذات

ثروتى . إنت كفاحى فى الثلاثين سنه دول . إنت

اللى طلعت أخوك مسعد ده من المدارس علشان

أقدر أشغل معايا واحد ف الورشه وأعلم واحد ..

أعلمك أنت .. أنت اللي فات من عمرى وانت

اللى جاي ، انت مستقبلى .. مستقبل اخواتك ،

انت اللي ح اضمن بيك مستقبلهم . وبعد ما

عملت انا دا كله فى سنين طويله وسنين جاي انت

بسلامتك النهارده عايز تضيعه فى شربة ميه . فى

لحظه ، فى نزوه طايشه ، فى لعبه ؟ وعايزنى أسيك ؟

وعايزنى أطاوعك ؟ ياخى دا ولا فى الأحلام .

سعد : خلصت يا بابا .

نصار : يعنى إيه خلصت ؟ هو انا بتكلم علشان انت ترد

على ؟ هو احنا فى محكمه ؟ أنا بتاتكلم كلام تسمعه

وبس .

سعد : مش ممكن أسمع وبس . مفيش حد ف الدنيا

يسمع وبس . أنا مش شاكوش ولا ذكر أرنب

مريسته فى البيت . أنا بنى آدم . أنا ابنك صحيح
أنا إنسان لى عقلى وتفكيرى ولسانى ، ولى
كلامى اللى لازم تسمعه .

نصار : عايز تقول إيه ؟

سعد : اسمع يا بابا . المرة دى احنا مش بنكلم على
مصاريف الكليه أو ثمن البدله . المسأله عامه ..
قضيه عامه يا بابا . حاجه ماكتتش أبدا أعتقد إنها
ممکن تبقى موضوع مناقشة بينى وبينك . بابا ..
لازم تفتح عينيك كويس وتشوف اللى جوايا . ما
تغمض عينيك .. انت قاعد مغمضهم من زمان
كل اللى كنت شايفه فى إنى سعد ابنك . لا ، أنا
مش ابنك وبس ، أنا واحد تانى . لى حياة تانيه
وآمال مؤمن بيها . الله ! أنا بحب بلدنا يا أخى ..
جرمة دى ؟ اشنقنى بقى .

نصار : واشنقك ليه يابنى ؟ أنا كمان بحبها . دا حب
الوطن من الإيمان يابنى . بس الجب شىء والموت
والجنان دا شىء تانى .

سعد : دا مش جنان يا بابا . أنا مش أهبل ولا طايش ولا
اللى بقول عليه دا نزوة . دا مش من النهارده بس ،
دا من أيام اما كنت يا جيلكو بهدوم مقطعه م
المظاهرات وتقول لى بتعمل كده له ؟ أسكت .
تحلفنى إنى ما اعملهاش أرجع اعملها تانى .. أنا
مؤمن بحاجه تانيه ، والإيمان ده عايش جوايا من
زمان . والخلاف اللى بيتنا ده مش أول خلاف ،

بس كان زمان ع المظاهرات دلوقتى ع الحرب .
 زمان ماكتتش اعرف أقول ليه ، دلوقتى عرفت .
 دلوقتى أقدر اكلم .

نصار : ما تكلم يا أخى .. اتكلم . عاوز تقول إيه
 بسلامتك ؟

مسعد : (خارجا من حجرته وهو بجلباب النوم) ما دام
 بقى مفيش نوم وفيها كلام ، نسمع .

نصار : خش أوضتك واقفل عليك بابك .

مسعد : واعمل إيه ؟

نصار : تمام وما اسمعشى حسك .

مسعد : وانام ازاي وأنا جوه سامع حسك ؟ ربنا ما يجرمنا
 من حسك . يعنى يا سى سعد ماكتتش قادر تخرج
 من سكات وكان بلاش الملوله دى ؟

سعد : انت بتقول إيه انت راحر ؟ انت فاكرنى عملت
 دوشه وصحيتهم ؟ هم اللي صحوا .

مسعد : وأدبنى أنا راحر صحيت . نقعد نسمع بقى وأمرنا
 إلى الله .

نصار : تقعد بأدبك ولا تفتحشى بقبك . عاوز تقول إيه يا
 باشمهنس ؟

سعد : عايز أقول إيه ؟ أيوه (يتتنحج مرتبكا) النهارده
 بلدنا فى خطر . أيوه خطر صحيح . ولازم ندافع
 عنها .

نصار : هيه ؟

سعد : أنا مع احترامى لكلامك يا بابا بس أنا شايف ان

مصر عندك هي عيلتنا بس . عندى أنا عيلتنا
الحقيقية هي مصر .. وعيلتنا دى فى خطر فلازم
تدافع عنها .

نصار : تدافع عن مين يا بنى ؟
سعد : عنا يا أخى .. الله ! عنك .. عن أخويا مسعد ده .
عن جيراننا . عن أمى . عن قرابيننا وأصحابنا
وأصحاب اصحابنا عن . كل المصريين أهل بلدنا .
وأهل اسكندريه وحلب وكل واحد يقول أنا عربى .
مسعد : الظاهر الواحد ابتدى يستمخ م الكلام .

نصار : (لمسعد) احترم نفسك واقفل بقك العكر دا ولا
تفتحوش . (ثم لمسعد) يا بنى جيراننا مين وأهل
اسكندريه مين ؟ أنا محلش جاع لما جعت ، ولا
حلش اتعرى لما اتعريت ، اشمعنى ساعة الجوع
أجوع لوحدى ، وساعة الموت عايزنى أموت
علشانهم ؟ ما حلش يا بنى بييجوع عن حد ، ولا
حلش ييموت عن حد . كل واحد يدافع عن نفسه
بس ، ويدافع لما يكون حد مهاجمه .

سعد : آمال لما المسأله كده كنت بتتعب وتجوع وتخطاظر
بحياتك علشاننا ليه ؟ ما قلتش ساعتها إن كل واحد
مستول عن نفسه .

نصار : واتم غرب عنى يا بنى ؟ دا اتم عيلتى وأولادى أنتم
أنا .

سعد : وأهى مصر رخره أنا .

نصار : أنت ابني يا بنى .

- سعد : بس النهارده لازم أكون ابن مصر .
- مسعد : (يغمغم لنفسه) الكلام كلام حلو يا جدعان بس يا خساره الرك ع التنفيذ .
- نصار : (لمسعد) ولا كلمه بقول لك . (لمسعد) مصر دى إيه دى ؟ مصر دى كانت خلقتك والا ربك والا علمتك والا قاست عشانك ؟ أنت ابني أنا .
- سعد : أنا ابنك وأنت ابنها وكلنا أولادها . ومش انت ربتى بس .. كل الناس ربونى ، وانت ما علمتيش القرابه والكتابه اللي علمنى مدرس مصرى ، واللى عاجبنى دكتور مصرى .
- نصار : كل الناس مين دول ؟
- سعد : الناس اللي سلفوك وانت فقير ، واللى قاولوك لما اغتيت ، واللى اشتغلت عندهم وانت صبي ، واللى اشتغلوا عندك لما كبرت ، واللى بنوا بيتنا وبيضوه ، واللى بيصطادوا لنا السمك ، ويزرعوا لنا الرز . ماتعرفشى دول ؟ هو فيه حد بيعلم نفسه والا يربى نفسه ؟ دول كلهم النهارده فى خطر .. مش لازم أدافع عنهم ؟
- نصار : وتعرض نفسك للهلاك ؟
- سعد : أعرضها .
- نصار : وإذا مت تبقى عملت إيه بشطارتك ؟
- سعد : أبقي عملت الواجب .
- نصار : الواجب ؟
- سعد : أيوه الواجب اللي خلاك خناطر بحيانك علشاننا .

نصار : ح اقول لك إيه يابنى ؟ كلامك جميل بس مش داخل هنا (مشيراً إلى قلبه) دماغى يابنى وياك بس قلبى أوديه فىن ؟

سعد : قلبك يجمد قلبى ..

نصار : قلبى أنا ؟ يابنى أنت مش شايف قدامك إلا البلد اللى بتقول عليها بس ، ماتتاش شايفنى ولا حاسس بى .. أنا شايفها وشايفك . وإذا كان من جهتى أنا ان مصر بتاعتى ، فافرض لا قدر الله مت ساعتها تبقى مصر بتاعتك عندى تسوى إيه ؟ قنال السويس يسوى يسوى إيه ؟ الشعب اللى بتقول عليه يسوى إيه ؟ الدنيا بخالها تسوى إيه ؟ انت مستعد تموت عشان البلد تعيش ، وانت ما تعبتش فيها ولا لكشى فيها أى حاجه . أنا تعبت فيك ولى فيك كل حاجه ، ومستعد أموت ميت مره عشان تعيش أنت مره واحده .

سعد : مستعد تموت عشان أنا اعيش . كلام كويس .. وإيه فايدتى أنا بقى ؟ أنا فىن فى الحكاياه دى ؟ هو انت تعمل كل حاجه وأنا ما اعملش حاجه أبدا ؟ اسمع يا بابا ، أنا ممكن أكون رايح صحيح أدافع عن بلدنا ، بس انت عايز الجلد أنا لى هدف خاص من المرواح .

نصار : هدف إيه ؟

سعد : عايز اعرف أنا استحق أكون راجل والا ما استحقش . عايز اعمل حاجه .. عايز امتحن

- نفسى .. عايز اشوف ساعة الجلد الواحد يبقى ازاي .
 : نصار وتمتحن نفسك على حسابى أنا ؟ وتمتحن نفسك
 ليه ؟ ما انت أهه راجل ملو هدموك قدامى .
 : سعد راجل إيه يا ناس ! الرجوله دى مش سن ، ذا لقب
 كبير .. رتبه . لازم الواحد يعمل حاجات كثيره
 علشان يستاهلها . الناس بتقول على الواحد راجل
 لما بيكون شجاع وملو هدمومه . وبتقول عليه مره
 مش لأنه أثنى ، لأنه خواف وجبان وجعجاع .
 فانت عايزنى مره والا راجل ؟
 : أنا عايزك مهندس .
 : نصار عشان أبقي مهندس لازم الأول أبقي راجل ، والمهم
 انك تخلف راجل مش مهندس .
 : نصار ما انا خلقت رجاله أهه . انت يابنى عندى أرجل
 راجل .
 : سعد وهو المهم عندك ؟ المهم عندى أنا ، سيبنى أثبت
 لنفسى واطلع راجل .
 : نصار تثبت لنفسك إيه يابنى ؟ انت قدامنا راجل ابن
 راجل . قدامنا راجل والا لا يا مسعد ؟ ما تنطق !
 افتح بقتك العكر ده وانطق .
 : مسعد قلنا ننطق قلتو اطلعو م البلد .
 : نصار انطق .
 : مسعد كلامه معقول يا ابا .
 : نصار طب اخرس بقى ما تنطقشى .
 : مسعد أهو ده جزى للى يقول كلمة الحق .

- نصار : (بزعيق) تثبت لنفسك إبه ؟ تثبت لنفسك عlishان
تضيق نفسك ؟ تيجي تثبت انك راجل تطلع جثة .
- سعد : الله ! ما تسييني يا أخى . إذا طلعت جثة طلعت
لنفسى ، وإذا طلعت راجل طلعت لنفسى .
ماتسييني أنا رايح ادافع عن حاجه مؤمن بيها ،
عن حاجه فى دمي وكيانى وأعصابى . الله !
أنا حر فى نفسى . لازم تفهم دى يا بابا . أنا
مش جزء من ممتلكاتك . أنا صحيح كنت
جزء منك بس دلوقتى كبرت وبقيت مستقل ،
بقيت واحد لوحدى لى رأى ، ومن حقى ولا بد أن
أنفذ اللي فى عقلى .. أنا ، مش اللي فى عقلك
انت .
- هنية : (داخله حاملة صينية القهوة) اتفضل القهوة
يا حج نصار بالمنا والشفاف . اشربها يا خويا وعمر
غلك قوى . اشربها ودينى كله منك انت .. وربنا
المعبود كله منك .
- نصار : أول مره أسمعك يا وليه تكلمى كلام مضبوط . كله
منى أنا صحيح ، أتعب نفسى أنا وضيع عمرى
وشبابى ، وبعدين يطلعلى حنة ولد أوديه المدرسه
بتعلم عشان ييجى فى الآخر يقول لى أنا مش جزء
منك .
- سعد : لا مؤاخذه يا بابا ما اقصدشى ، أنا برضه متأثر من
كلامك وزعلان لزعلك . بس انت فاهم إني رايح
انتحر .. أنا مش رايح انتحر يا بابا رايح أعيش

- أقسم لك أنى رايح أعيش .
- نصار : (بعصية وضيق صدر) يعنى ضامن انك تعيش ؟
- سعد : أضمن منين ؟ حد ضامن إنه يعيش .. انت ضامن
- يا بابا إنك تعيش ؟
- نصار : اللي يلزم بيته يضمن حياته . اقعد هنا وأدى واجبك ، وإذا كنت عايز تدافع دافع عنا وعن بيتنا .
- سعد : يعنى أشوف الخطر جاي واعمل انى مش شايفه ؟
- بلدنا وأرضنا فى خطر واقعد أنا فى بيتى ؟
- نصار : بلدك وأرضك أهم . (مشيراً إلى أرض الصالة) .
- سعد : كل مكان فى مصر النهارده أرضى .
- مسعد : فلتعيش يا خويا يا سعد .. أنا جسمى قشعر . أهه ده الكلام .
- نصار : (يجذب مسعد من يده) طب فز قوم بقى .
- مسعد : والله ما أقوم .
- نصار : على الطلاق إن ما قمت .
- مسعد : على الطلاق ما انا قايم .
- نصار : انت بتحلف علىّ بالطلاق يا كلب ؟
- مسعد : ما انت حلفت علىّ بالطلاق .
- نصار : طيب أما اروق لك . (ثم يتفجر بغضب شديد)
- هو أنا كفرت يا عالم ؟ أنا ح الاقيها منين والا منين ؟
- (لسعد) اسمع يا ولد . ودينى لما تطلعلى أبويا من طريقته يقول لى كلامك ده ما يدخل غنى .
- سعد : الله ! هو انت بس يا بابا ؟ دا أبو سامح كان ح

- يطرده م البيت لما مارحش المعسكر يوم .
- نصار : سامح أبوه يابنى ما تعيش فيه . مولود وفى فمه
ملعقه من الذهب ، أبوه دكتور صاحب أجزاخانه .
إنما أنا تعبت فيكم . عايزنى ألعب بيكم قمار ؟
حرام عليك يابنى دا انا أبوك . إنت نسيت انى
أبوك .
- مسعد : الكلام ده نفسه سمعته من أمى دلوقتى .
- نصار : ما انت يابنى اللى خلليت كلامى يحصل كلام أمك .
ماعلش عندى أقوله إلا كلام النسوان .
- مسعد : وحامق روحك كده ليه ما نسيه يروح .
- نصار : ما تخرس انت قطع لسانك . فز اصلب حيلك قوم .
فز قوم على الطلاق ما انت قاعد .
- هنية : قوم يا مسعد قوم .
- مسعد : نقوم . هه .. قمنا (يخط على باب حجراته) يالله
يابت يا فردوس . مش عايزه تروحي بيت ابو كى ؟
يالله بينا أوديكى .
- فردوس : لا مش ح اروح .
- مسعد : الله ! ما كان دلوقت راكبك عفريت المرواح .
- فردوس : أنا جاني الهاتف دلوقتى وقال لى الصباح رياح
يا فردوس .
- مسعد : بقى جالك الهاتف ؟ . والله عال ! يالله معاى يابت .
- فردوس : ما قلنا الصباح رياح .
- مسعد : على الطلاق .
- نصار : (متده خلا) طلاق فى عينك . انت ما فيش فى

- بقك إلا كلمة الطلاق ؟ غور من وشى .
 مسعد : ماغوروشى . دهده ! ما تسيبونا بقى ندير أمورنا
 وكل واحد أولى بمراته .
 فردوس : أنا مش من أمورك يا ادلعدى .
 مسعد : ليكى حق ، إذا كنتى بتسمعى كلام الهاتف ولا
 تسمعى كلامى (يحاول جذبها بالعنف) يالله
 يابت .
 نصار : (يجذبه من يده) قلت لك غور من وشى .. اسمع
 يا ولد انت وهوه .. اللى مش سامع منكم يسمع .
 البيت ده بيتى أنا ، وضول ما انا عايش كلمتى بس
 هى اللى تمشى فيه ، وأمورك دى تدبرها فى بيتك
 لما يكون لك بيت .
 مسعد : برضه ليك حق يا حج .. البيت ده يظهر انه مش
 بيتى (لسعد) مستنيك ع المحطه بابو السعود بس
 ماتت آخرش ، حاكم شايفك ملقلى كسده إوعى
 يغلبوك .
 نصار : على بزه امشى .
 مسعد : ماشى يا حج ايه ماتعكرشى دمك . ماشى ، إياك
 اعترلى أنا رآخر فى حنة مصر تنفع لى .
 هنية : (بعد اختفاء مسعد) يا مسعد ، يا مسعد .
 نصار : سيبكى منه . كلها سواد الليل وقرصه الجوع
 وتلقه راجع . وانت بقى يا سعد باشا إيه رأيك ؟
 سعد : أنا ؟ أنا معادى مع سامح قرب يا بابا .. وأنا ما
 عنتش قادر اتناقش ، ومفيش فايده من النقاش . ولا

عمرى باقنك ولا عمرى بتقنعنى ، فبتناقش ليه ؟
(ياخذ طريقه إلى الباب) عن إذنك يا بابا .
سلامو عليكم .

نصار : (معترضا طريقه) رايح فين ؟

سعد : أوعى يا بابا .

نصار : أوعى ؟ أوعى ازاي يا بنى ؟ انت فاكرنى مجنون ؟

أسيك ثموت ! دا أنا أبقى حيوان ، دا
حتى الكلاب يا بنى بتحافظ على اولادها ، أسيك
ازاي ؟ البلد فوق دماغى من فوق . إنما إذا كان
لاهد حد يموت أموت أنا ، أنا خلاص بالله
حسن الحتام ، إنما انت لسه بدرى .. لا يمكن
أسيك تتفحص . انت مش بتقول الناس هم اللى
عملوا لى الورشه داني مديون لهم وهم دلوقتي فى
خطر ؟ أنا اللى أرد الدين . هى مصر عملت لك
انت إيه ؟

سعد : أوعى يا بابا ! كفايه انها عملتك لى ، وهى اللى ح

تعمل لى المستقبل .

نصار : كلام فارغ ، مستقبل إيه ؟ هو فيه بعد الموت

مستقبل ؟ خليك انت للمستقبل وخلينى أنا مع اللى
فات . أنا بدالك .

(تسمع صفارة من الخارج) .

سعد : دا سامح يا بابا .. أوعى من فضلك ، ما حدش

بدال حد . يوم ما قامت الحريقه الصغيره فى
الورشه كل الناس كانت بتطفئ وما كانش حد

يقول أنا بدال حد ثم (بحماس) النهارده حريقه
كبيره فى الورشه الكبيره . اوعى من فضلك .
الله ! انت عايزنى اتخايق معاك والا إيه ؟

نصار : اللي تحسبه .

سعد : (بهياج) مش كده يا بابا عيب . إوعى .

نصار : (يدير له خده) اضرب . تحت أمرك .

سعد : يوه ! يا ناس مش كده . مش كده . الله

ما تخليش اتجرا عليك . إوعى من فضلك (بهم
بدفع أييه) .

نصار : الله ! كده يا سعد ، هي حصلت ؟

سعد : (متفجرا) انت اللي تخلينى أعمل كده . وأنا بقول

لك أهه . أنا مستعد أرتكب أى حاجه . فاهم ؟

أى حاجه . ودينى أى حاجه .

نصار : يعنى ما فيش فايده يا سعد ؟

سعد : ربح نفسك .

نصار : طيب يابنى انت حر ، أنا عملت اللي علىّ وانت

حر . آدى انت بقيت كبير ومتعلم صلاة النبي راجل

ترفع علىّ أيديك . انت حر .

سعد : يا بابا .

نصار : ما دام المسأله حصلت كده خلاص يابنى اللي عايزه

اعمله .

سعد : أنت أصلك ..

نصار : انتهيت . بس لى رجاء واحد عندك .. رجاء صغير

(تسمع صفارة سامح من الخارج)

- سعد : إيه ؟
- نصار : تستنى دقيقه واحده ألبس وآحى معاك أودعك ع المخطه .
- سعد : مافيش داعى يا بابا تتعب نفسك ، وسامح دلوقتى قلق ومافيش وقت .
- نصار : أتعب نفسى إيه يابنى ؟ وده معقول ! حد عارف الموت م الحيا يا سعد ؟ ممكن يمكن يابنى - حد عارف - أودعك واللقا بقى يابنى يوم اللقا ؟
- سعد : (مخنوقا بالبكاء) بابا .
- نصار : دقيقه واحده ألبس واجيلك .
- سعد : بس بسرعه يا بابا وحياتك .
- نصار : (يتجه إلى الباب الأرض ثم يتوقف) بس انا خايف يا باشمهندس من حاجه .. انت مالكشى أمان ، تخلىنى أخش من هنا وتمشى أنت من هنا .
- سعد : لا ، مش ح امشى يا بابا .. بشرفى ما ح امشى .
- نصار : على بابا الكلام ده ؟
- سعد : ثشق فسى كلمتى يا بابا .. وبسرعه مافيش وقت أرجوك .
- نصار : لا لا يا عم . انت تدخل هنا (مشير إلى باب حجرته) واقفل عليك بالمفتاح لحد ما اخلص لبس . ما اضمنكشى إلا كده .
- سعد : عيب يا بابا .
- نصار : تبقى لازم عايز تضحك على وتمشى .
- سعد : أبدا أبدا .

- نصار : إذا كان كده خايف تخش ليه ؟
- سعد : (بعصبية) أنا مش خايف بس ما عدشى وقت .
- نصار : خش خش ما تخفش تعال (يجذبّه من يده ويدخله الحجرة) .
- (تسمع صفارة سامح من الخارج) .
- سعد : يا بابا ما فيش وقت . أنا خشيت أهه ، مافيش داعى تغفل .
- نصار : وده اسمه كلام ؟ يبقى لازم فى نيتك حاجه (يتجه إلى البوفيه ويفتح درجا فيه) المفتاح كان هنا . أهه .
- سعد : (يضحك) أنا مافيش فى نيتى حاجه . بس اوعى انت يا بابا يكون فى نيتك حاجه وتغفل علىّ ولا تفتحشى .
- نصار : هو انا يابنى عيل صغير ؟ يرضيك أحلفلك بياه ؟
- سعد : برحمة والدك اللى ما بتحلفش بيها باطل .
- نصار : طيب يا سيدى . ورحمة أبويا (يغلق الباب بالمفتاح مرتين) ما انا فاتح أبدا يا سعد إلا اما يرجع كل شىء كما كان .
- سعد : الله ! مش كده يا بابا . مش وقت المزار . افتح الباب (يحط على الباب) .
- نصار : أنا صدقت أقفل عليك .
- (تسمع صفارة سامح من الخارج) .
- سعد : (ينهال على الباب ضربا) افتح . الله ! افتح بقول لك . دا شغل عيال ده ، انت حلفت برحمة أبوك .
- افتح يا بابا .

— ٨٨ —

(يسمع طلقة مدفع ثم صفارة سامح من الخارج)

نصار : (وهو ينظر من الشباك) يا أستاذ سامح سعد

سبقك على المخطه ويقول لك تحصله مع السلامه .

سعد : افتح الباب بقول لك . ودينى اكسره . (يخط

على الباب) .

نصار : تكسره ؟ دا يابنى باب زان أنا اللي عامله على

إيدى . إن كنت جدع اكسره . انت مش عايز

تثبت إنك راجل ؟ اكسره إن كنت راجل .

سعد : (وهو ينهال على الباب خبطا ودفعاً) افتح بقول

لك ، ودينى أرمى نفسى م الشباك .

نصار : دا حديد مايفوتشى ذراع . ارمى .

سعد : افتح يا حج نصار . افتح بقول لك . دا مش شغل

رجاله .. دا شغل جبانات . افتح .. افتح يا جبان .

نصار : أنا جبان يابنى ؟ معلش . بكره لما تخلف تعرف أنا

عملت كده ليه .. وساعتها حتعرف ان أبوك ما

كانش بيعمل كده لأنه جبان .

(يتوج كلامه الأخير يهدير مدافع من الخارج) .

الفصل الثالث

المنظر : نفس المشهد فى الفصل الثانى ولكن الستارة اليمنى الداخلية مسدلة على حجرة نوم نصار ، وكذلك الستارة اليسرى مسدلة على المدخل .

حين ترفع الستارة تسمع أصوات قنايل ومدافع وأزيز طائرات وصرخات آدمية بعيدة ومبعثرة . الوقت بعد انقضاء أكثر من أربع وعشرين ساعة على أحداث الفصل الثانى ، ونصار جالس فى الصلاة ومومن على ركبته .

نصار : (يغنى) أبوح يا أبوح

كلب العرب محروح

وامه وراه بتنوح

يا هنية . فىن يا وليه كباية الميه السخنة ؟

هنية : (داخلة) أنا مش قابله لك م الصبح أن ما فىش ميه من أصله ، لا سخنه ولا بارده ولا حتى للشرب . انت مش عارف الميه مقطوعه م البلد . مالك يا راجل جرى لك إيه ؟

نصار : أنا اللى جرى لى . ياخى قولى الدنيا جرى لها إيه ؟ . إيه اللى حصل ياولاد ؟ من يوم ما وعينا وبلدنا عايشه هاديه ، عمرنا ما سمعنا فيها حتى صوت بتلقية ، الناس رائحه جايه سلامو عليكم سلام ورحمة الله ، الرجاله فى شغلها والنسوان والعيال فى المدارس والشمسه طالعه فى أمان الله . نبص نلاقى فى ساعة واحدة البلد بقت جهنم ، ليه ؟ إحنا عملنا إيه يغضب الله ؟ والا عملنا

إيه يغضب العبد ؟ والا يكون دا حلم ياولاد ؟ ما تقول
يا هنية دا حلم والا علم . والا الواحد اتهيل يا هنية ؟
بقى الشارع اللي جنبنا بقى تراب بحق وحقيق ، واللى
قبله بقى صحيح راكية نار ، واللى بتصفر دى قنابل
يا سوسن ؟ إيه يا خويا ده ؟ بقى الطيارات دى نازله
دك فى بيوتنا . إيه كل ده ياولاد ، وليه بلدنا لسه
متحملاه ؟ ليه وازاى بلدنا لسه مستحملاه ؟

هنية : صلقت يا خويا وأمنت ؟ يقولوا اليهود هجمت
تقول مناوشه ، يقولوا الانجليز ح تضرب تقول تهويش ،
الانجليز ما يضربوش إلا اللي يضربهم . شوف بقى عينك
واسمع بودانك . عاجبك اللي انت شايفه وسامعه ده ؟
نصار : لازم يا هنية فيه حاجه غلط . مش ممكن . مستحيل .
لازم فيه غلط ياولاد واحنا مش عارفين . بقى كده ؟
فى ساعه يضيع كل اللي عملته فى عمرى . مسعد طار
ما اعرفلوش حته ، والورشه ما اعرف جرى لها إيه ،
والبيت عمال يفقر عايز يقع ، ومين عارف لسه ح
يجرى إيه ؟

هنية : (بعد صمت قصير) حج .
نصار : استر يا رب . مالك ؟
هنية : انت مستغنى عن اولادك . مستغنى عن سوسن دى ؟
نصار : ليه ؟
هنية : من امبارح يا راجل وانا صوتى اتنبح . وكل الناس
هاجرت واحنا قاعدين نجعل إيه ؟
نصار : خليههم يهاجروا .
هنية : والنبي انت لازم جرى لك حاجه .
نصار : الناس هم اللي جرى لهم يا هنية . حد يسيب بيته

وبلده فى الوقت ده ؟ بقى الفسحه نتفسحها فى بلدنا
ووقت الزنقه نسيبها ونجسرى ؟ بيتنا ده نسيبه ونروح
فين ؟ نسيب بيتنا ده يا هنيه ؟ (يجلس على الحيطان) .

هنية : طب خيلنا ، ولما نفطس تحت بيقى فيها فرج .
نصار : نموت ؟ مش ح نموت ف بيتنا يعنى ؟ زى بعضه . دا
البيت ده زى أبو الواحد ، حد يسيب أبوه وقت الخطر ؟
دا عمرنا ده . دا أغلى عندى من عينيه . دا انا ما
اقدرشى أعيش الا فيه . الكنبه دى ألقى قعده زى
قعدها فين ؟ دا عضمنا خد عليها وهى خدت عليه .
ومش دى الأوده اللى ولدتى فيها سعد ؟ وامى الله
يرحمها مش ماتت فى الركن ده ؟ والعيال حولنا هنا ،
وكبروا هنا ، ولعبوا هنا ، وبقوا رجاله هنا ؟ نسيب ده
كله ونروح فين ؟

هنية : ونستنى ونموت ؟
نصار : نموت هنا ؟ زى بعضه . دا الواحد إذا علش فى حته
تانيه كأنه ماعلش . وإذا مات هنا كأنه ما مانشى .

هنية : طب نقف بره زى بقيت خلق الله .
نصار : ونسيب سعد لمين ؟
هنية : وانت قاعد تخرسه .

نصار : آمال أنا قاعد لإيه يا هنيه ؟
هنية : والنبي انت لازم جرائك حاجه .
نصار : ليه يا هنيه ؟

هنية : تخرسه من إيه ؟ انت فاكر انه عبوس ؟
نصار : مش قافل عليه يا وليه قدامك ؟
هنية : وإيه فائدة القفل ؟ انت مش عارف إن الكالون بتاع

الباب خسران ويقتفل على سته ؟ يعنى العيل الصغير

اللى قد كدحه . يعنى سوسن دى تزقه كده بتفتح .

نصار : بتقولى إيه يا وليه ؟

هنية : انت فى نومك باينك . يا راجل مش من زى الأوان ده

وانا اقول لك يا نصار كالكون الباب عايز تصليح ،

تقول لى خليه عشان يبقى باب النجار مغلغ ؟

نصار : يا نهارك ابيض . طب هس وطى حسك . بقى

الكالكون خسران ؟

هنية : حرب وشوف .

نصار : المصيبة السوده لو سعد عرف . إوعى يا وليه تقلت

منك كلمه كده ولا كده لحسن الواد يبقى راح هدر .

هنية : تقلت منى أنا ؟ (ثم بصوت مرتفع) بس الللى مش

داخل غنى ان كل الناس تهاجر واحنا قاعدين .

نصار : بلاش دوشه يا وليه . عايزه تهاجر خدى ولادك

ويا لله .

هنية : ونسيك ؟

نصار : ربنا يتولانى .

هنية : بقى انت مش هابن عليك البيت وعايز تهون انت

على ؟ ودى تيجى ؟ دا انا هنيه يا نصار .

نصار : وانا نصار يا هنيه .

(خبط على الباب) .

(ينظران إلى الباب ويرفع نصار يده إلى فمه محذرا

هنية) .

سوسن : غنى كمان يا بابا .

نصار : أبوه أغنى . حاضر .

أبوح يا أبوح

كلب العرب مجروح

- وامه وراه بتنوح
سوسن : يا شيخ غناك يزعل . إيه ده ؟ غنى واحد اتنين أنا وياك
يا حبيب العين .
- هنية : مافيش أخبار عن مسعد ؟
نصار : من ساعة ما بعث له محمد مافيش . ياترى انت فين
يابنى يا مسعد ؟ مت والا عايش والا مجروح ؟ إلهى لا
أسألك رد القضاء بل أسألك اللطف فيه .
- سعد : (يحيط على الباب بشدة) افتحوا يا فجر .
هنية : كفايه بقى يا سعد ، كفايه يا خويا ، زمانك عورت
أيدبك .
- نصار : انت عارفه كويس يا هنية إنه ما يعرفشى حكاية
الكالون دى ؟
هنية : وحا اعرف مين يا نصار ؟ ما كل الولاد عارفين ان
مافيش فى بيتنا كالون سليم . أنا داخله اشوف لكم
لقمه (تخرج من الباب الأرض) .
- سعد : (من الداخل) يا بابا هددتك مانفعشى التهديد ،
اترجيتك مانفعشى الرجا ، هو انت عدوى ؟ دا لو
واحد انجليزى ماكنشى عمل أكثر من كده . دى خيانة
عظمى دى . افتح الباب .
(يحيط على الباب بشدة)
- نصار : (يغنى) يا طالع الشجره
هات لى معاك بقره
تغلب وتدينى
بالمعلقه الصينى
- سعد : افتح . افتح بقول لك . انت جنتسى . دا انت مش
أبوسا . دا انت عدوى . انت فاكر انك عامل

كده عثمان بتحبني ؟ انت مش بتحبني انت بتحب نفسك . انت بتحافظ على نفسك ، دى أنا فيه بشعه . ياباى . ماتلينيش أشتمك أكثر من كده . افتح الباب .
(يخط بشدة)

نصار : (لنفسه) يارب اسأل لحسن الحظ الشديد ده يفتح الباب (ثم يغنى)

والمعلقه انكسرت

يا مين يداويني

سعد : تحبسنى كده ؟ ودينى انت طاير خامس . أنا ح افضل العن اليوم اللي كنت فيه اهلك . انت أنقذتنى م الموت صحيح إنما خسرتنى على طول . افتح الباب بقول لك .
نصار : (مضطربا) يا ساتر يارب ! (ثم يغنى)

رحم لرسول الله

لقيته بيزعظ

فى حمام أخضر

ياريت أنا دقته

بلبل النبى زرتة

سعد : افتحوا يا سفله . افتحوا يا أسفل خلق الله .

نصار : عيب يابنى تشتمنى . عيب يا حبيبي . تاخذ لك قرص منوم تهدى أعصابك .

سعد : الشتيمة عيب والخيانة مش عيب . وعاييزنى أنام ؟ دا أنا بدبح . دلوقتي بتقتلنى وانت مش دارى . يا قاتل عاييزنى أنام ؟

(يخط بشدة على الباب) .

(تدخل هنية ومعها صينية فيها طعام) .

هنية : لقمة ايه . قوم كل . وعاييزين ندخل له الأكل .

- نصار : هاتى .
(يقوم ويتناول منها لفافة فيها طعام ويشب على
أطراف أصابعه ويدخلها من الشراعة)
كل لك لقمه يا سعد .
- سعد : يلعن أبو أكلكم . ذا أكل مجرمين ده ، ذا أكل خونه ،
هه . (يسمع صوت خبط الطعام فى الباب) .
- هنية : على كده حيموت م الجوع .
- نصار : ماحلش ييموت م الجوع .
- هنية : دهدي آمال الناس بتموت بإيه يا نصار ؟
- نصار : بالرصاص يا هنية . سيبه ، وشيلى اللى انت حطاه
ده . حد له نفس ؟
- هنية : أهه عندك .. وانا رايته بقى لحسن مرات شعبان بتولد
ومافيش حد جنبها ، وبعتت لى بنتها يجى عشر
مرات .
- نصار : وكوتر فين ؟
- هنية : كوتر ؟ إلهى يجيلها وشط عليها البعيده .
- نصار : ليه ؟
- هنية : البت اللى ماكتتش بتعد إيدها لجنس شغلته فى البيت
أقوم اتلفت ما التقيهاش ، واسأل عليها يقولوا راحت
تحول فيه م التزعه للناس .
- نصار : ناس مين ؟
- هنية : أنا عارفه يا خويا اللى بيحاربوا والا اللى فى البيوت
مانى عارفه . أهى بتتك ولما تيجى انت حر فيها .
- نصار : يا سلام عليكى يا هنية ، عمرى ما قدرت أمسكك .
طول عمرك بتزفطلى منى ، ساعه تقولى أنا اللى
رضعت وربيت ده أبنى ، وساعه تقولى أهى بتتك أنت

حر فيها ، أصدق إيه والا إيه ؟

هنية : (وهي خارجة) صدق بقى اللي تصدقه . والله احنا

اللى بنزفلط والا انتم يا رجاله اللي أكبر مزفلطية ؟

نصار : (بعد ما تخرج) لنفسه (بقى الباب مفتوح . إلهى

بتوه عن دى يارب . (ثم لسوسن) ولد يا جميل

الجميل . إوعى تقولى لسعد .

سوسن : أوع اقول له إيه ؟

نصار : (لنفسه) بحسبك عارفه . (ثم لها) إوعى تقولى له ان

ماما خرجت بره .

سوسن : لا . أنا مش ح اقول له كده .

نصار : أمال ح تقولى له إيه يا سوسو ؟

سوسن : (بدلع) ح .. اقول له .. إن ... إذا .. زقيت الباب

كده .. بتفتح .

نصار : لا لا لا . بلاش دى . أعملك حصان وحمار وفيل أبو

زللومه وبلاش دى .

سوسن : أمال ماما خرجت بره ليه ؟ . عايزنى ما اقوللوش كده

ليه ؟ هى رايحه حتة وحشه ؟

نصار : لا لا لا . دى رايحه تولد مرات شعبان يا بنتى .

سوسن : تولدها ازاي ؟

نصار : يعنى تطلع منها عيل صغير .

سوسن : وده وقت عيال صغيرين انت راخر ؟

نصار : انت بتقوليلى ؟ قولى للنسوان . دايما رأيهم مخالف .

وهى مرات شعبان بس ؟ دا بيعي ثلاث اربع نسوان

فى حتتنا كانوا بيولدوا امبارح والنهارده . يمكن والله أعلم

يا بنتى الحارب بتسوى العيال بسرعه وينزلوا عشان

يعوضوا اللي بيروح . يمكن يا بنتى ما حلدش عارف .

اننى بديتى تنامى . فلول الليل ما نغتش يا بنتى . ولا
 حد نام . أقوم أنيمك . بسم الله الرحمن الرحيم
 (يحملها على كتفه ويدخل من الباب . فى هذه
 الأثناء يدخل محمد من الباب الخارجى . يدخل معفر
 الملابس زائغ النظرات ، يحيل بصره فى الصالة ، وحين
 يلمح الطعام يتجه إليه بسرعة وينقض عليه . نصار
 يعود فيفاجأ به) .

- نصار : الله ! محمد . وله . حيت إمتى ؟
 محمد : (وهو يتلع اللقمة) دلوقتى .
 نصار : مسعد فين ؟
 محمد : مارضاش بيحى .
 نصار : يعنى شفته ؟
 محمد : أيوه .
 نصار : وكويس ؟
 محمد : أيوه .
 نصار : وكويس ؟
 محمد : زى الجن .
 نصار : قلت له زى ما قولتلك ؟
 محمد : أيوه .
 نصار : قلت له إيه ؟
 محمد : قلت له أيويا ييموت وعائز يشوفك .
 نصار : وكان باين عليك الكذب ؟
 محمد : والله العظيم أبدا .
 نصار : وقال لك إيه ؟
 محمد : قال لى قول لايوك عيب يا بابا . هو مش سامع سعد
 كان يقول إيه ؟
 (اللحظة الحرجة)

- نصار : إخصى عليه . وعمل إيه ؟
- محمد : مشى مع الناس .
- نصار : ناس مين ؟
- محمد : اللى شايلين بنادق .
- نصار : وراح فين ؟
- محمد : ما اعرفش .
- نصار : انشا الله ما عرفت ، جتك البله .. الحق علىّ انا اللى أبعتك . شفت بقى يا سى سعد فصاحتك ؟ أدنت ضيعت اخوك ايه . أخوك ضاع يا باشمهندس اتبسّط بقى واتعمق . اتعمق زى ما انت عايز يا خويا وقول علىّ جبان . أهو أخوك ضاع . العوض عليك يا رب .
- دا العاقل مسعد . العوض عليك . يا ربى ليه كده بس ؟
- دا دراعى اليمين ٤٠ سنة باصلى لك فى اليوم خمس مرات ما قطعت ولا فرض . حتى وانا عيان بقيت اصلى ٤٠ سنه باصوم لك حتى وانا معنديش سحور بقيت اصوم . وحجيت وزرت قبر رسولك مرتين .
- وما تقفشى جنبى يارب ؟ طيب اقف جنب مسعد .
- احميه يارب . احميه لجل خاطر نبينا احميه . دا دراعى اليمين احميه .
- سعد : أنا اللى احميه يا بابا . أرجوك افتح .
- نصار : (مواصلا كلامه) يجعل اللى يضربه إيده تنشل .
- سعد : أنا اللى أشل إيده يا بابا .
- نصار : (يرد عليه) علشان تموت انت ؟ كفايه لحد كده .
- كفايه واحد راح . كفايه مسعد ضاع أحميه منين ؟
- (ثم يلتفت لمحمد) تعالى هنا يا وله . قرب . قرب .
- كمان ، ما تخافش مش ح اضربك ولا ح اعمل فيك

- حاجه . بس قول لى . شفته فين ؟
- محمد : (وهو يتطلع اللقمة) فى شارع البحر .
- نصار : وشفته إمتى ؟
- محمد : الصبح .
- نصار : الصبح ؟ ومن ساعتها ما جيتشى ليه ؟
- محمد : كنت قاعد برة .
- نصار : ليه ؟
- محمد : الله . أنا عييط آجى اقول لك كده عشان تضربنى .
- نصار : آمال جيت ليه يابن النجس ؟
- محمد : لما جعت جيت .
- نصار : (لنفسه) م الصبح بدري . كام ساعه يا ناس ؟ دا زمانه مات وشيع موت . الصبر . الصبر يارب . م الصبح دا زمانه مات وشيع موت . سامع يا سعد ؟ مسعد زمانه مات ياولاد . زمان مسعد مات ياولاد .
- مسعد : (داخلا وملابسه مغيرة وممزقة ويده اليمنى مجروحة ومربوطة بقميص غارق فى الدماء) ما متش يا ابا ولا حاجه ، أنا هـ .
- نصار : انت ؟ مسعد ! جيت ؟ يابنى ! (يعانقه) استنى . انت سليم ؟ جت سليمه يابنى . جت سليمه . دا أتبتك عندى عزيز يا مسعد ولانيش دارى . إخصى عليك . أنا . أنا . مش عارف اقول لك إيه . حم .. حمد الله .. ع الس .. سلامه .. مال إيدك ؟ ملها ؟
- مسعد : تعويره بسيطه .
- نصار : بسيطه إن شاء الله بسيطه . اقعد . بسيطه إنشا الله استريح .. مدد رجليك (يكن مسعد رجليه احزاما لأبيه) مدد ما تنكسفش . رجليك سلام ، صدرك

سليم ؟ انت عارف لو كان الله ليقدر جرى لك حاجه
كان العوض على الله ف ابوك . إخصى عليك يا
مسعد . أنا بابني باقول انك عاقل تقوم تعمل كده .

مسعد : أعمل إيه يا ابا ؟ ما هي لو كانت الحكاياه بالعقل كان .

إلا العقول ساعات بتتوه . لو شفت الناس وهي بتجرى
وتصرخ وتتور وتضرب بالنار ما كنتش تستجمل .

نصار : ورحت فين ؟

مسعد : أهو منين ما كانوا بينزلوا كنا بنروح .

نصار : وإيدك مالها ؟

مسعد : إصابه .

نصار : نار ؟

مسعد : أنا عارف . أنا لقيتها بتخر دم .

نصار : رصاصة في إيدك اليمين يا اسطى ؟ كده يا مسعد

تخرب بيتنا ؟ احنا اللي بنجيب لارواحنا المصايب . أنا

مش قلت يا ناس ؟ لو كنت فضلت في الورشه كان

حصل لك ده ؟ احنا نروح نضرب فيهم ليه ؟

مسعد : عشان بيضربوا فينا .. الله ؟

نصار : ماهم بيضربوا فينا لما نضرب فيهم ، إنما لو كل واحد

اتكن في بيته وسكت ماحلش ح يقرب له . الواحد

يدافع عن نفسه بس إنما لزومه إيه نروح نجري وراهم

ونزيط ؟

مسعد : وحد يا ابا كان قال لهم تعالوا ؟

نصار : إديني انت راخر محاضرات . ما هو كل واحد يشتغل

مدرس عليه شويه . كفايه يا خويا فصيح واحد في

العيله . وأدى نتيجة الفصاحه .. إيدك اليمين . شفت

ياسى سعد الجبان اللي قفل الباب كان بيعمل كده ليه ؟

- علشان مائجیش منشال علی نقاله زی امک ما بتقول .
- سعد : لو سبتتی کنت عورت ایذا اللی عور ایده (یخبط
الباب بشدة) افتحوا الباب . افتح الباب یا مسعد ح
تحتونی یا مجرمین . افتحوا الباب .
- مسعد : وعلی ایہ ؟ الحکایہ بتشطب یا باشمهنس .
- نصار : (لمسعد) وهبطت لما خرجت غصب عتی یا بطل .
جسمک یاخو یا ارتاح ؟
- مسعد : (یهز رأسه) .
- نصار : وکان معاک بندقیه ؟ ودیتها فین ؟
- مسعد : ادیتها لواحد . ایذی وقت .
- نصار : وضربت فی الانجلیز زی ما انت عایز ؟
- مسعد : ضربت .
- نصار : وحاربت ؟
- مسعد : وحاربت .
- نصار : وما موتش ؟
- مسعد : وماموتش .
- نصار : وحاربت ازای ؟
- مسعد : زی الناس ما بتحارب
- نصار : کنت بتضرب نار ؟
- مسعد : آیوه کنت بضرب نار .
- نصار : وعرفت تضرب ؟
- مسعد : عرفت .
- نصار : ضربت ازای وانت ما اتعلمتش ؟
- مسعد : اتعلمت وانا بضرب .
- نصار : وقتلت حد ؟
- مسعد : قتلت .

نصار :	جدع . بس اوع تكون قتلت كثير . قتلت كام ؟
مسعد :	مش كثير .
نصار :	عشره ؟
مسعد :	أقل من كده .
نصار :	اثنين ؟
مسعد :	زى كده .
نصار :	وماتوا قدامك ؟
مسعد :	ماتوا .
نصار :	كانوا كبار ؟
مسعد :	قدي كده .
نصار :	فرنساويين والا انجليز ؟
مسعد :	والله ما اعرف .
نصار :	حد كان معاك ؟
مسعد :	ناس كثير .
نصار :	جرى لهم إيه ؟
مسعد :	اللى مات مات واللى عاش عاش .
نصار :	وانت ماموتش ؟
مسعد :	ماموتش .
نصار :	ألف حمد يارب . ألف حمد .
مسعد :	أنا دايع .
نصار :	نزل منك دم كثير ؟
مسعد :	أنا عارف .
نصار :	(مشيوا إلى القميص الذى يربط به يده) وقميص مين ده ؟
مسعد :	أى حد .
نصار :	اوع يكون بتاع واحد مات .

- مسعد : أنا عايز انام .
- نصار : أيوه يا بني . والصبح نشوف دكتور . وتأخذ لك دلوقت قرصين ينيموك . قوم ، قوم يا حبيبي ، خش نام في أوضتك . اسند على كتفي . سليمة ان شاء الله . سليمة .
- نصار : (يدخل هو ومسعد إلى حجرة مسعد ويسمع صوته من الداخل) أيوه .. نام كده .. واتغطى كويس .. وابلع دول عشان يخلوك تمام .
- (ثم يخرج ويفلق الباب وراءه ، ويتجه بسرعة إلى البوفيه ويعسّس في أحد أدراجة ويخرج مفتاحا ويفلق باب مسعد مرتين) .
- الحمد لله (يقبل يديه ظاهرا وباطنا) ألف حمد ليك يارب . ألف حمد . الموجه دى كلها والولاد لاتنين تحت باطى . آدى سعد (ممسكا بمفتاح باب الحجرة التي بها مسعد) وآدى مسعد (ممسكا بمفتاح الحجرة التي بها مسعد) . رجالتك تحت سقفك يا نصار ، والمفاتيح أهم . ألف حمد ليك يارب . دا ولا ليلة القدر . (خبط على الباب) .
- نصار : مين . خش .
- (تدخل فردوس) .
- فردوس : ياللى هنا . عم الحج . أمال مسعد فين ؟
- نصار : مسعد . العرض على الله في مسعد يا فردوس .
- فردوس : (تصوت) يا مصيبتى السوداء هو البعيد جرى له حاجه ؟
- نصار : بس بس . أعوذ بالله من عقول النسوان . حاتعملى الجنازة قبل ما يموت .

- فردوس : (فرحة) هو ما متش ؟ هو فين يا عم الحج . هو فين !
مسعد فين .
- نصار : آمال لما انتى محروقة عليه كنتى ساييه ومروحه بيت
ابوكى ليه ؟ عشان تموتى هناك ؟
- فردوس : ياربنتى مت . هو انا قدرت . دا يادوبى قعدت هناك
يا عم الحج وبعدين ... وبعدين ..
- نصار : بعدين إيه ؟
- فردوس : قلبى كلنى ماقدرتش .
- نصار : قلبك كلك ؟
- فردوس : بحبه يا عم الحج . ما عرفتش كله الا اما بعدت عنه .
على نياته وبحبه . ببقابه بحبه . بكلامه اللى زى
الطوب بحبه . بحبه بحبه بحبه ومستعديه اكنس البيت
كله وامسحه بلاطه بلاطه واعيش طول عمرى
خدماته .. هو فين ؟
- نصار : (هبتسما) جوه .
- فردوس : وما بقوللىش م الصبح ليه ؟ وسليم ؟ يبقى جوه وما
تقوللىش .
- (تتجه إلى الباب لتفتحه فيتقدم نصار ويفتح لها
الباب) .
- نصار : أهو يا ستى صاحب المقام الرفيع .
- مسعد : (من الداخل) جيتى ليه يابت ؟ هو الهاتف غير رأيه
ولا إيه ؟
- فردوس : (بحفاء) أيوه هناك . كانت البت خدماتك ؟ جايه
علشان نسيث المشط يا ادلعدى . تسمح من فضلك
تناولهنى .
- (يدفعها نصار دفعة خفيفة إلى الداخل ثم يغلق الباب)

بالمفتاح) .

(يمسك بالمفتاحين ويقول) .

نصار : ألف حمد ليك يارب ، الموجه وطلعنا منها سلام .
والنبي لصلى لك ركعتين شكر .

محمد : (يخرج من الباب الأرض مندفعاً) يا بابا . يا بابا .

نصار : مالك يابني ؟

محمد : يقولوا في الشارع أن ضرب النار حيقف بعد ساعه .

نصار : يقف والا يحشى ، أنا يهمنى إيه ما دام الولاد في جيبي ،
خللى اللي يحصل يحصل .

محمد : أخرج بقى العب شو به يا بابا ؟

نصار : ضرب النار حيقف ؟ دا لو كان صحيح اللي يقوله
أطلع أنا راتبر العب معاك . بقى القيامه تقوم وتنفض
وتخرج منها سالمين ؟

محمد : أنا رايح يا بابا . آه . أنا رايح .

(يخرج وظهره إلى الباب) .

(دقائق على باب الحجرة التي بها سعد) .

سعد : عارف ضرب النار حيقف يعنى إيه يا حج نصار ؟

نصار : يعنى الغمه انزاحت يابني .

سعد : يعنى الغمه حلت يا حج . يعنى الإنجليز خدوا البلد...

يعنى ضعنا .. ضاعت البلد وضعت أنا معاها .

نصار : لا البلد ضاعت يابني ولا انت ضعت . البلد موجوده

وحفضل طول عمرها موجوده . وضرب النار بك

وقف ، من غيرك وقف . إن كنت مت أهو كان

وقف . وأهو وانت عايش أهو برضه وقف . يعنى هو

ضرب النار كان حايفضل لو كنت انت خرجت

ومت .. بس لو خرجت انت ومت كنت

حاشا تقضى على وعلى العيلة . وآدى انت عشت وادى
احنا حانعيش معاك ، والبلد لسه عايزاك .

(لنفسه) مضبوط الكلام اللي بقوله ده والا مش
مضبوط ؟ طب لما هو مضبوط .. آمال أنا زعلان ليه ؟
ما دام الحكايه زى انا ما بقول كده م الصبح ، وانا
زعلان ليه ؟ زعلان ليه يا نصار ؟ زعلان من نفسك يا
تري ؟ والا من سعد ؟ والا من الانجليز ؟ والا من
الحرب والا من الدنيا ؟ يكونشى اللي عملته ده كان
غلط يا نصار ؟ بس يبقى غلط ازاي ؟ مش شغلة الأب
فى الدنيا إنه يحافظ على اولاده ؟ آمال أنا زعلان ليه ؟
أنا عملت حاجه أكثر من كده .

(الباب الخارجى يذق ويفتح فتدخل كوثر وملابسها
مقطعة وعلى رأسها خوذه من خوذات العساكر
الإنجليز وتحمل فوق الخوذه صفيحة ماء) .

كوثر : إيدك يا بابا .
نصار : إيه ده يا بنتى ؟ (يساعدها فى إنزال الصفيحة) إيه
اللى انت لابساه ده ؟

كوثر : برنيطة واحد إنجليزى أدغالى جوده الفران . آمال إيه
يا بابا دا الناس بره زى الوحوش ونازلين فيهم تفتيل .
آمال فاكرو إيه يا بابا ؟ انت مالك كده ، مالك
صحيح ؟

نصار : مش عارف يا كوثر .. باينى زعلان .
كوثر : زعلان مني ؟
نصار : وحالزل منك ليه يا كوثر ؟
كوثر : عشان قلت لى ما تخرجيش وعرجت .
نصار : أيوه صحيح دا حصل .. إنما أنا مش زعلان من كده .

كوثر : الله ! آمال زعلان من إيه ؟
 نصار : والله مانا عارف يا بنتي .. يمكن عشان منعت سعد .
 بس انا لازم امنعه ، ولو ما منعوش كنت زعلت قوى ،
 فازاي لما منعه أزعل ، دى حاجه تجنن .. أنا منعه
 وأدبت واجبي وأرضيت ضميرى ونجى سعد وبقت
 الأشياء معدن والحمد لله فأزعل ليه ؟ حد يزعل لما
 يكون عمل اللى عليه ؟ يمكن فيه حاجه ثانيه .. لازم
 فيه حاجه ثانيه هى اللى مزعلانى .. مالك يابت واقفه
 تبصى لى كده ليه ؟ بتفرجى علىّ والا إيه ؟ افرشى لى
 سجادة الصلاة . مالى ؟ بقيت فرجه يا ست كوثر .
 (كوثر تحضر السجادة وتفرشها قريّة من الباب
 الذى يdq عليه سعد) .

كوثر : ح تصلى إيه يا بابا ؟
 نصار : أحمد ربنا يا بنتي . دا انا طماع قوى . أصلى ركعتين
 شكر على القيامه اللى قامت دى .. وربنا خرّجنا منها
 بسلام . زعلان مش زعلان ألف حمد لك يارب .
 (يقبل يديه ظاهرا لباطن) ألف حمد لك يا رب .

سعد : بقى يرضيك كده ان كل الناس تدافع عن البلد وأنا
 ما اشتر كشى ؟ يرضيك انك تعيشنى بعد كده زليل ؟
 أمى المعركه اللى أنا مستيتها انتهت ، أجيها منين
 دلوقتى ؟

كوثر : ما تزعلشى يا بابا شهنش . الناس يقولوا بره انهم ح
 يفضلوا يضربوا لما الإنجليز تطلع .. إبقى اضرب بقى
 معاهم . ما تفتح له الباب . ده دى ! ما تفتح الباب
 بقى يا بابا .

نصار : أقول لكم إيه بس ؟ هو لو كان بإيدى يا غجر

كنت قفلته عشان يبقى بإيدى إني أفتحه ؟

(تسمع ضجة فى الخارج) .

كوثر : الله ! لحسن يكونوا جم .

نصار : هم مين دول ؟

كوثر : الانجليز .. الله ! أصلهم بيخشوا البيوت يفتشوها

ويضربوا اللي يلاقوه فيها .

(يبدأ المدخل والسلم يمتلئ بمجموعة من العساكر

الانجليز وهم يرتدون ملابس الميدان ، وعلى رأسهم

ضابط نحيف قصير القامة ذو كاب أحمر) .

نصار : إيه الكلام الفارغ اللي بتقوليه ده ؟ دى حاجه تخش

العقل ؟ هو طول ما الواحد ملازم بيته إيه اللي يجيب له

الانجليز ؟ ذا البيت ما خرجشى منه ولا طلقه . يجحوا

منين ؟ ما هو تعملي حسابك يا بنتى .. خديها قاعده

على ميزان الميه ما دام ما تأذيش حد .. ما حدش

ياذيكى .

كوثر : طب أروح أشوف ؟

نصار : اعقلى يابت جك داء يطير عقلك ، امشى روحى هاتى

شويه مابه من الصفيحة وتعالى صبي لى أتوضا .

كوثر : دول باينهم جم صحيح يا بابا .

نصار : هى كلمه ! بالله يا بت .. قلت لك قاعده على ميزان

الميه . إيه اللي يجيبهم ؟

سعد : يارب يجحوا . دا تبقى هى اللحظة اللي طول عمرى

بأتمناها .. بس لو أطول رقبة واحد فيهم !

(يدخل نصار من الباب الأرض وفى أعقابه كوثر) .

الضابط الإنجليزي : انتما الانسان - إلى السطوح .

فتشاهما بدقه . أطلقوا النار على أى شىء يتحرك .

وانتما - إلى الطابق الأعلى .

سبنسر . جيمس ، بيكر . منطقة السلم .

هندرسون . الطابق الثانى .

آرثر ، هذه الشقة (مشيراً إلى باب الشقة المقابلة) .

جورج . هذه الشقة (مشيراً إلى باب نصار) اسمعوا

جيداً . لابد من تنظيف المساكن فى ظرف نصف ساعه .

كل من يرتدى الكاكي اقبضوا عليه وإذا قاوم اقتلوه .

أجل اقتلوه . وكذلك المدنيين . احذروا ! قد يأتيكم

الخطر من أى مكان . لا تتركوا شيئاً للصدفة . هذا

شعب فى غاية الدهاء . من ينتهى ينتظر على الباب .

نلتقى فى الخامسة تماماً . النساء .. لا يندعنكم ، حتى

النساء هنا ملعونات . وتذكروا ! أتم جنود الملكة .

وشرف الإمبراطورية فى أيديكم . وعلى ما تفعلون

يتوقف مصير الحضارة فى الغرب . وأن يفقد أحدكم

حياته إهانة فوق أنها خيانه ، نلتقى فى الخامسة ،

وحظ سعيد . والآن ... اذهبوا !

(يختفى الجميع ما عدا آرثر وجورج) .

جورج : (عسكرى إنجليزى من مشاة الأسطول فى حوالى

الثلاثين ، قامته تميل إلى القصر وصلعه مبكر وله

كرش صغير ومعه مدفع كارل جوستاف) . ستدخل

هنا يا آرثر (مشيراً إلى باب الشقة المقابلة) .

آرثر : (زميل له ، طويل وضخم وملاحه كبيرة وقاسية

وعينه محمرتان ويبدو كما لو كان فى حالة سكر) .

كما ترى .. أنبادلتى ؟ أنت تعلم أنى موفور الحظ فى

هذه المناسبات .

جورج : موفور الحظ ؟

- آرثر : دائما حظى من نار .. ما دخلت مكانا كهذا فى أى بلد حاربنا فيه إلا وظفرت بكبشة فيران .
- جورج : أتمنى الا يظفر بك هذه المرة فأر منهم .
- آرثر : هذا كلام خائف يا جورج .. هل أنت خائف ؟
- جورج : أنا ؟ ... لست أدرى .
- آرثر : أنا أدرى .. أنا مستعد أن أقتل ألفا من هؤلاء المصريين قبل أن يقتلنى أحد .
- جورج : أما أنا فمشكلتى أنى أخاف أن يقتلنى هذا الأحد .
- آرثر : أصادق أنت ؟ هذا جبن .. أنت تعلم أن هذا جبن .
- جورج : لماذا لا تسميه حب الحياة يا آرثر ؟
- آرثر : ولماذا تهبها هذا الحب الضعيف ؟ الحياة فى حاجة إلى القوى لينزعها ويحيها .
- جورج : وإذا مات وهو يتزعها ؟
- آرثر : كان هذا أروع من حياة عاملة .
- جورج : عندك حق .. فليس ورائك من يمته قتلك . ليس لك شيرلى كابتنى تنتظرك فى سوئهامبتون ، ولا تريدك أن تعود إليها مجرد إخطار من وزارة الحرب بوفاتك .
- آرثر : أرتفضل أن تعود جباناً ؟
- جورج : الحقيقة أنى أفضل أن أعود فقط يا آرثر .
- آرثر : اسمع يا جورج ! طبعاً انت تقول هذا الكلام على سبيل المزول . أليس كذلك ؟ أنت تعلم أننا فى الحرب ولا عمل لك إلا أن تقتل والا قتلت . أنت تعرف أن الحرب هى الحرب ، إذا لم تقتل عدوك قتلك عدوك . هل تترك هذا ؟ إذا تراخيت ضعت . كم ساعتك ؟
- جورج : لا يضع دقائق ؟ أذكر أن ضابطنا القصير الأحمق قال إن الصفر هو الرابعة والنصف . أتعرف هذا ؟ بعد

لحظات إما أن تموت أنت أو يموت عدوك ، وعليك أن تختار من يكون القتال ومن يكون القتيل .

جورج : أنا شخصيا لا أريد أن أموت .
 آرثر : وثق أن عدوك هو الآخر لا يريد أن يموت .
 جورج : لست أدري لماذا على أحدهما أن يقتل الآخر . أليست هذه مهزلة ؟

آرثر : بل هي سنة الحياة ، فالحياة لا تحتل إلا أحدكما .
 جورج : من زيف على الحياة هذه السنة السخيفة ؟
 آرثر : وهل هذا وقت مراجعة الحقيقى والمزيف يا أحمق ؟
 راجع كما شئت فستجد نفسك دون أن تحس جثة هامدة حتى قبل أن تصل إلى نتيجة ، هذه اللحظة لا خيار لك إما قتال وإما مقتول ، فماذا تفضل ؟
 (يدخل نصار وقد توضعاً ويقف على السجادة وينوى للصلاة) .

جورج : إذا كان لابد لأحد أن يموت ، فلا أريد أن أكونه على أية حال .
 آرثر : أتمنى ألا تكونه ، فقد حانت ساعة الصفر وجاءت اللحظة الحرجة يا صديقى فتقدم ، وأتمنى لك حظاً سعيداً .

جورج : أجل ! نحن لى أرجوك فإنى حقيقة فى حاجة إليه .
 (يركل باب نصار بقدمه ركلة قوية فيفتحه ويصرخ بصوت مرتفع) .

لا أحد يتحرك أيديكم أعلى . شفت أسكر ؟
 سعد : (يشهق) دول جم . (ينظر من ثقب الباب)
 أسكر ؟ دا بيدور ع الغدائيين .. دا بيدور علينا .. آه يا ابن الكلب أقتلك ازاي دلوقتى ؟ الباب مقفول ؟

أخطر شيء الهدوم . (يخلع ملابس العسكرية بسرعة ويرتدى جلبابا من جلابيب أبيه ويخفى الملابس العسكرية أسفل الدولاب) لازم استحيى ، فين بس يا ناس ؟ (ينظر بعينين زائفتين إلى محتويات الحجره) الدولاب . (يفتح الدولاب) مسلسل بابا ايه . تضربه يا واد ؟ بس ازاى ؟ إذا غلطت فى النيشان ضعت انت وضاع أبوك .

(يخفى المسلس مع الملابس أسفل الدولاب ثم يدخل فى الدولاب ويقفل على نفسه) .

نصار : (ينظر إلى العسكرى) الحمد لله رب العالمين .. الله ! إيه اللي جاب الراجل دا هنا ؟ دا البيت ما ظلعشى منه ولا طلقه ؟ عايز إيه ده ؟ كمل صلاتك يا وله ولا يهملك . مالك يوم الدين . إياك نعبد وإياك نستعين .

جورج : (بصوت مرتفع جدا) لا أحد يتحرك . أيديكم إلى أعلى . (ثم لنفسه) لماذا أنت عصبى هكذا يا جورج ؟ لماذا أنت مضطرب ؟ الرجل أعزل كما ترى وليس معه أحد ، فماذا تخيفك ؟ كف عن ارتعاشك يا جورج . هؤلاء هم الأعداء إذن . (ثم بصوت مرتفع) شفت أسكر ؟ انطق يا جبان (يصرخ) أيديكم إلى أعلى .

نصار : غير المغضوب عليهم ولا الضالين . آمين . يا خويا هو متعفرت كده ليه ؟ حد داس له على ديل ؟ هم دول اللي يقول سى سعد عليهم الأعداء ؟ والنبي عقلك فارغ يا سعد . مش ده يا ولاد الكوبرال لاصكى اللي كان معانا فى طبرابلس والا انا ما باشوفش . ماله متقنرح ليه ؟ دا كان يقول على نفسه ثچار وما

- ١١٣ -

كانشى يعرف يعشق اللوح فى اللوح . لاه ، ذا باينه
مش لاصكى . أهو شيهه . لاصكى والا جورج ،
كمل الصلا يا واد انت ح يهملك منه ؟ كنت عملت له
حاجه ؟ بسم الله الرحمن الرحيم . وإذا سألك عبادى
عنى فأنى قريب .

سعد : (يخرج من الدولاب) أنا اتخفتت .. تحت السرير
أحسن ، أبوك بره مع العسكرى لوحده تسيه كده ؟
يمكن يعملها بعقله . بس يعملها ليه هو كان عمل فيه
حاجه ؟ آه لو كان الباب مفتوح كنت وريتك شغلك
يا ابن اللئيمة . (يدخل تحت السرير) .
جورج : أيديكم إلى أعلى . حركة واحدة وأطلق النار . انطق .
شفت أسكر ؟

نصار : عمال بيرطم يقول إيه الراجل ده ؟ حد كلمه ؟ وإذا
سألك عبادى عنى فأنى قريب أجيب دعوة الداعى ..
جورج : انطق يا غبى . لا أفهم لغتك المتوحشة هه . اين
الكوماندوز المختفين ؟ انطق أيديكم إلى أعلى . حركة
واحدة وأطلق النار .

سعد : (خارجا من تحت السرير) بسهوله يلاقيك تحت
السرير . أحسن طريقه تنام ع السرير ده وتعمل عيان .
(يصعد إلى الفراش ويستلقى) بس مش عيبه دى ؟
معلش . حاسب إوعى تطلع صوت لحسن يضيع أبوك .

نصار : قريب أجيب دعوة الداعى إذا دعان فليستجيبوا لى
وليؤمنوا بى لعلهم .. وبعدين ؟ لازم أركع . والراجل
ده باينه مش عايزنى اتحرك . تركع ؟ يمكن يضربك
يا واد . بس يضربك ليه ؟ ما دمت ما آرتوش بأزيك
ليه ؟ اتوكل على الله واركع . الله أكبر . (يرفع يديه
إلى أذنيه) .

جورج : أيديكم إلى أعلى ، انحزس يا جورج . إنهم ملاعين .
عقولهم مظلمة وقلوبهم أكثر ظلاما . ولا تعرف ما
يحتويه الظلام من مكر (بصوت مرتفع) حركة واحدة
وأطلق النار .

نصار : الله أكبر (يركع) .
جورج : يركع ! هذه خدعة . لابد يريد قتلى . حركة واحدة
وأطلق النار . أيديكم إلى أعلى .

نصار : الله أكبر ! (يعتدل استعدادا للسجود) هو اتعفرت
كده ليه ؟ تسجد يا واد والا ما تسجلش ! هو عمل
حاجه لما ركعت ؟ اتوكل على الله واسجد .

جورج : حركة واحدة وأطلق النار .. أيديكم إلى أعلى .
نصار : الله أكبر ! (يسجد) .

جورج : خذ إذن أيها المتوحش .

(يطلق النار على نصار فى نفس الوقت الذى يدوى
فى الخارج صوت انفجار قريب . نصار يقع على
الأرض ويضع يده على صدره مكان الإصابة ، وينظر
فى ذهول شديد إلى جورج) .

سعد : إيه ده ؟ دى رصاصه . فى المليان . مش معقول ؟ دى

بره فى الشارع . إوعى تتحرك أحسن أبوك يضع .

نصار : (فجأة يصرخ بصوت مرتفع) يا كلب ! (ثم بصوت منخفض) تأخذنى على عوانه يا مجرم ؟ تقتلنى وأنا مآمن لك ! الله ! (بصراخ عال) دا انت عدو . دانت عدوى ولا نيش دارى (بصراخ) . كده تغدر بى يا عدو الله ؟

سعد : شوف الراحل يا ناس .. أفضل أناقشه سنين وما يقتنعش الا دلوقتى . ياترا إيه اللى أقتعه ؟

نصار : (وهو يهم بالقيام) دا انت .

جورج : مكانك .

(يسدد إليه المدفع) .

نصار : أدبنى .. مستنى إيه ؟ خلص على يا بطل . إدينى كمان .. إدينى واخللى الدم ده يسيل (يتأمل يده الملوثة بالدم) دم . دم حقيقى . دم من قلبك سخن . دمك يا نصار . ماله اسود كده إيه ؟ (يحدق حوله بعينين مفتوحتين) دا الدنيا كلها سوده ، أنا عميت ... أبدا ! بيتهيالى أنى فتحت (بصراخ) أنا شايفك يا كلب . بس يا خساره بعد فوات الأوان . بقى ما تفتحش إلا على رصاصه يا نصار ؟ تستاهل دا الأعمى هو اللى ما يشوفشى عدوه . وأنا عشت طول عمرى أعمى ودلوقت بس فتحت . ادبنى كمان والنبي خلىنى أموت .

جورج : (بهمس سريع) بالتأكيد كان بنوى قتلى .. أنا كنت أدافع عن نفسى .. ما أدرانى أنه لم يكن مسلحا ...

المكان لم يعد مأمونا .. للهواء كان فيه أنفاس ألف رجل .
من الواجب أن أذهب بسرعة (يتراجع بخطى حذرة
وظهره إلى الباب) .

نصار : أموت فطيس كله . حتى ولادى قافل عليهم بإيدى
(بشهيق رهيب) أموت فطيس ؟

سعد : ليه السكوت ده ؟ هم خرجوا ؟ تقوم ؟ لأ خليك
مكانك لحسن تكون خدعه .

(يأتى صوت موسن من خلال الباب الأرض وهى
تبكى وتقول) :

سوسن : بابا ... بابا .

جورج : (وهو عند الباب) من ؟ ماذا أسمع ؟ أنا أعرف هذا
الصوت (يتوقف ويعود إلى الداخل) هذا بكاء ابنتى
شيرلى ؟ شيرلى ؟ هنا لقد تركتها فى سوئها مبتون مع
عمتها ، ماذا أتى بها إلى هنا ؟

(تظهر سوسن عند الباب والنوم لا يزال يملأ عينيها
وهى تدعكهما وتبكى) .

سوسن : بابا .. بابا عايزه حصان .

جورج : من ؟ شيرلى مستحيل . ولكنها تشبهها تماما . تماما .
الشعر والملامح وطريقة البكاء ونفس الكلمة . بابا .

سوسن : بابا .. بابا . الله عايزه حصان يا شيخ .

(تتقدم إلى الداخل بضع خطوات) .

جورج : لا . مستحيل . ليست شيرلى .

سوسن : (تتجه إلى أبيها وهى تبكى) بابا . عايزه حصان يا

بابا .



جورج : أنت ابنته ؟ انت عدوة إذن ؟ (يصبو المدفع إليها)
لا أحد يتحرك . أيديكم إلى أعلى . حركة واحدة
اطلق النار .

(سوسن تتقدم ناحية أبيها ووجهها إلى جورج) .

سوسن : مين ده يا بابا ؟ الله عايزه حصان يا أخى (تبكى) .

جورج : قلت لا أحد يتحرك . أيديكم إلى أعلى . حركة واحدة
واطلق النار (بصراخ) أيديكم إلى أعلى .

(تنظر إليه سوسن وتتوقف ، ثم تخاطب اباه مشيرة
إلى المدفع الذى فى يد جورج) .

سوسن : باب .. عايزه .. مش عايزه حصان . عايزه دهب .

جورج : لماذا تشير إلجى ؟ ألا يَتمَل ؟ لا . مستحيل . لا تدع
طفلة منهم تتدعك . لا أحد يتحرك . أيديكم إلى أعلى .

سوسن : بابا . هات لى البندقية دى .. هاتلى دى .

(بعد أن كانت فى طريقها إلى أبيها تتحرك ناحية
جورج) .

جورج : (بذعر) قلت لك قفى .. حركة واحدة وأطلق النار .
(سوسن ماضية فى التقدم ناحيته) .

جورج : ده (يحرك التلك ويضغط على الزناد)

سوسن : (تسرع إليه) الله لآ . خلىنى انا أعمل كده . خلىنى
أنا أعمل كده أنا .

جورج : أيديكم إلى أعلى .. حركة واحدة وأطلق النار .

(تتقدم سوسن وتمسك ماسورة المدفع فيسدد جورج
الماسورة إلى قلبها) .

سوسن : خليه يديها لى يا بابا وأنا أديله بوسه . الله ! بابا .

- (تقولها وهي تنظر في حب إلى وجه جورج) .
- جورج : (والعرق يتساقط منه) ياإلهي ! إنها شيرلي . ولكني لا أفهم لماذا تتكلم هذه اللغة المتوحشة . شيرلي ؟
- سوسن : (وهي تنظر إليه ولكنها تخاطب أباه) بابا .. بابا .. عايزه ده .
- جورج : بحق الشياطين إنها ابنتي .. مستحيل .. إنها ابنته هل أنت ابنتي أم ابنته ؟ تكلمي .. تكلمي وإلا أطلقت النار .
- سوسن : (تجذب منه المدفع) إديني ده .
- جورج : (يدفعها بعيدا ويقول بجفاء) لا أنت ابنته . أنت عدوة . من يحاول أخذ سلاحى فهو عدوى . أيديكم إلى أعلى .
- (سوسن تجرى مذعورة إلى أبيها وتحتضنه بشدة وهي تنظر إلى جورج) .
- سوسن : بابا . بابا . قوم يا شيخ . قوم الله . قوم حوش الراجل . ده .
- جورج : أخفتها يا جورج . تبا لك . انت فظ .
- سوسن : (فى احتضانها لأبيها تكتشف الدم) الله ! إيه ده ؟
- انت دلقت على نفسك دواية محمد ؟ إذا عرف ح يموتك . الله ! دا مش حير . دا ييلزق . دا دم . دا دم بتاعك يا بابا .
- (تنظر إلى جورج وتتوقف عن الكلام ، ثم تقف وتشبك يديها فوق رأسها وتواجهه) .
- كده تمرر بابا . عورته ليه ؟ عورت بابا ليه (تبكى) .

جورج : (وهو لا يزال مسددا إليها المذفع) يا إلهى ماذا تقول ..؟
 رأسى يتفجر . أكاد أفهم ما تقول . أكاد أفهمه كلمة
 كلمة . لغتهم لم تعد متوحشة . إنها على لسان الأطفال
 مفهومة . لكانها شيرلى التى تكلمنى .

سوسن : (بجدّة) عورت بابا ليه يا بايخ ؟

جورج : (بانهاز) تماما . تماما . أعرف ما تقولين . أنت

تعاتيينى . أنت تحاكميننى . (بصوت عال) بحق

الشياطين أكاد أجن . لوكنت واقفا أمام الله يوم

القيامة لما أحسست بخجل كهذا . سامعنى يا صغيرتى ،

لقد كنت فى حالة دفاع شرعى عن النفس .

سوسن : هو بابا كان عمل لك حاجه ؟ تعوره ليه ؟ إنت مش

عارف إن ده بابا ؟

جورج : يا للهول ! سامعنى يا صغيرتى ... لم أكن أعرف أنه

أباك . كنت أظن أنى جئت لأقاتل جنودا .. والجنود لا

يظهر لهم أطفال ... وإذا بى ...

سوسن : وإيه اللى جابك هنا يا بايخ ؟ دا بيتنا ، جاي بيتنا ليه

يا بارد ؟ حد كان قال لك تعال ؟

جورج : عفوك يا صغيرتى ، هم الذين أتوا بى إلى هنا رغما عنى

وقالوا : اقتل كل من يتحرك . وحين تحرك أبوك

قتلته .. أنا لم أكن أريد هنا .. أنا لم أكن أريد ترك

ابتى . حتى الخطابات بمنعوتنى من كتابتها إليها حفظا

لأسرار العملية .. أنت لا تعرفينها .. هى مثلك تماما ،

واسمها شيرلى . إنك هى ، أليس كذلك ؟ يا إله

السموات ، خذنى إلى جحيمك فوراً .. فأهون عندي

- أن أموت مائة مرة ولا أواجه هذه الطفلة .
- سوسن : وواقف هنا ليه يا تلم ؟ امش من بيتنا . هو ده بيتكم دا بيتنا احنا . امشى ! روح بيتكم ! انتم مالكوش بيت ؟
- سايب بيتكم وجاى بيتنا ليه يا تلم ؟ يالله (تذهب إليه وتجذبه من بنطلونه وتدفعه إلى الخارج) يالله .. روح بيتكم .. يالله .. انتم مالكوش بيت ؟
- جورج : لا تدفعينى أرجوك ، شيرلى ابنتى لا تفعل هذا .
- سوسن : ح تمشى والا اضربك بالبنقية ؟ هه (تجذب منه المذفع) .
- جورج : (بزعميق هائل) لاه . أفق يا جورج .. ابعدى يا عدوة .. أيدىكم إلى أعلى .. حركة واحدة وأطلق النار .
- سوسن : (تراجع مذعورة من صراخه وتبكي ثم تتابها حالة غضب طقولى جامع وتبحث عن الأحذية والقباقيب وتدفقه بها) امشى يلعن أبوك ابن كلب . يالله على بيتكم يا ابن الكلب . امش انجر من بيتنا .. امشى !
- جورج : بحق الشياطين سأقتلك . فلتلحقى بأبيك إذن (يأخذ وضع استعداد ويحرك الزناد) فلتلحقى به .. أنا فقط أَدافع عن نفسى ، فلتلحقى به .
- (الضابط يدفع الباب ويدخل ومعه عسكريان) .
- الضابط : لماذا تأخرت يا عسكرى ؟ ما الذى أخرك ؟ تكلم .
- جورج : (لنفسه وهو يغير من وضع المذفع) أنت ؟ بحق العذراء لقد جئت فى الوقت المناسب (ثم للضابط) سيدى اقبض علىّ .
- الضابط : أقبض عليك ؟ لماذا ؟
- جورج : لقد ارتكبت جريمة .

- الضابط : جرمك الوحيدة الآن أن تكون قد أعملت فى تنفيذ الأوامر وإطلاق النار .
- جورج : جرمي يا سيدى أنى نفذت الأوامر .
- الضابط : إذا ليست هناك جريمة .. ماذا فعلت ؟
- جورج : قتل هذا الرجل .
- الضابط : وما الجريمة هنا ؟ لقد قتل عدوا .
- جورج : لا يا سيدى ، لقد قتل أبا .
- الضابط : هنا عدو .
- جورج : هذا أب .
- الضابط : أب من ؟
- جورج : أب شيرلى .
- الضابط : شيرلى من ؟
- جورج : شيرلى ابنتى .
- الضابط : (بابتسامة صفراء) قتل نفسك إذن ؟
- جورج : أجل يا سيدى ، هذا بالضبط ما حدث . لقد قتل نفسي .
- الضابط : (للجنديين) صدمة حرب . أف ! تبا لوزارة الحرب هذه . هراء وسخف . لماذا يأتون بهؤلاء الضعفاء الحمقى لكى يقاتلوا ؟ الحرب يلزمها رجال أقوياء ، وهؤلاء مجرد أطفال يفقدهم مرأى الدماء عقولهم .
- جورج : جرداه من السلاح .
- الضابط : (يحاول العسكريان انتزاع المدفع من جورج) .
- جورج : اذهبوا يا كلاب ! تريدونه لتنفيذ الأوامر وقتل أنفسكم . اذهبوا عنى .

- الضابط : قلت لكما جرداه من السلاح ..
(يحاولان مرة أخرى ويفشلان) .
- جورج : حسنا ، دعوه ! تحرك يا عسكري ... باسم الملكة تحرك .
كيف أتحرك ياسيدى ؟ لقد قتلت نفسك .. أنا رجل ميت فكيف أتحرك ؟
- الضابط : (وهو يهدده بمسدسه) تحرك يا عسكري وإلا أطلقت النار . تحرك . أيدىكم إلى أعلى .. حركة واحدة وأطلق النار .
تحرك يا عسكري .
- جورج : الموتى لا يتحركون يا سيدى .
- الضابط : حسن احملاه قسرا واذهب به فورا إلى مستشفى الميدان .
(يتعاون العسكريان على حمله فيما بينهما) .
- جورج : لا ، لا ، لا أريد الذهاب إلى المستشفى . لا أريد. بحق السماء خذونى إلى سوثهامبتون بلدى ووارونى الشراب هناك ، ولا تنفروا شيرلى . بالله لا تنفروها .
(يخرج العسكريان وهما يحملان جورج وخلفهما الضابط) .
- الضابط : (وهى ترفع رأسها من حضن أبيها) بابا ! ياخى قوم .
بقى الإنجليز ماشيين قوم تفرج عليهم قوم .
قوم يا شيخ ! طب أعمل لك البيضة وتقوم ؟ (تمسك أصابع يده) آدى البيضة . وآدى اللى شواها وآدى اللى قشرها . وآدى اللى قال مات حتة ، لحسن أقول لأصحابها . زغرغزغ (ترغزغه) الله ! طب والله ان ما ضحكت لمخاصمك . هه ! (تخاصمه بأصابعها)

- ١٢٣ -

أنا مخلصاك . (تبكى) .

سوسن ، سوسن ، هم مشيوا ؟ (يهبط من فوق السريو) . الملوء ده مريب قوى . أنا حاسس ان فيه حاجه . (ينظر من ثقب الباب ويهمس بصوت خفير) سوسن ، سوسن . (يهمس لنفسه) أنا سامع حاجه أنا شامع حاجه . (يحط على الباب بشدة) افتحوا الباب ، افتحوا الباب .

سوسن : (تكف عن البكاء) افتحه أنا يا أبيه ؟

سعد : (بعصبية) ما تعرفيش انت يا سوسن .. افتحوا الباب .

سوسن : لا ، أنا أعرف . ماما بتقول أنى اقدر افتحه .. أوريك ؟

هه .

(ترك أباه وتوجه إلى الباب وتزدد هنيهة . ثم تدير

الأكرة وتلفع الضلفة فيفتح الباب) .

سعد : مين اللى فتح يا سوسن ؟

سوسن : أنا .

سعد : فتحتيه ازاي . جيتى المفتاح مين ؟

سوسن : أنا مالى هه ، أنا عملته كده (تدير الأكرة) راح

مفتوح .

سعد : راح مفتوح ؟ (تألها بعينه فى أنحاء الصالة) يعنى كان

مفتوح م الأول ، وازاي ما أعرفش دى ؟ الباب كان

مفتوح . الباب كان مفتوح . أعبط والباب كان

مفتوح ؟

(يتقدم وفى عينيه رعب وغضب وذهول ، ويقرب

من أبيه ويحدق فيه ، ويتحسس جبهته ، وعسك يده

وهو يتمم بكلمات غير مسموعة . يتحرك رأس
نصار في بظء ويفتح عينيه) .

- نصار : سعد ؟
- سعد : بابا الباب كان مفتوح ، الباب كان مفتوح .. وجرى
لك إيه يا بابا ؟
- نصار : واحد إنجليزى ابن كلب هزر معايا يا سعد هزار ثقيل .
- سعد : عورك يا بابا ؟
- نصار : لا .. قتلنى .
- سعد : قتلك ازاي يا بابا ؟ مش معقول . دا الباب ..
- نصار : (مقاطعا) معلش ! ضحكت عليك انا فى حكاية
الباب دى .. دا كان مقفول على سنه يعنى سوسن
تقدر تفتحه ، وانت انتهى لك أنى قفلت عليك .
ضحكت عليك فى دى بابا شمنهلس .
- سعد : ما يمكن انا كنت عارف يا بابا ؟
- نصار : هو ده معقول يابنى .
- سعد : ما يمكن خفت يا بابا ؟
- نصار : هو ده معقول .
- سعد : أنا اللي قتلتك يا بابا .
- نصار : اللي قتلنى يابنى واحد إنجليزى .
- سعد : كنت اقدر افتح الباب بطلقة واخلج له .
- نصار : كنت قتلت نفسك وقتلتنى .
- سعد : بس يرضيك إني اشترى حياتى بالخوف ؟
- نصار : معلش ! وفيها إيه دى ؟ أصل اللي رباك يابنى كان
ميت م الخوف عليك ، ماتطلعشى ليه انت ميت م

الخوف على نفسك. يلعن أبو اللي رباك . يلعن أبويا أنا .
سعد : انت دائما تخلى نفسك مسئول عن كل حاجه يا بابا ؟
حتى عن خوفى .

نصار : ياخي يا أبو السعود ! معلش خلاص أنا انتهيت . إنما
تعرف دلوقتى بس نفسى الأيام ترجع تانى واعيش تانى
عيشه تانيه غير اللي عشتها . أعيش ما اخافش . أعيش
ما استحملشى إهانه واربيكم تانى .. أريكم وأنا مش
خايف عليكم . على الطلاق بالتلاته إن اللي يرضى
يعيش ذليل حلال فيه الموت .

سعد : بابا ، بابا ، أنا عمرى ما شفتك زعلان كله . دى ،
دى أول مرة أشوفك فيها زعلان بجد .

نصار : أبوه يا سعد زعلان . من ساعة ما قلت لك خش
الأوده ودخلت وقفلت عليك وأنا زعلان . وما كنتش
عارف أنا زعلان ليه ؟ كان سهم الله نازل على ومش
عارف ليه ؟ يتهاى لى إنى دلوقت بس عرفت أنا كنت
زعلان ليه ؟

سعد : ليه ؟ ليه ؟

نصار : (وقد بدأ نفسه يصيح غير منتظم). زعلان .. عشان ..
انت .. طاورعتنى .. أنا كان لازم .. أقول لك ..
ادخل واقل عليك . إنما انت . أنت .. تطاورعتنى
ساعتها ليه ؟ تعرف .. لو كنت خالفتنى .. وخرجت
غصب عنى .. يمكن ما كنتش زعلت .. كنت يمكن ..
بينى وبين نفسى فرحت .. والله .. كنت ح .. افرح
إن شاء الله ينقطع دراعى .. مش من هنا .. من ..

(يسقط ذراعه بجانبه ، وتنحدر رأسه على كتفه ، ويتصاعد منه شخير غير منتظم .. شخير الموت . ثم لا يلبث أن ينتهي) .

سعد : (يحدق في أبيه طويلا ويضع أذنه على قلبه ، ثم يلوث أصبعه بالدم وينظر إلى إصبعه الملوثة ، ثم ينتقل بنظره إلى موسن ، التي ما تكاد تراه ينظر إليها حتى تبكى ويستمر بكاءها هنيئة .. وسعد يقول بهمس يكاد لا يسمع) ..

طاوعته ليه ؟ صحيح طاوعته ليه ؟ دا الباب كان مفتوح ، كان مفتوح ، كان مفتوح .

(يستمر يردد الكلمة وصوته ينخفض وينخفض حتى تتحول الكلمات إلى مجرد حركات من شفثيه المرتعشتين ، وفجأة يقفز من مكانه كالملسوع ويصرخ بأعلى صوته « آى . أبويا مات » . موسن التي كانت تفرج عليه وهي تشج تراجع مذعورة لدى سماعها الصرخة ويرتفع بكاءها وتستمر تبكى بكاء متصلا إلى آخر المشهد . يقرب سعد مرة أخرى من جثة أبيه ويواصل كلامه فى همس مذهول). أبويا مات . أبويا مات . مات .. مات .. مات ..

(يكرر الكلمة وصوته يرتفع بها من الهمس إلى الصراخ) مات .. مات .. مات .. مات .. والباب مفتوح .

(يجرى ويتحجل فى الصالة ويكلم الجداران وقطع الأثاث) أبويا مات والباب مفتوح ، أبويا مات والباب مفتوح ، أبويا مات والباب مفتوح . (يتوقف ويدق

على الحائط دقات منتظمة) أبويا مات ، أبويا مات ،
 أبويا مات ، أبويا مات . (يصرخ فجأة) هاو أو ...
 (يجرى راتحا غاديا فى الصالة) هيه .. يا حلاوه يا
 ولاد .. أبويا مات ، أبويا مات ، أبويا مات .

(ينحنى ويواجه سوسن ويمسكها من كفيها وهى
 سادرة فى بكانها) أبويا مات يا سوسن . مات . وانا
 باخبط ع الباب والباب مفتوح ، الباب مفتوح ، الباب
 مفتوح . (يقف فجأة وكأنه يخاطب السماء) نظرية
 الضغوط العاليه فى عمل الأفران . غموت وتتحيا مصر أنا
 هيمان وبيا طول هيامى . عاش الطلبة مع العمال
 الكفاح كفاح الشعب . (ينهال على باب مسعد
 خبطا) افتح يا مسعد بابك افتحه . أبوك مات يا خويا.
 قافل على نفسك ليه ؟ (يخط الباب بقدمه خبطة قوية
 فيحطمه ويفتحه) افتحوا الأبواب .. أيها الناس افتحوا
 الأبواب . (يسمع صوت انفجار مروع قريب وينهار
 المنزل المجاور وينهار معه المثلث الأعلى الداخلى لحائط
 الصالة الأيمن ويمتلئ الجو بغيار ودخان) إديله ..
 أيوه كله . انهارى يا بيوت ، واندكى يا بلد ،
 واتزلزلى يا سما ، واقتحى بطنك يا أرض وابلعى الدنيا .
 (ثم يختنق صوته بالبكاء) دا أبويا مات ، دا أبويا
 مات .

مسعد : (يظهر على بابهِ خاتر القوى فى غاية الشحوب) إيه
 اللي جرى يا سعد !
 (فردوس تخرج وراءه وتقبل كوتر من الداخل)

ويكيان معا ويندبان نصار صامتين ويفردان فوقه
(ملاءة بيضاء) .

سعد : احنا جدعان قوى يا مسعد .. أبويا مات .
(يدخل جريا إلى حجرة النوم التى كان مختبئا فيها .
يتقدم مسعد كالماخوذ إلى الجثة ويركع بجوارها
وتهطل من عينه الدموع . ويرفع يد أبيه إلى شفتيه
ويقبلها) .

مسعد : الله برحمك يا بابا .
(يخرج مسعد من حجرة النوم مندفعاً وفى يده
مسلم) .

سعد : (يلحظه مسعد فيشب عليه ويوقفه) .
مسعد : رايح فين يا سعد ؟
سعد : اوعى سيبنى .
مسعد : انت أبتجنت ؟ دا قبل ما تضرب طلقه واحده تكون
مت .

سعد : انت اللي أبتجنت .. إوعى سيبنى آخذ بتاره .
مسعد : هو ده وقت التار ؟ الناس بتحارب وانت عايز تأخذ
بالتار .

سعد : يعنى قصدك تقول إبنى مش قادر احارب ؟ ما تقولها
وتسكت . قولها يا جبان .. خايف تقولها ؟
مسعد : يا سعد عيب .

سعد : والله عال ! مسعد العيبط بقى يقول عيب . إيش
فهمك انت فى العيب ؟ هو العيب انى ما خدشى بتار
أبويا ؟ عيب انى باحبه ؟ عيب انه كان أحب واحد لى

ف الدنيا ؟ دا انت تلقاك فرحان .. دا كلام واحد

فرحان ده . افرح يا عم بقيت ريس العيله ، افرح .

مسعد : العيب انك تقول كده وابوك لسه دمه سايح يا سعد .

سعد : ما تنكلمشى انت عنه .. ما تمثلشى انك زعلان .. ما

يخلشى على الكلام ده .

مسعد : يا سعد أنا ابويا مات النهارده قصاد عيني ميت مره .

الناس ييموت لها أب واحد وأنا مات لى النهارده ميت

أب . كلهم ، كلهم ماتوا قدام عيني . كلهم اللبس

دهه ، والوش الاسمر دهه ، والدم الاحمر ده .. دا انا

مات لى النهارده ميت أب .

سعد : وأنا مات لى النهارده أب واحد .. إنما قد كل الأبهات .

دا ابويا أنا ده ، دا يسوى عندى الدنيا كلها . إوعى

تحيب سيرته على طرف لسانك ..

مسعد : يا سعد اختشى واسكت قاعد تهطرش فى الكلام ليه ؟

عمال تقول أبويا أنا بس .. ما هو كان أبونا كلنا ،

وكلنا كنا بنحبه .. وده وقت الكلام فى حبه .

سعد : بقى الكلام عن حبه هطرشه يا جاهل يا مجرم . دا

إجرام ده .

مسعد : أقول لك إيه بس ؟ اسكت بقى . انت كنت تعرفه

مين عشان تبه ؟ ح يالله كنت بيتجى كل أجازة زى

الضيف وغمشى . أنا عشت معاه وعاشرته .. أنا شفته

لما كان بيشتغل بمنطلون مقطع ، وشفته لما لبس الحرير

وقعد فى المكتب . شفته وهو بيتخانى ، وهو بيتوضا ،

وهو بيكذب ويزود عيني عينك فى الأسعار ، عشت

معاه وياما ضربني وقبحت فيه وجسري ورايا وحدفني بالعدة ، ودا كله خالني أحبه أكثر . على الطلاق حبيته أكثر . مش لأنه ولي والا صاحب كرامات والا حج ، لأنه أبويا اللي قوى وشفته ضعيف وشفته مزنوق وشفته جبار . اسكت ما تخليش اتكلم دا مش وقت الكلام . اسكت .

- سعد : آمال وقت إيه يا جعر ؟
- مسعد : عيب يا سعد أنا اخوك الكبير .
- سعد : اخرس بلا اخويا بلا عمي . أنا بعد أبويا مليش لا أخ ولا أم ولا خال . أنا لي أعداء بس .
- مسعد : أنا اخرس ؟ أنا اللي كنت أقول لاهوك اديني صاغ أشرب به شاي ، فيقول لي ما فيش الفلوس كلها رايته لاهوك سعد .. فأحس ساعتها كأنني شربت شاي . صحيح أنا لازم اخرس .. أنا لازم اخرس قوي .
- سعد : اللي ما يعرفش قيمة أبوه لازم يخرس .
- مسعد : واللي ما يعرفش قيمة اخوه ما يعرفش قيمة أبوه .
- هنية : (داخله) جابت ولد يا نصار وسموه علشان خاطري على اسمك . الله ! خير يا ولاد كفا الله الشر (تلحظ نصار) نصار ! ماله ؟ حبيبي ؟ لازم مات ؟ مت يا أعز الحبايب ؟ نصار ؟ الله ! كده ! أوع تكون عملتها . أوع تكون خدتنى غدر ومت (فردوس وكوثر تحاولان إمساكها ومنعها ولكنها تدفعهما وتجلس بجواره . ثم تتمدد بجانبه وتحتضنه وتظل ملتصقة به وهي لا تتكلم) .

- سعد : (يتجه إلى الباب فيعترضه مسعد مرة أخرى) أوعى
 سيني لحسن ودينى أسيح دمك .. سيني آخذ بشاره
 ويطلوا جبن بقى .
- مسعد : أنا اللي جبان يا سعد ؟
- سعد : بتقول إيه ؟ سامعين ، سامعين يقول على إيه ؟ سامعه
 يا سوسن يقول إيه ، السافل يقول إيه ؟
- مسعد : (بغضب) ما تخرس بقى ... كفايه بقى لحد هنا ،
 وكفايه ما تخليش الواحد يتكلم .
- سعد : تتكلم تقول إيه ؟
- مسعد : مش ح اتكلم أنا . خلى الباب يتكلم ..
- سعد : باب إيه يا عبيط ؟
- مسعد : الباب اللي كان مفتوح وقاعد تخبط عليه وتقول افتجوا
 الباب .
- سعد : وأنا كنت اعرف انه مفتوح ؟ ياريت كنت اعرف .
- مسعد : أيوه كنت عارف .
- سعد : انت كذاب . ستين كذاب فى أصل وشك .
- مسعد : مش ح ارد عليك . مش انت اللي كنت دايما تقول
 ازاي بقى أصحاب ورشة بشاره وكل أبوانا بتقفل ع
 الفاضى .
- سعد : أنا عمرى ما قلت كده .. انت كذاب .. عمرى ما
 قلت كده (يتوجه إلى الباب فيحاول مسعد مرة
 أخرى أن يعترض طريقه ، فيوجه سعد إليه لكمة
 يتحاشاها مسعد) انت خفت ؟ (ينفجر ضاحكا)
 هي هي هي . انت خفت ؟ أسيح صحيح ؟ هي هي

(يضرب طلقه من المسدس فى الهواء) صدقت إنى
ح اسبح دمك ؟ (يضرب طلقه أخرى) صدقت إنى
ح اسبح دمك ؟ (يضرب طلقه أخرى) صدقت إنى
رايح أحد بتار حد ؟ (يضرب طلقه ثالثة) .

مسعد : عيب يا سعد اعقل ، بلاش الرصاص اللي ف الهواء ده
يمكن ينفع .

سعد : هئى . الرصاص ينفع ؟ (يضرب طلقه أخرى) دا
الباب كان مفتوح وكانت واحده من دى كفايه
(يضرب طلقه أخرى) واحده كانت كفايه عشان
أبويا يعيش . الرصاص ينفع ؟ (يفتح خزانة المسدس
وينظر فيها ثم يغلقها) باقى واحده .. واحده بس .
(يخاطبهم جميعا) عارفين الرصاصه الأخيره دى لمين ؟
لى .. للبطل كى تنتهى المأساة . لى وحدى ..
سأستمع برصاصها المغلى وهو ينفق جمعتمى .

(ينتحى ركنًا من المسرح ويصوب المسدس إلى أذنه
اليمنى . تهب هنية واقفه وتندفع معها فردوس ومحمد
وسوسن وكوثر ويحاولون منعه) .

مسعد : (يدفعهم بعيدا ويصرخ بصوت كالرعد) ابعدى انت
وهى . سيبوه .. اوع حد يقرب له (يخاطب مسعد
الذى يقف وحيدا فى الركن وفوهة المسدس إلى أذنه)
إن كنت جدع اضربها .

هنية : (تصرخ فى فرع) الحقونا يا هوه .. حوشوا يا ناس
نصار مات والبيت ح يثرب .

مسعد : بس يا وليه ؟ سيبه . اضرب يا بطل ، اضرب .

سعد : أيوه سيبوني . ساعة الجدد سقطت في امتحان الرجاله ،
ولازم أتبح غصبن عنكم ، ح اتبح . اهه . شايقين ؟
ح اتبح . ح أبقى راجل ملو هدومي وقد كلمتي أهه .
(يغمره العرق وهو يضغط على الزناد وتتشنج
عضلات وجهه ثم لا يلبث أن يلقي بالسدس جانبا
وينهار) مش قادر . حتى دى مش قادر عليها . إذا
كان ما قدرتش اضرب الغريب أقدر اضرب نفسي ؟
(يتجه إلى مسعد ويعانقه ويخفى رأسه في صدره
ويقول بصوت مخنوق بالبكاء) أنا خفت يا مسعد
خفت ومانيش عارف إيه اللي خلاني أخاف . إيه اللي
قيدني وكفني وشل حركتي مش عارف ، مع أني
والله والله مانا جبان .

(ينخرط في نسيج صامت) .

(يلدو جورج متسللا على السلم في المدخل حافي
القدمين عارى الرأس وهو يحمل المدفع) .

جورج : شيرلى .. شيرلى .. أين أنت يا شيرلى ؟
سوسن : (تكف عن بكائها المتصل وتندفع تحتضن ميقان
أخويها المتعانقين مذعورة) حوشوا .. حوشوني .
الانجليز جم .

مسعد : الانجليز ؟
سعد : (رافعا رأسه من على كتف مسعد بدهشة شديدة)
جاين هنا ؟

جورج : شيرلى يا حبيبتي . لقد غافلتهم وهربت . كانوا يريدون
إبعادي عنك ولكنى لم أستطع يا شيرلى . سأخذك

وسنذهب معا إلى عمتك في سوئهامين ، وهناك ماما
يا شيرلى .

سوسن : دا اللى كان هنا .. دا اللى عور بابا .. هم راجعين
تانى بعد ما عوروا بابا ؟ دول جاين . أنا خايفه قوى
(تخفى رأسها فى ساقى مسعد وتبكي) .

مسعد : (يدفعها جانبا وقد انقلب شخصا آخر وينقض على
المسلس الملقى على الأرض ثم يأمر الجميع) على
جوه كلكم .

جورج : لماذا تبكين يا شيرلى ؟ هذا صوت بكائك أعرفه تماما .
ماذا ييكيك يا حبيبتي ؟ هل يضايقك أحد ؟ هل عندك
أحد ؟ أنا قادم يا شيرلى لا تخافى . هم يسألون إبعادك
عنى ولكنى سأقتلهم جميعا لأنقذك . بابا قادم لينقذك
.. أنا قادم يا شيرلى فكفى عن بكائك .

مسعد : اعملوا لكم مروه .. خذهم يا سعد وخش انت العيله
عايزاك .. خش .

سعد : عيلة مين وعوزة مين ؟ هات المسلس (يغافل
مسعد ويختطف منه المسلس) دا باقى فيه رصاصة يا
طلعت من إيد راجل وخذت تار راجل ، يا ما طلعتشى
ويعوت كلب . يا حاتطلع الأول وتقتل عدو ، يا
حاتطلع الآخر وأموت جبان . كلمه واحده مفيش
غيرها خش جوه خش .

جورج : (وكأنه يتحدث نفسه) صه ! هذا صوت الزعيم .
تبالك كيف تجرؤ على لمس ابنتى . وأنا بطل فى ضرب
النار . أنا قادم يا شيرلى وسأقتل الزعيم (ثم لنفسه)

خذ حذرک یا جورج وأنت تتسلل . لابد من مفاجأته
تحرک ببطء ويجوار الحائط .

سعد : (يدفع مسعد وبقية إخوته إلى الداخل) ما تضيعش
الوقت يا مسعد .

مسعد : أنا فذاك ياخويا .. وحياة رحمة أبونا تدينى المسلس .

سعد : والله لما يصحى ويطلبه منى هو ما اديهولك . خش !
جورج : (لنفسه بهمس) خذ حذرک يا جورج فلا بد أنه

ينتظرک فى الداخل ، وإذا لم تقتله قتلک . (ثم بصوت
مرتفع) سأعطیک يا زعيم درسا لن تنساه . جهز
نفسک للموت . (حين يصبح مسعد وحده ، يرتبک
ويرتجف المسلس فى يده ويغمره العرق وهو جالس
فى وضع استعد بجوار جثة إبيه) .

سعد : (ملتفتا إلى أمه التى كانت قد عادت إلى احتضان
جثة نصار) انتى هنا ؟ أنا راخسر بقول لسه
إيدى بترجف ليه ؟ إنت السبب .. إنت السبب فى
کل حاجه . قومى من هنا .. ابعدى عنى بقى .

هنية : أنا يابنى ، أنا عملت لك حاجه ؟ أنا قاعده أدعى لك
فى سرى .

سعد : (بعصبية شديدة) ما هى المصيبة فى دعاويكى .. دى
تعديد . طول عمرک تدعى لى وتندبى على . طول
عمرک ندابتى مش أمى . انتى أم الخوف . انتى مش
أمى . كفايه بقى ، قومى من هنا ، ح تقتلينى
بدعاويكى زى ما كنتى ح تقتلينى لما رفضتى أنعلم
العموم وأنا صغير ، فكنت ح اغرق لما كبرت ووقعت

فى الميه . قومى من هنا يالله .

هنية : كده ! هو انت فاكرنى ليه ؟ بقى يقتلوا نصار وتقول

على ندايتك ؟ نصار يقتلوه يا سعد ؟ (ثم بصوت

خطير) اسمع انت عايزنى أبقى أمك صحيح ؟

سعد : نفسى مره فى عمرى .

هنية : خد بتار ابوك .

سعد : يا سلام ! أول مره فى حياتى أحس انى مش مكسوف

ان لى أم . أول مره أحس أن ضهرى عمى وانى راجل

اقدر أحارب مليون . تعالى يا كلب قرب

على .. تعالوا كلكم .. تعالى يا جيش الإمبراطورية

بحاله .. أنا قدكم .. أنا أكبر منكم .. الدم ده دم أبويا ،

مش ح اشيله من هنا ، وكل ما أشوفه ح أغضب ،

وكل ما اغضب ح اضرب . تعالوا يا كلاب . وحق

أبويا الشهيد .

(يظهر جورج فجأة عند الباب . وفى نفس الوقت

يصرخ مسعد من الداخل « اضرب يا مسعد » .

وتطلق رصاصة من مدفع جورج ورصاصة من

مسدس مسعد ، ويواصل جورج إطلاق المدفع ولكن

فوهته تعلق فتصيب الطلقات ترابيزة السفارة ثم ترتفع

الفوهة وتصيب حقيبة النجار المعلقة على الحائط

فتسقطها ثم تصيب السقف ، ثم يسقط جورج على

ظهره والمدفع لا يزال لاصقا بكفنه والطلقات تخرج

منه إلى السقف .

تتوقف طلقات المدفع فجأة ، وبعد جزء من الثانية

تطلق رصاصة أخيرة وتنفرد ركبة جورج المثنية
ويفتح ذراعيه وهو يتأوه قائلا) .

جورج : لا تخمروا شيرلى ، بالله لا تخمروها . (ينشئ رأسه
وموت .

مسعد : (خارجا من الباب الأرض ووراء بقية العائلة) تسلم
إيدك يا سعد .. تسلم إيدك يا خويا .

(ثم يتوجه إلى جثة جورج ويحملها ويلقى بها من
الفجوة التى حدثت نتيجة لانهيال الحائط) ، إلى
حيث ألقت يا جونى .

(أثناء هذا الوقت يظل سعد محلقا إلى المسلم برهة ،
ثم إلى جثة أبيه) .

سعد : يعنى كان لازم تموت عشان أبطل خوف ؟ آه
يا حبيبى يا بابا .

(يعانق أباه ثم يكفكف دموعه ، ويتوجه بخطوات
ثابتة ناحية الباب الخارجى) .

هنية : على فىن يا بنى ؟ ح تعمل إيه ؟

سعد : اعمل اللى كان لازم اعمله من ساعتها .

مسعد : طب استنى شويه .

سعد : أنا اتأخرت يومين ، وكفايه تأخير .

هنية : ضب مش ناسى حاجه ؟

سعد : أبدا .

هنية : غلطان مش المره اللى فاتت كنت عايزين أزغرت لك

وانت ما شي ؟ (يتكسر صوتهما) نسيت دى ليه ؟
روح ! (تزغرد) ربنا يابنى يجمعك لشبابك . روح !
خلها من قلبى وروح ! تزغرد وتختنق زغاريدها
بالدموع) روح انحنى بدمهم روح ! معايا يا بنات .
النهارده فرحه ، واللييلة ليلة دخلته ودى زفته روح
دانت الليلة عريسنا . هو نصار مات عشان نحزن ؟
نصار ايه يا بنات .. راجلى ايه .. زغرتوا له ، روح !
(بنفس الخطوات الثابتة يغادر سعد المنزل وزغاريد
هنية وكوثر وفردوس تودعه مختلطة بطلقات المدافع
الرشاشة المتقطعة فى الخارج) .

(ستار)

« انتهت »

مؤلفات الأستاذ يوسف إدريس

(أ) مجموعات قصص قصيرة :

- ملك القطن وجمهورية فرحات

- اللحظة الحرجة

- الفراير

- المهزلة الأرضية

- المخططين

- الجنس الثالث

- البهلوان

- الإرادة

- عن عمد اسمع تسمع

- أرخص ليالي

- جمهورية فرحات وقصة حب

- أليس كذلك

- قاع المدينة

- حادثة شرف

- آخر الدنيا

- لغة الآي آي

- النداهة

- بيت من لحم

- أنا سلطان قانون الوجود

- اقلها

(ج) روايات :

- الحرام

- العيب

- رجال وثيران

- العسكري الأسود

- البيضاء

- بصراحة غير مطلقة

- اكتشاف قارة

- نيويورك ٨٠

- شاهد عصره

- جبرتي الستينيات

- الأب الغائب

رقم الإيداع : ٢٨٩٣ / ٨١

التقييم الدولي : 8 - 488 - 316 - 977

مكتبة مصير
٣ شارع كامل صدقي - النجاة

دار مصير للطباعة
معهده جوده الحجاز وشركاه